

O LE EKALESIA A IESU KERISO O LE AU PAIA O ASO E GATA AI • IULAI 2019

O LeLiahona



Paionia: O Latou Olaga
Lototoa, O La Tatou
Talatuu o le Faatuatua,
itulau 20, 28

**O Apostolo e Toasefululua:
O se Valaauga Faavaomalo ma o se Galuega Patino,
itulau 12**

Faatoilaloina o le
Lagona Le Saogalemu,
Tasi le Galuega Auauna
Atu i le Taimi, itulau 22

UA I AI
IINEI LE
EKALESIA

Bengaluru Initia





O ni nai mea moni nei e uiga i le Ekalesia i Initia:



Tagata o le
Ekalesia

13,570



Uarota ma paranesi
O le falesa a le
Uarota a Convent
Road o loo faaalia i le
ogatotonu i le pito i
lalo o le ata

Misiona

2
मिशन केन्द्र
Misiona Kendra



Gagana Initia o loo
maua ai se vaega po o
le tusi atoa o le Tusi a
Mamona

Gagana autu e
faaaoga i Initia

22 Two stylized orange icons of people facing each other, one with a speech bubble.

1851

O ni nai tagata ua papatiso-
ina i se tamai paranesi ua
amata i Kolkata.

1993

Ua faatuina le Misiona a
Bangalore Initia , ma le 1,150
le au paia i paranesi e 13.

2007

Ua faavae le Misiona a New Delhi
Initia.

2012

Ua faatulaga le siteki muamua,
i Hyderabad, e Peresitene
Dallin H. Oaks.



E Mafai
Faapefea Ona
Tatou Fatuina
se Masani o le
Faaaofia i le
Ekalesia?

8



E Fesoasoani Mai le Lagi ia te Au

O se avanoa e seasea maua le faatalanoa o sui uma o le Korama a Apostolo e Toasefululua ina ia tusia e uiga i le tofi apostolo paia (tagai "O i Matou o Molimau," itulau 12).

Ina ua uma le feiloaiga ma Peresitene M. Russell Ballard, le Sui Peresitene o le Korama a le Toasefululua, sa ou toe tepa atu i tua i lona ofisa. Sa nofo o ia i lana kesi, ma tusia se lauga o le konafesi aoao. O ia o le Pulega Aoao na sili ona umi lona auaunaga i le Ekalesia—na lagolagoina i le Korama Muamua a Fitugafulu i le 1976. Sa ia foliga lelava lava ma na tumu foi i le malosi i le taimi lava e tasi. "O a mai oe?" na ia faatoa fesili mai ai ia te au, ae mulimuli mai ai ma se fautuaga agaalofa: "Aua e te soona galue." O se fautuaga mai se tasi na taliaina se valaauga lea e galue i le olaga atoa i le auaunaga a le Alii, o lea talanoaga puupuu na taua tele ia te au.

Ua valaaulia le Toasefululua e "pulea mataupu uma o [le Ekalesia] i atunuuma" (Mataupu Faavae ma Feagaiga 107:33). Ae afai e te faatasi ma i latou, e suia la latou taulai mai se Ekalesia i le lalolagi atoa i le tagata o loo i o latou luma. Latou te o mai i o latou valaauga mai tulaga na umia i tofiga maualuluga i le vaai a le lalolagi, ae ina ua ou tuua lona ofisa, o upu e faamatala ai i latou na tutusa lava i taimi uma—lotomualalo ma agaalofa.


"O nisi taimi ou te fesili ai ia te au lava, 'E faapefea ona ou i ai iinei faatasi ma nei alii maoae?'" Na tau mai e Peresitene Ballard ia te au. Ona ia molimau mai lea, "E fesoasoani mai le lagi ia te au." Ou te faamoemoe o le a e olioli i lenei vaaiga puupuu i le valaauga o se Apostetolo.

Sarah Jane Weaver
Faatonu *Tala Fou o le Ekalesia*



O i Matou o Molimau:
O Apostolo e
Toasefululua i le Aso
*Sarah Jane Weaver ma
Jason Swensen*

12



O La Tatou Talatuu
Faaauau o Paionia

20



O Se Mamanu e
Sili Atu le Paia o le
Auauanaga
Elder Patrick Kearon

22

Anotusi



5 Mataupu Faalelotu: O se Faamanuiaga i o Matou Olaga ma Nuu ☺

O mataupu faalelotu ua aafia ai e le gata i o matou agaga ae faapena foi lo matou nuu, soifua maloloina, ma sootaga.

6 Atatosi o le Faatuatua: Iona Wikaira— Kaikohe, Niu Sila ☺

Ua vaaia e lona le taua o le tumau i ona tulaga faatauaina. Ua ia mafai ai ona faia filifiliga sao ao ia taulai atu i le Faaola.

8 Mataupu Faavae mo le Auaunaga:

E Mafai Faapefea Ona Tatou Fatuina se Masani o le Faaaofia i le Ekalesia?

Ao tatou atiina ae se uiga o le faaaofia, e mafai ona tatou suia olaga o i latou atonu o loo lagonaina le tuuatoatas.

12 O i Matou o Molimau: O Apostolo e Toasefululua i le Aso

Saunia e Sarah Jane Weaver ma Jason Swensen

Ua faasoa mai e Apostolo o Aso Nei o latou manatu i lo latou valaauga paia.

20 O La Tatou Talatuu Faaauau o Paonia ☺

E mafai faapefea ona tatou faamamaluina ma faasoa atu la tatou talatuu o paonia?

22 O Se Mamanu e Sili Atu le Paia o le Auaunaga

Saunia e Elder Patrick Kearon

O le auaunaga o se tasi o uiga e iloa ai tagata o le Ekalesia. Vaai pe faapefea ona e faalauteleina ou malosiaga e auauna atu ai i isi.

28 Faapotopoto Mai se Kamupani

I lenei vaega e lei faasalalauina mai le Au Paia voluma 2, ua saunia uluai tagata o le Ekalesia e siitia atu i Sisifo.

32 O Leo o Le Au Paia o Aso e Gata Ai ☺

O lana folafolaga i se tamaitiiti ua avea o se faamanuiaga; e aumaia e le tatalo le filemu i totonus o se tofotofoga faaleaiga; ua suia se tulaga faigata i le fiafia; o lona naunau ua taitai atu i le malamalama.

36 Faamanuiaga o le Ola Tutoatasi:

Laasaga e Ono i le Mauaina o se Galuega

Saunia e Bruno Vassel III

O ni laasaga nei e ono i le sueina ma le mauaina o se galuega e talafeagai ma ou tomai.

☺ Faitauga Vave

I Le Faavaa
O Keriso o loo
Faaauina Apostolo
e Toasefululua,
saunia e Harry
Anderson.



Vaega

Autalavou Matutua

42

Aafiaga patino mai ia i latou na **toe**
foi vave mai i le fale
mai a latou misiona
ua faaalia ai e mafai
ona e faia lenei suiga
i le fesoasoani mai o
le Faaola.



Autalavou

50

Ua ia manaomia le fesoasoani
a le Alii ina ia auai i le kolisi;
o le galue o se mea fiafia,
e le o se avega; e mafai ona
e avea ma se molimau o
Keriso; ua avea le
toafa o se nofo-
aga saogalemu
faaleagaga; o se
tusi o se meaalofa
sili; ma **o mea o le**
a e maua i le Tusi
a Mamona.



Tamaiti

Uo

Aoao pe faapefea ona **faasoa**
atu le talalelei ma le alofa.
Faitau e uiga i le au paia i
Cambodia. Filifili
po o le a le uiga
o le Kerisiano ia
te oe.



E NA'O TUSIGA FAATEKINOLOSI E FAAALIA AI



Faatoilaloina o le Lotovaivai

Saunia e le Tautua mo le Ola Tutoatasi

Ua tumu le olaga i luitau. Ae o loo i ai lava se auala e toe maua ai le olioli ma le faamoemoe.



Lagolagoina o Faifeautalai O E Toe Foi Vave Mai i le Fale

Saunia e Kevin Theriot, PhD

O faifeautalai e toe foi vave mai i le fale e manaomia lo tatou alofa ma le malamalama.

IULAI 2019 VOL. 43 NU. 7
LIAHONA 18607 890

O le mekasini faavaomalo o Le Ekalesia a Iesu Keriso o le Au Paia o Aso e Gata Ai

O Le Au Peresitene Sili: Russell M.

Nelson, Dallin H. Oaks, Henry B. Eyring

O le Korama a Apostolo e Toasefulua:

M. Russell Ballard, Jeffrey R. Holland, Dieter F. Uchtdorf, David A. Bednar, Quentin L. Cook, D. Todd Christofferson, Neil L. Andersen, Ronald A. Rasband, Gary E. Stevenson, Dale G. Renlund, Gerrit W. Gong, Ulisses Soares

Faatonu: Randy D. Funk

Faufautua: Brian K. Ashton, Randall K. Bennett, Becky Craven, Sharon Eubank, Cristina B. Franco, Donald L. Hallstrom, Larry S. Kacher, Erich W. Kopischke, Lynn G. Robbins

Pule Faatonu: Richard I. Heaton

Faatonusili o Mekasini a le Ekalesia: Allan R. Loyborg

Pule o Mea Tau Pisini: Garff Cannon

Pule Faatonu: Adam C. Olson

Pule Faatonu Lagolago: Ryan Carr

Faasalalau Lagolago: Camilla Castrillón

Au Tusitusi ma Faatonutonu: Maryssa Dennis, David Dickson, David A. Edwards, Matthew D. Flinton, Garrett H. Garff, Jon Ryan Jensen, Aaron Johnston, Charlotte Larcabal, Michael R. Morris, Eric B. Murdock, Joshua J. Perkey, Jan Pinborough, Richard M. Romney, Mindy Selu, Lori Fuller Sosa, Chakell Wardleigh, Marissa Widdison

Pule Faatonusili o Faatufugaga: J. Scott Knudsen

Faatonusili o Faatufugaga: Tadd R. Peterson

Mamanu: Jeanette Andrews, Fay P. Andrus, Mandy Bentley, C. Kimball Bott, Thomas Child, Joshua Dennis, David Green, Colleen Hinckley, Eric P. Johnsen, Susan Lofgren, Scott M. Mooy, Emily Chieko Remington, Mark W. Robison, K. Nicole Walkenhorst

Faatonu o le Puletaofia o Meatotino:

Collette Nebeker Aune

Pule i le Gaosiga: Jane Ann Peters

Gaosiga: Ira Glen Adair, Julie Burdett, Thomas G. Cronin, Bryan W. Gygi, Ginny J. Nilson, Marrissa M. Smith

Tailolomi: Joshua Dennis, Ammon Harris

Faatonusili Lomitusi: Steven T. Lewis

Faatonusili o Faletusi: Troy R. Barker

Mo le okaina o mekasini, alu i le store.lds.org po o le Faletusi Tutotonu i Pesega, Telefonu 64127, Totogi o le Mekasini: \$0.55 (Samoa) i le kopu, Totogi mo le Tausaga Atoa \$6.60 (Samoa).

Auina atu tusitisiga ma faafesili i lugā o le initoneti i le liahona.lds.org: pe meli mai i le Liahona, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O le Liahona (o lona uiga i le Tusi a Mamona o le "tapasa" po o se "faatonuala") e lomia i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalaoitia, Siekisolvakia, Tenimaka, Take, Igilisi,

Esitoria, Fit, Finelani, Farani, Siamani, Eleni, Hanikeri, Initu, Iselani, Initonlesia, Italia, Iapani, Kiripati, Korea, Lativia, Litunia, Malakasa, Masela, Monokolia, Nouei, Polani, Potukali, Romania, Rusia, Samoa, Saina (ua faafagofieina), Silovenia, Sipaniolo, Suetena, Swahili, Tagaloka, Tahiti, Tai, Toga, Lukureini, Urutu, ma Viatename. (E eseese lava gagana.)

© 2019 Puletaofa le Intellectual Reserve, Inc. Ua taofia aia tatau uma. Lomia i le lunaite Setete o Amerika.

Faamatatalaga o le Puletaofia: Vagana ua faailoa mai, e mafai e tagata taitoatasi ona kopu anomea mai le Liahona mo lo latou lava faaogaina patino, e le faia ai ni pisinisi (e aofia ai valauga o le Ekalesia). O lenei aia tatau e mafai ona faaleogaina i soo se taimi. E le tatau ona kopuina ia ataa pe afai o loo faaalia le faasaina i le laina o faaaloaloga faatas i ai ma le faatufugaga.

la auina mai fesili e uiga i le puletaofia i le Intellectual Property Office, 50 E. North Temple St., FL 13, Salt Lake City, UT 84150, USA; email: cor-intellectualproperty@ldschurch.org.

Mo le Aufaitau i le lunaite Setete ma Kanata: July 2019 Vol. 43 Nu. 7. LIAHONA

(USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 E. North Temple St., Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (American Express, Discover, MasterCard, Visa) may be taken by phone or at store.lds.org. (Canada Post Information: Publication Agreement #40017431)

POSTMASTER: Send all UAA to CFS (see DMM 507.1.5.2). NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.

SAILI NISI MEA

I le polokalama o le Potutusi o le Talalelei [Gospel Library app] ma i le liahona.lds.org, e mafai ona e:

- Maua ai le lomiga lenei.
- Maua ai na'o anotusi faatekinolosi.
- Saili lomiga ua mavae.
- Auina mai au tala ma manatu faaalia.
- Totogi [se lomiga] pe tuu atu se meaalofa o le totogi o se lomiga.
- Faaleleia au suesuega i meafaigaluega faatekinolosi.
- Faasoa atu tusiga ma vitio e sili ona e fiafia i ai.
- Sii mai pe lolomi ia tusiga.
- Faalogologo i tusiga e sili ona e fiafia i ai.

FAAFESOOTAI MAI I MATOU

Imeli mai au fesili ma manatu faaalia i le liahona@ldschurch.org.

Ia auina mai au tala e faatupu faatuatua i le i-meli i le liahonaldschurch.org, pe lafo mai i le: *Liahona*, flr. 23

50 E. North Temple Street
Salt Lake City, UT 84150-0023, USA



MATAUPU FAALELOTU:

O Se Faamanuiaga i o Matou Olaga ma Nuu

Ole faatuatua ma mataupu faalelotu o se vaega autu o lo tatou faasinomaga. O lo tatou faatuatua, ma mataupu faalelotu lautele, e aafiai o tatou olaga i aso taitasi. O ni suesuega eseese a lotu Kerisiano ma isi lotu ua maua ai faapea o tagata talitonu e sili atu le malolosi ma e foliga mai e saofaga i o latou nuu. O taunuuga o suesuega ua faaalia iinei ua na o se faataitaiga o le tele o auala e faaleleia ai e mataupu faalelotu o tatou olaga:

TAGATA LOTU.

► E MASANI ONA SILI ATU LE OFO FU A MAI,
FOAI ATU I GALUEGA FESOASOANI,² MA AUAI I KALAPU MA VAEGA.³

► E SILI ATU ONA FIAFIA "SOOTAGA MA ISI MA SILI ATU ONA MAUTU FAAIPOPOGA" E FAAPEA FOI I FEGALE-GALEAIGA LAUTELE I UPEGATAFAILAGI.⁴
► "E MATELE LAVA INA FAAIPOPO AE ITIITI LE TULAGA O LE TATALA O FAAIPOPOGA [MA LATOU] TE FAALEO ATU TULAGA MAUALULUGA O LE FAAMALIEINA I O LATOU TAITOALUA."⁵

► "PE A MA SE TASI VAE TOLU E MASANI ONA . . . FAI ATU O LOO LATOU FIAFIA LAVA."⁶
► E ITIITI LE TULAGA O LE FAANOANOA MA ITIITI LE POPOLE.⁷
► E MATELE LAVA INA FITU TAUSAGA E UMI AI LE OLA NAI LO TAGATA E LE LOLOTU.⁸ ■



Nuu



FAAMATALAGA

1. Tagai Arthur C. Brooks, *Gross National Happiness: Why Happiness Matters for America—and How We Can Get More of It* (2008), 52.
2. Tagai Rodney Stark, *America's Blessings: How Religion Benefits Everyone, Including Atheists* (2012), 4.
3. Tagai Robert D. Putnam, *Bowling Alone* (2000), 66–67.
4. Tyler J. VanderWeele, "Does Religious Participation Contribute to Human Flourishing?" *Big Questions Online*, Jan. 14, 2017, bigquestionsonline.com.
5. Stark, *How Religion Benefits Everyone*, 4.
6. Brooks, *Gross National Happiness*, 48.
7. Tagai Andrew Sims, *Is Faith Delusion? Why Religion is Good For Your Health* (2009), 220.
8. Tagai Stark, *How Religion Benefits Everyone*, 4, 106–107, 111.



Soifua
Maloloina





Iona Wikaira

Kaikohe, Niu Sila



E ui lava ina feagai o ia ma luitau i le avea ai o se leoleo falepuipui, e maua lava e Iona le malosi ma tumau pea lona mafanafana e ala i le faatuatua ia Iesu Keriso.

CHRISTINA SMITH, PUE ATA

Ua ou iloaina afai e iloa e tagata i lau galuega o oe o se tagata o le Ekalesia, o le a latou faaaloalogia oe ma le Ekalesia pe a latou vaai e te le tuua i lalo ou tulaga faatulagaina ona o le siosiomaga o loo e i ai. O le mafuaga lena e taua ai mo au le taumafai ia avea o se faataitaiga lelei o le Au Paia o Aso e Gata Ai.

I tulaga uma lava, ou te mafaufau, "O le a le ala e finagalo le Faaola ia ou amio ai?" po o "O le a le ala e finagalo o la ou te taulimaina ai lenei mea?" I ou aafiaga uma lava, ou te taumafai ia mautinoa o au faatinoga e atagia ai le mea o le a faia e le Faaola. E fesoasoani lenei mea ia te au ia sili atu ai le fai meatonu ma sili atu le toafimalie i vevesi uma lava o se siosiomaga faigata o le galuega.

AOAO ATILI

Na aoao mai Peresitene Thomas S. Monson (1927–2018) i le taua o le avea ma se faataitaiga lelei i tagata uma o siomia ai i tatou i le lds.org/go/7197.

Saili mo nisi tala i le faasologa o "Portraits of Faith" i le lds.org/go/18.

Mataupu Faavae o le Auaunaga

E Mafai Faapefea Ona Tatou Fatuina se Masani o le **Faaaofia i le Ekalesia?**

Pe a tatou vaavaai solo ia tatou uarota ma paranesi, tatou te vaia ai tagata o e foliga mai e faigofie lava ona masani i isi. O le mea tatou te le iloaina e faapea, e oo lava ia i latou e foliga mai ua masani lelei ma isi, e toatele e lagonaina le tuuesea. O se tasi suesuega, mo se faataitaiga, na maua ai talu ai nei e toeitiiti lava o le afa o tagata matutua i le Iunaite Setete na lipotia mai e lagonaina le tuuatoatasi, tuuesea, po o le taumamao mai isi.¹

E taua le lagonaina ua faaaofia. O se manaoga autu o le tagata, ae afai tatou te lagonaina le tuuesea, e tiga lava. O le tuuesea e mafai ona maua ai lagona o le faanoa-noa po o le ita.² A tatou lagonaina ua pei tatou te le auai, e matele ina tatou vaavaai mo se nofoaga tatou te maua ai le mafanafana sili atu. Tatou te manaomia le fesoasoani i tagata uma ia lagonaina latou te auai i le lotu.

Faaaofia e Pei o le Faaola

O le Faaola sa avea ma faataitaiga atoatoa o le faatauaina ma le faaaofiaina o isi. Ina ua Ia filifilia Ana Apostolo, e lei taulai atu o Ia i tulaga, tamaoaiga, po o galuega taualoa. Sa Ia faatauaina le fafine Samaria i le vaieli, ma molimau atu ia te ia i Lona paia e ui lava sa vaai maualalo tagata Iutaia i tagata Samaria (tagai Ioane 4). E vaai o Ia i le loto ma e le faailoga tagata (tagai 1 Samuel 16:7; Mataupu Faavae ma Feagaiga 38:16, 26).

Sa fetalai mai le Faaola:

“O le poloaiga fou ou te tuu atu ai ia te outou, ia outou fealofani; faapei ona ou alofa atu ia te outou, ia fealofani foi outou.

“O le mea lea e iloa ai e tagata uma lava o o’u soo outou, pe afai ua outou fealofani” (Ioane 13:34–35).

O Le a se Mea e Mafai ona Tatou Faia?

O nisi taimi e faigata ona iloa pe o lagonaina e se tasi e pei i latou ua faaesea. O le tele o tagata e le tau maia—manino faapea o i latou ua faaesea. Ae faatasi ai ma se loto



alofa, le taitaiga a le Agaga Paia, ma se taumafaiga ia iloa, e mafai ona tatou iloa pe a lagonaina e se tasi le faaaofia i sauniga ma gaoioiga o le Ekalesia.

O Faailoga e Ono Iloa ai o se Tasi ua Lagonaina ua le Faaaofia

- Gagana puipuia o le tino, e pei o le piilima mau po o le tilotilo i lalo.
- Nofo i tua o le potu po o le nofo toatasi.
- Le auai i le lotu po o le seasea auai.
- Tuua vave o sauniga po o gaoioiga.
- Le auai i talanoaga po o lesona.

O nei mea e ono avea ma faailoga o isi foi lagona, e pei o le matamuli, popole, po o le le mautonu. E mafai e tagata lotu ona lagonaina le “ese” pe afai o i latou o ni tagata fou o le Ekalesia, e o mai se isi atunu po o se isi aganuu, pe na aafia i le faalavelave e suia ai le olaga, e pei o le tatalaina o se faaipoipoga, maliu o se tagata o le aiga, po o le toe foi vave mai se misiona.

E tusa lava po o le a le mafuaaga, e le tatau ona tatou faatuai ona aapa atu i le alofa. O mea tatou te fai atu ma mea tatou te faia e mafai ona fatuina ai se lagona faapea e taliaina tagata uma lava ma e manaomia.

FAASOA OU AAFIAGA

Auina mai ou aafiaga ia i matou a o e auauna atu i isi pe na e mauaina ni auau-naga. Alu i le liahona.lds.org ma kiliki le “Submit an Article po o Feedback.”

O Nisi Auala e Faaaofia ma Taliaina ai

- Aua le nofo i tafatafa o le tagata lava e tasi i taimi uma.

- Faaaofia isi i talanoaga.

- Faaalu se taimi e mafaufau ai e uiga i le uiga moni lava pe a tatou fai atu o le Ekalesia e mo tagata uma, po o le a lava o latou eseesega. E mafai faapefea ona tatou faia lenei mea o se mea moni?



Faamanuiaina e ala i le Faaaofia

Na siitia atu Christl Fechter i se isi atunu i le mavae ai ona faatafunaina e le taua lona atunu. E le tautala lelei o ia i le gagana ma e lei iloaina se tasi i lona tuaoi fou, o lea sa ia lagona ai le tuusea ma le tuuatoatasi i le taimi muamua.

I le avea ai ma se tagata o le Ekalesia, sa ia maua le lototele ma amata ona auai i lana uarota fou. Na popole o ia faapea o lana gagana ese o le a taofia ai tagata mai le fia talanoa ia te ia pe o le a faamasinoina o ia mo le avea ma tamaitai nofo toatasí.

- Ia valaaulia isi e avea ma se vaega o lou olaga. E mafai ona e faaaofia i latou i gaoioiga ua e fuafuaina.

- Faaleo atu le alofa ma ofo atu ni faamatalaga alofa.

- Aua le taofia le faauoga ona o se tasi e le tutusa ma ou faamoemoega.

- Pe a e vaai i se mea e faapitoa i se tagata, ia fafia i ai nai lo le faapasi pe aloese ai.

- Saili ma fausia i luga o mea masani e fafia i ai.

- Vaai i tua atu o foliga vaaia ia iloa ai le tagata moni. (Mo nisi faamatalaga i lenei autu, tagai i le “O Le Auaunaga o le Vaai atu i Isi e pei Ona Faia e le Faaola,” *Liahona*, Iuni 2019, 8–11.)

Ae na ia feiloai i isi na le popole i ona eseesega ma taliaina o ia i totonu o lo latou nuu o uo. Na latou aapa atu i le alofa, ma na vave lava ona ia iloaina lona pisi e fesoasoani e aoao se vasega i le Peraimeri. O tamaiti na avea o ni faataitaiga sili o le taliaina, ma o le lagona o le alofagia ma manaomia na faamalosia ai lona faatuatua ma fesoasoani e faamalosia ai lona tuuto i le olaga i le Alii.

E le masani ona faigofie ona lagona le mafanafana i talaane o tagata e ese mai ia i tatou. Ae a faataitai, e mafai ona tatou sili atu i le mauaina o le taua i eseesege ma faafetaia le saofaga faapitoa e aumaia e tagata taitasi. E pei ona aoao mai e Elder Dieter F. Uchtdorf o le Korama a Apostolo e Toasefululua, o o tatou eseesege e mafai ona fesoasoani e avea ai i tatou o ni tagata e sili atu le lelei, ma sili atu le fiafia: “O mai, fesoasoani mai ia i matou e fausia ma faamalosia se aganuu o le faamalologa, agalelei, ma le alofa tunoa i fanau uma a le Atua.”³ ■

FAAMATALAGA

1. Tagai Alexa Lardieri, “Study: Many Americans Report Feeling Lonely, Younger Generations More So,” *U.S. News*, May 1, 2018, usnews.com.
2. Tagai Carly K. Peterson, Laura C. Gravens, and Eddie Harmon-Jones, “Asymmetric Frontal Cortical Activity and Negative Affective Responses to Ostracism,” *Social Cognitive and Affective Neuroscience*, vol. 6, no. 3 (June 2011), 277–85.
3. Dieter F. Uchtdorf, “Talitonu, Alofa, Faia,” *Liahona*, Nov. 2018, 48.



SUESUE ATILI

Mo nisi manatu, faitau “E Mafai Ona Lelei Atu Ona Tatou Faia: Faafeiloaiina o Isi i totonu o le Lafu,” *Liahona*, Set. 2017.

IA FAATAITAI LOA

Na aoao mai Sister Linda K. Burton, o le sa avea muamua ma Peresitene Aoao o le Aualofa, “Muamua matau, ona auauna atu ai lea” (*Liahona*, Nov. 2012, 78). O le mulimuli i lenei fautuaga e mafai ona fesoasoani ia i tatou e fatuina ni uarota ma paranesi e faaaofia ai tagata uma lava ma manaomia. O nisi nei o manatu e mafaufau i ai:

- Pe a tatou ulufale atu i lo tatou fale lotu, e mafai ona tatou **vaavaai solo ma matauina** po o ai e finagalo le Alii ia i tatou e aumai i lo tatou lio o le faauoga i lena aso.
- O nisi taimi tatou te aloese mai ia i latou e ese mai ia i tatou pe o aafia i se taimi faigata ona tatou te fefefe i le fai atu o se faamatalaga sese. O lenei mea e tuua ai i latou e lagonaina le tuuvesea, ma mafaufau ai pe aisea e le talanoa atu ai se isi ia i latou. **Nofo i tafatatafa o i latou, faaali atu le alofa, ma fai atu ni fesili faamaoni.** Fesili atu ia i latou e uiga i la latou aafiaga ma o latou luitau ma pe faapefea ona e mafai ona fesoasoani atu.
- Ia tatou lauga ma a tatou lesona i aso Sa, e mafai ona tatou filifili e **faaaoga faataitaiga e faaalia ai faapea o tagata ma aiga i tulaga eseese** e mafai ona ola i le talalelei ma olioli i ona faamanuiaga.
- O tagata o le vasega e mafai ona faamanuiaina tele lava pe a **faaaofia e faiaoga tagata mai tausaga eseese, atunu, ma tulaga o aiga.** E tele mea tatou te aoao mai le tele o tagata faatuatua o le Ekalesia na oo i ni aafiaga eseese nai lo i tatou.
- E mafai e faiaoga ona saunia se tulaga saogalemu mo tagata uma e faasoai mai ai o latou aafiaga i le ola ai i le talalelei. Soo se taimi lava e faasoai mai ai se faamatalaga, e mafai e se faiaoga ona **tali lelei atu i se mea na ofoina mai.** Ona mafai lea e tagata o le vasega ona lagonaina le toafimalie ma le mafanafana i le faasoaina atu o o latou manatu.



O i Matou o Molimau: O Apostolo e Toasefululua i le Aso

Ua faasoa mai e Apostolo o aso nei o latou manatu i lo latou valaauga paia.

Saunia e Sarah Jane Weaver ma Jason Swensen

Talafou o le Ekalesia

Itausaga e 189 talu ona faavae Le Ekalesia a Iesu Keriso o le Au Paia o Aso e Gata Ai, e 102 alii na valaaulia e auauna atu o ni sui o le Korama a Apostolo e Toasefululua. E ui lava na taitaia e le Alii le tele o suiga i le Ekalesia talu mai lena taimi, o tiutetauave autu o se Apostolo o loo tumau pea le tutusa.

Mai i lona ofisa latalata ane i le Lotoa o le Malumalu, o Peresitene M. Russell Ballard, le Sui Peresitene o le Korama a Apostolo e Toasefululua, na saunoa i le valaauga faaleagaga ua tuuina atu i Apostolo ina ia molimau atu i le Faaola i le salafa o le kelope, i le sootaga faapitoa latou te faasoa atu i faifeautalai, ma ni vaaiga sese masani e uiga i le avea “o se apostolo, tagatavaai, ma se talifaaaliga.” Ina ua fesiliglia pe i ai nisi o sui o le Korama a Apostolo e Toasefululua na te fautuaina mai e talanoa i ai e uiga i la latou valaauga paia e avea o se vaega o lenei tusiga, na vave lava ona tali mai Peresitene Ballard, “Ioe. O i latou uma lava.”



Ia Ogatasi

E tele lava luitau o feagai ma Aposetolo o aso nei. Latou te auauna atu i aulotu i le lalolagi atoa na ua tofotofoina e faigata faalemalu, aiga malepe, vevesi faifaipea o agafesootai, ma faaletonu o tulaga tautupe. E taua mo Aposetolo le malamalamu i luitau ma tulaga o loo feagai ma tagata lotu.

O ni taitai o le Ekalesia, e tatau i Aposetolo ona iloa tagata ma o latou tulaga ina ia mafai ona sili atu le auaunaga ia i latou.

“E tatau ona matou iloa mea o loo aafia ai olaga o tagata,” na saunoa ai Elder Ulisses Soares. “E manaomia e Aposetolo ona i ai i se faagasologa o le aoaoina, suesueina, ma mauaina musumusuga ma faaaliga.”

E pei lava ona taua le ogatusa ma mea o loo feagai ma tagata lotu, e sili atu foi le taua mo Aposetolo ona faalogo lelei i le siufogaga taiala a le Atua ma ia ogatusa ma le finagalo o le Alii, na saunoa ai Peresitene Ballard. “O le Ekalesia lenei a le Alii, ma o la matou luitau autu o le mautinoa o loo matou ogatusa ma le ala e finagalo ai o Ia ia i matou e taitai ai Lona malo iinei i le lalolagi,” na saunoa ai Peresitene Ballard.

Molimau Faapitoa

Ao saunoa Aposetolo taitasi e uiga i lona valaauga, e vave lava ona manino mai o mataupu faaletaitaiga e le o lo latou uluai popolega lena. O lo latou tiutetauave autu lava e tutusa lava e pei ona sa i ai—o i latou e avea o ni “molimau faapitoa o le suafa o Keriso i le lalolagi atoa” (Mataupu Faavae ma Feagaiga 107:23).

O le faatonuga mulimuli a le Faaola i Ana Aposetolo (tagai Mataio 28:19–20) o le o atu ia “e aoao atu, e molimau atu, e papatiso, ma ia fausia ma faamalosia Lana Ekalesia,” na saunoa ai Peresitene Ballard.

E lei suia lava le valaauga o Aposetolo i le aso. “O le muamua lava ma le sili ona taua, i taimi uma, o i matou o molimau o le moni o le soifua o le Alii o Iesu Keriso,” na saunoa ai Elder David A. Bednar. “E le o matou o ni faatonu; o i matou o auauna o le talalelei a Iesu Keriso.”

Ua poloaiina Aposetolo “ia avea ma molimau femalagaai” e o atu “i le lalolagi uma,” na saunoa ai Elder Jeffrey R. Holland. “Matou te mananao e oo lava i le iunite e sili ona mamao o lenei Ekalesia, i faafanua, ia lagonaina o loo i ai se sootaga vavalalata lava i le va o i latou ma le perofeta a le



Alii,” na ia saunoa ai. “E masani lava ona faapea, ‘O le Eklesia ua faia se tamai lalolagi lava ia.’ I le tulaga o fesootaiga faa Apostolo, matou te faamoemoe o le a faapea lava ona i ai.”

Oo Atu i Siteki Uma

Na faamatala e Elder Quentin L. Cook faapea i le vaitau o le fa-tausaga, o siteki ma uarota uma lava, itu ma le paranesi, i le Eklesia e i ai se sui o le Toasefululua e oo atu i ai ma feiloai ma ona taitai—ma aoaoina i latou i faamuamua faaperofeta.

“O konafesi faaletaitai ua faatagaina i matou e faataunu lo matou tiute faaleaoaoga faavae o le ‘[fausiaina] o le eklesia ma le [pulea] o mataupu uma o lea lava eklesia i atunu uma’ [Mataupu Faavae ma Feagaiga 107:34] i lalo o le taitaiga a le Au Peresitene Sili,” na ia saunoa ai.

O se tuufatasiga, o aafiaga taua, ma mamana a sui o le Korama a Apostolo e Toasefululua ua fesoasoani e taialaina nei taitai o le lotoifale ao latou faia filifiliga taua ia uunaia ai ma lagolago tagata e ala i o latou luitau, na saunoa ai Elder Bednar.

“Ao matou o atu i nofoaga eseese, matou te lagonaina le agalelei o tagata,” na saunoa ai Elder Gerrit W. Gong. “Matou te faalogo i aafiaga ma matou aoao ni mea na e fesoasoani ia i matou e malamalamai ai ao matou fefautuai faatasi o se korama e uiga i mea o loo tutupu i vaega eseese o le lalolagi ma i vaega eseese i totonus o le Eklesia.”

O le malaga i konafesi faaletaitai “e tuuina mai ia i matou le avanoa e feoceoeai ai ma tagata ofoo fogia, ma matagofie,” na saunoa ai Elder Cook. “Matou te o i o latou fale, ma matou te maua ai se avanoa e auauna atu ai ia i latou. . . . O le auaunaga i le Au Paia lena e sili ona mamana e pai mai i o matou loto. Matou te faia i le taitaiga a le Agaga Paia ma le Faaola faatasi ai ma le malamalamai e aoaoina e ala i aafiaga, o nisi e paia tele e le mafai ona faasoa atu,” na ia saunoa ai.

Auaunaga i Tagata Taitoatas

I le mavae ai o le 43 tausaga o se Pulega Aoao ma ua i ai nei i lona fasefulu tausaga o le auaunaga i le Korama a Apostolo e Toasefululua, o tiutetauave a Peresitene Ballard



ua oo atu ai o ia i le tele o atunu o le lalolagi, ma mafai ai ona ia auauna atu faafesagai ma tagata ma faifeautalai e le mafaitaulia. E faitau miliona ua mafai ona faalogologo i ana lauga o konafesi aoao ma faigalotu. Ae ui e i ai sona tiutetauave faavaomalo, e faatagaina o ia e le Agaga Paia ia fesootai atu ma faamanua tagata taitoatasi. O lenei ala faigata o le ala a le Faaola, na ia saunoa ai. “O nisi taimi ou te maua se tusi mai se tasi ua faapea mai, ‘Sa ou i ai i se fonotaga, ma na e fai mai se mea na suia ai lou olaga.’ O le mana lena o le Agaga Paia. E popole le Alii i Lana Eklesia e oo lava i tulaga laiti.”

O se “numera e le mafaitaulia o aafiaga matagofie, ma faatauvaa faatasi ma tagata o le Eklesia i le lalolagi atoa” ua faamatalaina le auaunaga faaapostolo, na saunoa ai Elder Bednar. “E auina atu e le Alii se sui o le Korama a le Toasefululua i nofoaga faapitoa i taimi faapitoa lea tatou te feiloai ai ma le Au Paia o Aso e Gata Ai faatuatua ma isi e masani ona tauivi pe o loo manaomia le faamafanafana ma le faamautinoaga. E fuafuina e le Atua na feoeoeaiga,” na saunoa ai Elder Bednar.

O le upu apostolo e sau mai le upu Eleni o lona uiga “ia auina atu.” E pei o Apostolo anamua, o loo auina atu pe a le Faaola Ana Apostolo “i le lalolagi uma” (Mareko 16:15–16).

Na saunoa mai Elder Ronald A. Rasband faapea ina ua mavae lona valaaulia i le au apostolo, na ia iloina na te manaomia e faaopoopo se isi taimi i gaoioiga uma lava i lona olaga ina ia mafai ai ona ia feiloai i tagata o le Eklesia ma isi. “E le faatatau ia te au,” na ia saunoa ai. “E faatatau i le faaaloalo ma le mamalu o loo i ai i tagata o lenei Eklesia mo le tofi apostolo.”

Na saunoa mai Elder Rasband faapea i le taimi o lona faauuga i le tofi apostolo, na faatonuina o ia, “Ua matou tuua oe i se tofiga ia avea ma se molimau faapitoa o le suafa o Keriso i le lalolagi atoa . . . i taimi uma ma i tulaga uma lava.” O na upu na aofia i lou faauuga: ‘i taimi uma ma tulaga uma.’”

O Se Sootaga Taua

O Apostolo ma fafeautalai e silia ma le 70,000 o le Eklesia e faasoaina se sootaga paia, ma e fesootai lava.

O le upu *apostolo* e sau mai le upu Eleni o lona uiga “ia auina atu,” na faamatalaina e Elder Dale G. Renlund. Mafaufau i le tofi taua a le Faaola i Ana Apostolo anamua; “O atu ia outou i le lalolagi uma, ina talai atu ai le talalelei i tagata uma lava. O le faatuatua ma papatisoina e faaolaina ia” (Mareko 16:15–16).

I le mulimuli ai i lena poloaiga, ua “galulue ma le amiontonu” le Toasefululua i le galuega faafeautalai ma auina atu le savali o le talalelei, le saunoaga a Peresitene Ballard.

E pei o Paulo anamua, o Apostolo o aso nei e faasafua atu ma le agaga tatalo o latou tiute ia faasoa atu ai le



Peresitene Ballard i Sepania



Elder Holland I Egelani



Elder Uchtdorf i Rusia

talalelei i isi. Ma, i se uiga faaapostolo, ua auina atu ai fai-faualai i le salafa o le kelope e aoao atu le talalelei a Keriso. “O le Toasefululua lea, o loo faaaogaina ki o loo latou umia, e tofia i latou i misiona,” le saunoaga a Elder Bednar. “Ma ona matou auina atu ai lea o i latou.”

O loo tumau pea le Alii o le faatonu taiala o le galuega faafafeatalai. Na te faatagaina Ana Apostolo soifua, ua tofia i taimi eseese e auauna atu i le Aufono Faamaopoopo a Faifeatalai, e tau atu Ona faamoemoega i faifeatalai faamisiona o loo galulue i le galuega. O na tiutetauave faaletaitai e oo i tua atu na o le “faatautaia o le faalapotopotoga,” na saunoa ai Elder Bednar. O Apostolo o loo umia ki o le perisuita mo le faapotopotoina o Israelu. “Ua matou sau-nia taitaiga faaleagaga ma le taitaiga ina ia faia ai le galuega i le ala e finagalo ai le Alii,” na ia saunoa ai.

E taitaia e Elder Dieter F. Uchtdorf le Aufono Faamaopoopo a Faifeatalai a le Ekalesia. O loo saofai i luga o lana kesi se tamai faatagata apamemea o se soa faifeatalai e faaalia ai ao viliina atu ma le malosi ni uila, atonu o loo topetope atu i le lesona na fuafuaina. Soo se taimi lava na te suesueina ai lena faatagata apamemea, na te manatua lava le sootaga e le mamotusia i le va o Apostolo ma faifeatalai. “O faifeatalai uma lava e 70,000 o loo faia se auaunaga paia ma ua valaauna e le Alii i se tusi mai le perofeta a le Atua ia fai ma sui o le Faaola. O i latou o le aao faaloaloa o le Toasefululua.”

“Soo se taimi lava matou te maua ai se avanoa, matou te feiloi ai ma i latou,” na saunoa ai Peresitene Ballard. “Matou te tuu atu ia i latou e fai mai ni fesili. Matou te tau-mafai e fesoasoani ia i latou e saili, aoao atu, papatiso, ma faamalosia fanau uma a lo tatou Tama Faalelagi.”

O le galulue faatasi, o vaega uma e lua e auina atu e faasoa atu le tala fiafia o le talalelei i le lalolagi atoa. “Matou te vaai i faifeatalai faamisiona o a matou soa,” na saunoa ai Elder D. Todd Christofferson.

Manatu Sese

Ao manatu nisi tagata le lolotu faapea e taitaia le Ekalesia e pei o se faalapotopotoga, le tofi aposetolo “e le pei o se pule pisinisi; e matuai ese lava,” na saunoa ai Elder Gary E. Stevenson. “O le matafaioi a se Apostolo a le Alii o Iesu Keriso o se auaunaga moni lava, se matafaioi faafafeau.” O le matafaioi o le avea o se molimau a Iesu Keriso i le lalolagi “e aoaoina ma faamatalaina i matou.”

Na saunoa mai Elder Neil L. Andersen o le Korama a Apostolo e Toasefululua, e leai ni faigavaega, faatosina, po o le fia pule. E i ai “le eseesega i manatu,” ae “leai ni manatu faapito.”

Ua tuuina e le Alii le tele o tagata faatasi mai ituaiga o galuega ma tulaga eseese, na saunoa ai Elder Andersen. Ae “e tutusa uma i latou i la latou molimau i le Faaola ma i lo latou lotomaualalo. Latou te le saili tulaga; latou te le taumafai ia avea ma tagata e sili ona poto i totonus o le potu. E mafai e le Alii ona galue i lena mea. Ou te lei vaai lava i se tasi [i le Toasefululua] o faaalia le ita, ma ou te lei vaai lava o faaleaga e se tasi se isi.”

O le lotomaualalo e faamatalaina le tofi aposetolo, na saunoa ai Elder Uchtdorf. O a latou valaauga e iloa gofie ai

Elder Christofferson i Mekisiko





Elder Bednar i Peru



Elder Cook i Atenitina

i latou e toeitiiti lava i soo se mea latou te malaga i ai, “ae tatou te iloa e le faatatau ia i matou—e faatatau ia te Ia. Ua tatu suiulaga ia te Ia. . . E faatatau i Lona silisilise.”

Ua Valaauna i Tatou Uma e Auauna Atu

Ina ua mavae le maliu ma le Toetu o le Faaola, na Ia aoaoina Ona soo mo le 40 aso ona afio ae ai lea i le lag. Na tuua faatasi ma se avanoa i le Korama a le Toasefululua—ona o le faalataina ma le maliu o Iuta le Sekara—na potopoto faatasi sui o le korama ma tatalo i le Alii.

E toluua alii, o Matatia ma Pasapa, na faailoa mai, ma na tatalo Apostetolo ia faaali mai e le Alii “po o ai so laua nei ua e filifilia, . . . ona faasaga ai lea o le vili ia Matatia; ua fai tauina o ia faatasi ma le au apostetolo e toatinoagafulu ma le toatasi” (tagai Galuega 1:23–26).

O lena taimi ma le taimi nei, “o le valaaulia o se Apostetolo e le o se faataunuina o se faamoemoe pe o se mea ua ausia,” na faamatalaina e Elder Renlund. “E le o se valaauga e galue i ai. O Matatia, i le Galuega mataupu 1, na filifilia e le Atua nai lo Pasapa. E lei tauina mai e le Atua pe aisea. Ae o le mea ia tatou iloaina e faapea o le molimau a Pasapa e faamamalu ai le Faaola ma Lona Toetu na tutusa lelei ma le molimau a Matatia.”

Elder Andersen i Pasila



Na filifilia e le Atua, na ia faamatalaina. “Afai e faataunuua e Pasapa soo se valaauga na ia te ia, o lona taui e leai se ese-esega mai lena o le a maua e Matatia, pe afai na te faalauteleina lona valaauga.”

E pei lava ona tutusa le molimau a Pasapa ma le molimau a Matatia, o tagata uma o le Ekalesia e agavaa ma e mafai ona “atiae se sootaga faaapostolo ma le Alii,” na saunoa ai Peresitene Ballard.

O le auaunaga i le Alii ma le Ekalesia “o se avanoa ma o se faamanuiaga. O se faamamaluga,” “E faaali mai e le Alii Lona alofa mo i tatou, ma e mafai ona tatou faaalia lo tatou alofa i le Alii e ala i le faia o soo se mea e finagalo o Ia tatou te faia.”

O Se Aafiaga Paia

O se vaega o se fautua maualuga femalagaai o se aafiaga paia, na saunoa ai Elder Andersen. “Pe a tatou tuu atu se molimau, o lena molimau e oo i le loto o tagata, o se vaega, ona o lo tatou faauuga.”

Na saunoa mai Elder Christofferson faapea i lona uluai taimi i le auaunaga faaapostolo, na ia lagonaina le lofituina e ala i faamoemoe faivavale. Ae ina ua ia maua se savali faatauvaa mai le Alii: “Faagalo oe lava ma mea e ono manatu ai tagata ia te oe, pe latou te fiafia pe le fiafia pe soo se mea lava. Tau lava o le taulai atu i mea Ou te finagalo e tuuina atu ia i latou e ala atu ia te oe. Taulai i mea Ou te finagalo ia i latou e faalogo i ai e ala atu ia oe.”

I ni nai tausaga ua mavae, na asiasi ai Elder Christofferson i Merida, Venesuela, lea na i ai se tamaitiiti, masalo e 7 tau-saga, na iloa mai o ia i se faamalamana ma amata ona ee mai, “*El Apostol, el Apostol!*” (“Le Apostetolo, le Apostetolo!”).

“O se mea faatauvaa lava lena, ae ua faaalia ai ia te au le loloto o le taliaina e oo lava i tamaiti o le valaauga,” na ia saunoa ai. “E le faatatau i le tagata e umia le valaauga. Na aoaoina e lena tamaitiiti lena tulaga o le taliaina mo le valaauga ma le mea o loo ia sui tulaga ai.” ■

E Faapefea Ona Tatou Lagolagoina o Tatou Taitai?

Saunia e Sarah Jane Weaver ma Jason Swensen

Talafo u le Ekalesia

*E ala i le filifili
e lagolagoina
Aposetolo e
Toasefululua, e
faaalia e tagata
o le Ekalesia lo
latou talitonuina
o tautinoga a
Aposetolo taitasi o le
usitusitai i le Faaola.*

Iaso o le faatumulia i loimata i le maea ai o le afisasa o matautia i tuaoi atoa o California's Sonoma County ia Oketopa 2017, na malaga ai Elder Ronald A. Rasband o le Korama a Aposetolo e Toasefululua i nuu na aafia ina ia faatasi ma le Au Paia o Aso e Gata Ai.

Sa i ai o ia i se misiona o le auauanaga. Na la faamafanafanaina ma Sister Melanie Rasband ia tagata lotu na aafia i le afi io latou falelotu ma i autafa o o latou fale ua mu.

Ma soo se mea lava na ia malaga i ai, na o mai lava tagata lotu e faatalofa ia te ia. O se faailoga o le lotofaafetai. Na latou faafetai i le Aposetolo mo lana lagolagosua. Ae o lululima taitasi na faafesootaia se lagona masani faapea: "Ou te lagolagoina oe."

O Se Faatinoga o le Faatuatua

O le lagolagoina o se faatinoga paia lena e fesoottai ai tagata o le Ekalesia ma taitai o le Ekalesia, ua saunoa mai ai Elder Gary E. Stevenson. I le silia ma le 16 miliona tagata o le Ekalesia a Iesu Keriso o le Au Paia o Aso e Gata Ai, e na o ni nai tagata lava o le Ekalesia o le a i ai se taimi e talanoa ai faafesagai ma se Aposetolo pe luluina le aao o se Aposetolo. Ae o tagata taitasi e maua le avanoa e faia ai se fesoottaiga patino ma nei taitai ma isi foi taitai o le Ekalesia e ala i lana palota lagolago aloaia ma faatinoga o le lagolagoina i aso uma, ua saunoa ai Peresitene M. Russell Ballard, le Sui Peresitene o le Korama o le Toasefululua.

"Tatou te lagolagoina i le siiina o o tatou lima ae faapea foi ma o tatou loto ma a tatou faatinoga," le saunoaga a Elder Gerrit W. Gong. "Tatou te lagolagoina taitai o le Ekalesia i le ala lava e tasi tatou te lagolagoina ai le tasi ma le isi. Tatou te iloaina ua noatia i tatou e ala i feagaiga."

O le tatalo mo Aposetolo e tumau pea o se elemene taugata o le lagolagoina, ua saunoa ai Elder Ulisses Soares. "O i tatou o ni tagata masani, ma ua valaaulia i tatou e le Alii i se mea e sili atu i lo tatou gafatia. Ae tatou te lagonaina e mafai ona tatou ausia lena gafatia ona o loo tatalo tagata mo i tatou."

O le faatuatua e muamua atu ma mulimuli i le lagolagoina, ua faaopoopo mai ai Elder Soares. "E ala i le lagolagoina o Aposetolo, o loo e fesoasoani e faataunu le galuega a le Faaola. O lou faatuatua e fesoasoani i le Alii e faataunu mea ua Ia tuuina atu e ala i Ana perofeta ma talifaaaliga."

"Ou te fiafia i le ata o le siilima i le sikuea ma le uiga o loo i tua atu," le saunoa a Elder Jeffrey R. Holland. Mo Aposetolo, o le lagolagoina e tagata o le Ekalesia e tutusa lava le faaleagaga i le mauaina o meaai e maua ai le ola, ua ia faaopoopo ai. "E taua leo uma lava ma o lima fesoasoani uma lava e taliaina. E leai se tasi e auaua atu toatasi i le Ekalesia, po o le a lava lo tatou valaauga."

Elder Rasband i Initia; Elder Stevenson i Hong Kong; Elder Renlund i Pasila; Elder Gong i Shanghai, Saina; Elder Soares i le Iunivesite o Polika laga

O se Faatinoga ua Leva

O le lagolagoina o Aposetolo o se faatinoga o aso e gata ai lea e oo lava i tua i le Toefuataiga o le talalelei a Iesu Keriso. Mai le aso muamua, na valaaulia le Au Paia e malilie i le valaauga o taitai o le Ekalesia ma ia lagolagoina i latou i lena valaauga.

I le aso 6 o Aperila, 1830, sa faapotopoto ai Iosefa Samita ma ana uo faatoa uma ona papatiso i se tamai fale laau i le faatoaga a Pita Uitimera le Matua i Feierte, Seneca County, Niu Ioka.

Na tulai Iosefa Samita ma fesili atu ia i latou na auai pe latou te mananao i le faatulagaina o Le Ekalesia a Iesu Keriso o le Au Paia o Aso e Gata Ai.

I le faaaogaina o le mataupu faavae o le finagalo autasi, na sii e tagata lotu fou o latou lima ma malilie e ala i le palota autasi. Ona sosoo ai lea ma lo latou malilie e taliaina Iosefa Samita ma Oliva Kaotui o o latou faiaoga ma faufautua faaleagaga.

“O le auai i le Ekalesia o se mataupu e patino tele,” le sau-noaga a Elder Holland. “E taua tagata taitoatasi uma lava. O le mafuaaga lena tatou te galulue ai i luga o le mataupu faavae o le maliega autasi. Matou te mananao ia fai manatu o tagata uma, ia faaleo atu ona lava lagona, ma ia lototasi i le agai i luma.”

O se Faatinoga e Siitia ai i Tatou Uma Lava

Pe a taliaina le valaauga i le tofi aposetolo, e uunaia sui o le Korama a Aposetolo e Toasefululua ia mulimuli i le finagalo o le Alii, ua saunoa ai Elder Dale G. Renlund. E ala i le filifili e lagolago le Toasefululua, e faaalia e sui lo latou talitonuina o le tautinoga a Aposetolo taitasi e usiusitai i le Faaola.

O le Au Paia o Aso e Gata Ai e tuuina atu la latou palota lagolago i se Aposetolo lava ia ua faapea lava ona lagolagoina le Korama tuufaatasi, ua saunoa ai Elder Quentin L. Cook.

O lena palota paia e siitia ma faamanuiaina Aposetolo—ae siitia ai foi i latou e lagolagoina, ua faoopopo mai ai Elder Cook. “Na te faamanaina i latou ma faamanuiaina i latou ma tuuina atu ia i latou le taitaiga.”

O lona uiiga e pei lava o tagata lotu na loloto lava le aafia i afi o Santa Rosa ona ofoina atu le lagolagoina o Elder Rasband, e mafai foi ona siitia tagata i le lalolagi e pei lava ona latou siitia sui taitoatasi o le Toasefululua. ■






O La Tatou Talatuu Faifai Pea o Paionia



Ia Iulai o le 1847, na ulufale atu ai le vaega muamua o paionia i le Vanu o Sate Leki i le mavae ai o le savalia o Amerika i Sisifo i le sailia o se nofoaga fou e mafai ai e le Au Paia ona tapuai i le Alii ma saoloto mai sauaga. O le tele o tagata lotu i Amerika i Matu e mafai ona sueina i tua lo latou talatuu i nei tuua paionia. Ae o le tele o tagata o le Ekalesia i le salafa o le lalolagi, na amata lo latou tofi paionia i se isi mea, a le o tuua talu ai o e na auai i le Ekalesia pe atonu o i latou lava ao latou avea ma tagata muamua i lo latou aiga, nuu, po o le atunu na taliaina le talalelei.

O lenei masina, ao tatou faamanatuina lo tatou tupuaga paionia, e mafai ona e fesili ia te oe lava; O fea na amata mai ai lou talatuu o le faatuatua? O a osigataulaga na faia e paionia o lou tupuaga e tuuto ai o latou olaga i le Ekalesia? E mafai faapefear ona ou faamamaluina ma faasoaina atu lo latou talatuu? O le a se mea e mafai ona ou faia e fesoasoani ai i isi ia malamalama ma faamamaluina lo latou lava tupuaga paionia? ■



O SE TALATUU O LE FAATUATUA

"E tatau ona tatou mautinoa o le talatuu o le faatuatua na maua mai [i paionia] e le leiloa lava. la tuu atu i o latou soifugaga lototoa ia pai mai i o tatou loto, aemaise lava loto o o tatou talavou, ina ia susulu malamalama pea le afi o le molimau moni ma le alofa e le maluelue mo le Alii ma Lana Ekalesia i totonu o i tatou taitoatasi e pei ona faia i o tatou paionia faatuatua."

Peresitene M. Russell Ballard, Sui Peresitene o le Korama a Aposetolo e Toasefululua, "Faatuatua i Tulaga Aao Uma," *Liahona*, Ian. 1997, 26.



Mai i le itu agavale i luga:

O se Tamaitai o loo uuina le Tusi a Mamona ma se Ato o Fugalaau, saunia e Jubal Aviles Saenz

Fausia Nei mo le Faavavau, saunia e Sylvia Huege de Serville

Ala Mai, Ala Mai, ma Ofu Ou Ofu Matagofie, saunia e Natalie Ann Hunsaker

O le Asiasiga, saunia e Chu Chu

* Joseph William Billy Johnson: *E Paia i le Alii*, saunia e Emmalee Rose Glauser Powell

Aiga o Loo Faitautusi, saunia e Jose Manuel Valencia Arellano

O Se Malologa i le Ala, saunia e Carmelo Juan Cuyutupa Cannares

O le Fua o le Oioloi, saunia e Nanako Hayashi


Sei vagana ua tusia, o nei ata ma isi mai le Falemataaga o le Talafasolopito o le Ekalesia i le tauvaga o faatu fugaga faavaomalo e mafai ona maua i le initonet i le lds.org/go/71921.*

AOAO ATILI E UIGA I OU PAIONIA

Aoao atili e uiga i le talafasolopito ma paionia o le Ekalesia i lou atunu, asiasi i le history.lds.org/GlobalHistories.







**Saunia e Elder
Patrick Kearon**

O Le Au Pere-
sitene o le Au
Fitugaafulu

O se Mamanu e Sili Atu le Paia o le **AUAUNA ATU**

Ia tatou mulimuli atili i le Keriso soifua, ma le naunautaiga atili, ma le mataalia atili, ao tatou taumafai e avea ma Ona soo moni e ala i le auauna atu e faapei ona Ia faia.

Tna ua 15 pe 16 o'u tausaga, sa ou matuai manatu faapito i o'u lava lagona ma, e pei o le toatele o i tatou i lo tatou talavou, sa le mautonu ma e le faavaea. Sa ou lagona-in a lo'u se, le pulea, ma le faaletonu. Sa lei fesoasoani le nonofo mamao lava o ou matua i Saudi Arabia ao ou i ai i se aoga nofotumau i se vaega mamao ese i le talafatai o Egelani. E tusa ai ma le aoga, atonu o le a sili atu ona faafeiloai ia Hogwarts ma Snape.

Sa masani ona leaga le tau i lena talafatai, ae i se tasi taumalulu sa agi se matagi malosi i le salafa o le Vasa Aialani ma ni matagi malolosi faata'uta'u. Pe tusa ma le 5,000 fale na lolovaia, na faasolo ina leai ni meaai, ma sa tuua tagata ua leai se eletise po o ni mea e faamafanafana ai ma faamalamalama ai o latou fale.

Ina ua amata ona fai ifo le lolovaia, sa auina atu i matou e le aoga e fesoasoani e faamama. Na faateia au i le aafia moni lava i sea ituiga o faalavelave faanatura. Sa vaia ma palapala mea uma. O foliga o tagata sa lolovaia o latou fale sa sesega ma sa paeec. Sa le momoe mo le tele o aso. Sa matou galulue ma tama o le matou aoga, e la'u mea ua matua mamafa i le susu i falealuga ma tautoso kapeta ua faaleagaina.

Ae o le mea na sili ona faateia ai au o le lotogatasi na atiina ae. Sa na o se lagona matagofie, lagona o le agalelei i le va o tagata sa tuufaatasia i se faamoemoe i lalo o tulaga faigata. Sa ou toe manatunatu mulimuli ane o na lagona le mautinoa uma na masani ona faatumulua ai ou mafaufauga talavou sa o ese uma a'o ou auai i lenei taumafai tele e fesoasoani i o matou tuaoi.

O le iloaina ai o le fesoasoani i isi o le vailaau lea i lo'u le fafia, tulaga faavalea ia te au lava ia sa tatau ona suia. Ae e leai, talu ai e lei lava le gotouga ifo o le iloa, ma sa ou toilalo e mafaufaufau atili loloto i le mea sa tupu. Sa oo mai lena malamalama mulimuli ane.



O Le Valaaulia e Auauna Atu

Na ou mafaufau i lenei mea i le taimi o le konafesi aoao o Aperila 2018 ao ou faalogoina le valaaau faifai pea e auauna atu e faapei ona auauna atu le Faaola—ma ia faia ona o le alofa, i le iloaina o i tatou uma o fanau a lo tatou Tama Faalelagi.

O le a tatou auauna atu e le faapea ona ua faitaulia ma fuaina la tatou auaunaga, ae ona tatou te alolofa i lo tatou Tama oi le Lagi ma ua musuia i le taulaiga maualuga ma mamalu atu—fesoasoani ia tatou uo e saili ma tumau i le ala e toe foi atu ai i le aiga ia te Ia. Ua tatou alolofa ma auauna atu i o tatou tuaoi e pei o Iesu pe ana i ai o Ia i lo tatou tulaga, taumafai moni lava ia faaleleia olaga o tagata ma faamama a latou avega. O i o loo i ai le olioli ma aumaia ai le faataunuina tumau, mo le foai atu ma le e talialina, ao tatou faasoaina ia fua o le iloaina ma lagonaina o lo tatou taua e le i'u ma le alofa e faavavau o le Atua mo i tatou taitoatasi.

O se faailoga o le Ekalesia moni ma le ola a le Alii o le a avea pea ma se taumafaiga faatulagaina ma faatonutonuina e auauna atu i fanau taitoatasi a le Atua ma o latou aiga,” na saunoa ai Peresitene Russell M. Nelson. “Ona o Lana Ekalesia lenei, o i tatou o Ana auauna o le auauna atu i le tasi, e pei lava ona sa Ia faia. O le a tatou auauna atu i Lona suafa, i Lona mana ma le pule, ma i Lona agalelei alofa.”¹

Ua ou iloa afai tatou te gauai atu i lenei valaaau e auauna atu, ua mafai ona tatou taulai atu i isi nai lo ia i tatou lava; tuputupu ae i le faatuatua, talitonu mautinoa, ma le fiafia; ma faatoilalo lo tatou manatu ifo ia i tatou lava ma le lagona o le gaogao ii ma le faanoanoa e oo mai ai.

O le Auaunaga e Suia i Tatou

O le matagofie o lenei ituaiga o auaunaga e fesoasoani ai i isi, ae e suia ai foi i tatou e ala i le aveeseina o i tatou mai o tatou popolega, fefe, atutuvalega, ma masalosologa. I le taimi muamua, o le auauna atu i isi sa na ona aveesea ai i tatou mai o tatou lava faafitauli, ae ua vave ona liua i se mea e sili ona maualuga ma sili ona matagofie. E amata ona tatou iloaina le malamalamana le toafilemu, e toetoe lava ina a le iloaina. Tatou te toafimafie, mafanafana, ma le gaoia. Ma tatou te iloaina foi se olioli e leai se isi ala e maua ai.

Sa faamalamalama mai e Peresitene Spencer W. Kimball (1895–1985): “O le ola faateleina i tusitusiga paia o le aofaiga faaleagaga e taunu i ai pe a faateleina la tatou auaunaga i isi ma e ala i le faaaogaina o a tatou taleni i le auaunaga i le Atua ma tagata.” Na ia faaopoopo mai, “O le a avea atili i tatou ma ni tagata taua a o tatou auauna atu i isi—o le mea moni, e sili atu ona faigofie ona tatou “maua” i tatou lava aua foi e tele naua isi vaega o i tatou e tatau ona sailia!”²

O se Valaauga mai le Matai

Ina ua valaauna e le Faaola Peteru, Aneterea, Iakopo, ma Ioane e mulimuli atu ia te Ia, o le taimi foi lea na suia ai lo latou taitaiga ma le taulaiga: “Sa latou tuua loa lava o latou upega ae mulimuli atu ia te ia.” Mataio 4:20).

“Ma sa ia fetalai atu ia te i latou, Ina lafo ia le upega i le itu i matau o le vaa, ona outou maua ai lea. Ona latou lafo lea, a ua le toe mafai e i latou ona toso ae, ona o taumafa o i'a.” (Ioane 21:6).

O se faataitaiga lea e leai se mea o Lona mana faapea na aveesea, ae faapea foi se ata mao'i sa sese le mea sa latou vaavaai i ai ma sa taulai atu i le mea sese. A o latou taumamafa faatas i i'a i le matafaga, sa fesili faatolu le Faaola ia Peteru pe alofa ia te Ia. O taimi taitasi, ma faatasai ai ma se faateleina o le lagona atuatuvala, sa tali atu Peteru e alofa o ia. I le

maea ai o tali taitasi a Peteru, sa fetalai atu ai Iesu ia Peteru e fafaga Ana mamoe. (Tagai i le Ioane 21:15–17.)

Aisea na fesili faatolu ai le Faaola ia Peteru pe alofa ia te Ia? Sa valaaauina Peteru e mulimuli ia Iesu muamua, sa vave ona ia tali atu, ma sa tuua loa lava lana faigafaiva. Ae ina ua aveesea Iesu mai ia i latou, sa tiga Peteru; ua le maumanatu. Sa ia toe foi i le mea e tasi sa ia manatu sa ia iloa—faifaiva. O lea la ua finagalo Iesu ia matuui faalogo lava Peteru ia te Ia ma ia malamalamā i le mamafa o le valaaulia i le taimi lea. Sa Ia manaomia Peteru ia malamalamā i le uiga o le avea o se soo o le Keriso toetu o lea o le a le toe i ai o Ia i la le tino faatasi ma i latou.

O le a le mea na finagalo ai le Alii mai ia Peteru? Sa manao o Ia ia Peteru e fafaga Ana mamoe, Ana tamai mamoe. O le galuega lea sa manaomia ona fai. Sa iloa e Peteru lenei valaaau le gaoia, tuusao mai i lona Matai, ma sa tali atu le Apostetolo sili, ma le lototoa ma le le fefe e tuuina atu aso o totoe o lona ola i le galuega sa valaaui i ai o ia.

Amata i le Tatalo

O loo i ai se tatou Apostetolo sili i le lalolagi i aso nei. O loo tuuina atu e Peresitene Nelson le valaaulia ia te oe ma a'u e fafaga mamoe a Iesu. Faatasi ai ma faalavefau uma o loo vagaia i tatou ma le tele naua o mea iti o loo tapa la tatou gauai, o le luitau o le *tali* atu i lenei valaaulia ma *galulue*—ia faia moni se mea, ia matuui faia se suiga, ma ia ola i se tulaga ua ese.

O lau fesili i le taimi nei e ono faapea, “O fea ou te amata ai?”

Amata i le tatalo. Ua luitauina i tatou e Peresitene Nelson ia, “faateleina lou tomai faaleagaga o i ai nei e maua ai faaaliga faaletagata lava ia.”³ Fesili i lou Tama i le Lagi po o le a se mea e mafai ona e faia, ma mo ai. Tali atu i soo se uunaiga e te mauaina, po o le a lava le itiiti

e ono foliga mai ai. Galue ai. Soo se galuega itiiti lava o le agalelei atu e mafua ai ona tatou mafaufau i isi ma oo mai ai ona lava faamanuia. Atonu o se feau tusitusi agalelei, e lei faamoemoeina i se tasi. Atonu o se fugalaau, ni nai kuki, po se upu alofa. Atonu o le faamamaina o se togalaau po o se fanua, faia o se tagamea, fufuluina o se taavale, sasaina o le vao, aveesea o le sinou, pe na o le faalogo lava.

E pei ona ta'ua e Sister Jean B. Bingham, le Peresitene Aoao o le Aualofa, “O nisi taimi tatou te manatu ai e ao ona tatou faia se mea silisili ma toa e ‘fitaaulia’ ai o se auaunaga i o tatou tuaoi. Ae o ni faatinoga faatauvaa o auaunaga e mafai lava ona i ai ni aafiaga loloto i isi—faapea ai foi ma i tatou lava ia.”⁴



Atonu e te tau musu e faia le la'a muamua, ua e talitonu e leai sou taimi pe e te le mafaia ona faia se eseessega, ae o le a e maofa i se mea e mafai ona fai e sina mea itiiti. Ua faataatia mai e Peresitene Nelson se mamanu e maualuga atu ma sili atu ona paia o le auaunaga mo oe ma au. Pe a tatou tali atu, o le a tatou iloa ai le faamalieloto, saoloto, ma le mafanafana mo i tatou, ma le ala e mafai ai ona avea i tatou o se sui mo le suiga ma le faamafanafana i olaga o isi.

I nisi taimi, e pei o le faamaeaina o se misiona, atonu e faaosoosoina i tatou e fai atu, "Ia, ua uma ona ou faia. Tuu atu i se isi e auauna atu. Ou te manao i se malologa." Ae o le auaunaga moni e le malolo. O se ala o le olaga. E mafai ona tatou faia ni malologa mai gaoioiga masani ma aso malolo ma toe faafouina ai, ae o la tatou tiutetauave faalefeagaiga e alofa i le tasi ma le isi e pei ona Ia alofa mai ia i tatou ma ia fafaga Ana mamoe e leai se malologa.

O Le Auaunaga a le Ekalesia i le Lalolagi Atoa

Ou te mitamita lava i le auai i se Ekalesia e faatinoina le auaunaga. I le 2017 lava ia, e silia ma le 7 miliona itula ofofua atu e tagata lotu i le foai atu

mo le totolina, seleseleina, ma le faasoasoaina o meaai i e matativa ma le tagolima. Na saunia e le Ekalesia vai mama mo le afa miliona ma nofofaataavalevale mo le 49,000 tagata i atunu e 41. Na saunia e volenitia ni vaiga ma auaunaga mo mata, ma na latou aoaoina tagata e tausia e 97,000 mo i latou e i ai luitau i le vaiga i atunu e 40. E tolusefulu-tolu afe tagata e tausia sa aoaoina i le tausiga o tina ma pepe fou i atunu e 38. Ae le taua ai Lima Fesoasoani, i tausaga talu ai, e faitau selau o afe o tatou tagata na foai atua le faitau miliona o itula. O tagata o le Ekalesia a Iesu Keriso e feosofi vave lava e fesoasoani ia i latou na aafia i faalavelave tetele ma laiti, e faapena foi ona latou faaleleia o latou tuaoi ma nuu.

O le galuega taimua folafolaina a le Ekalesia o le JustServe, lea e lisiina ai avanoa auauna atu, ua i ai le silia ma le 350,000 volenitia ua lesitalaina, o e na foai atua le faitau miliona o itula e fesoasoani ai i o latou nuu i le lotoifale.⁵

O le Ekalesia lenei o faatinoga. O le mea lenei matou te faia. O le mea lenei tou te faia. Ia avea lenei mea ma se uiga iloga o lou lava tagata.

Ituaiga e Tolu o Auaunaga

Ou te fia faamamafa atu ituaiga e tolu o auaunaga lautele e tofu maua e i tatou le avanoa e punouai ai.

1. O le auaunaga e tofia tatou i ai pe valaaulia e faatino o se tiutetauave i le lotu. O le a tatou taumafai mo le ituaiga o auaunaga e faatauaina, ae le fuaina, lea tatou te mafaufau e uiga i ai, tatalo mo, ma fesoasoani ia i latou ua tuuina mai le tiutetauave tatou te vaaia.

2. O le auaunaga tatou te filifili e faia i la tatou lava filifiliga. O se faalautelega lea o le muamua, lea o le a tafe atu ia tatou faatinoga i aso taitasi ma fegalegaleiga a o tatou saili atili ma le loto e faagalo i tatou lava ae vaavaai atu i talaatu i isi. E leai se tofiga aloaia, ae e faaosofia i tatou e se manao e mulimuli ia Keriso, e amata i le sili





atu le agalelei ma le manatu ia i latou o vagaia i tatou.

3. Auaunaga Lautele. O mea e talafeagai ai, faaaofia ai oe lava i tulaga faaupufai ma se faa-moemoe e auauna atu ma fausia tagata taitoatasi ma nuu. Aloese mai fevaevacaiga faaupufai ia e oo ina fai faamalosi ma faatuiiese, ma faataumaoia ai nuu, atunu, ma konetineta. Auai faatasi ma isi au faipolotiki o e o sue se faamoemoega lelei e aumaia ai le faamalologa i olaga ua mafatia i o latou lava loto ma talaatu. E mafai ona avea oe ma leo o le faapalenina ma le faaftautaga, lagolagoina le le faaituau i tulimanu uma o le sosaiete. E i ai se manaoga tuputupu ae mo oe e tuuina atu ai lou malosi i lenei ituaiga gaoioiga faitele.

E Mafai Ona Tatou Suia lo Tatou Lava Lalolagi

Pe a tatou faitauina talafou, atonu tatou te manatu ua faateleina le leaga o le lalolagi. Afai tatou te taitasi ma galulue i ala tetele ma laiti i aso taitasi, e mafai ona tatou suia lo tatou lava lalolagi ma i latou o siomia i tatou. A o e auauna atu i lou tuaoi ma auauna atu *faatasi* ma lou tuaoi i lou nuu, o le a avea oulua o se uo e fefaaasoai o oulua manao e fesoasoani atu. O le a avea na ma faauooga malolosi, e fauina sootaga o aganuu ma talitonuga.

Afai o le a outou tali atu i le valaaulia e auauna atu e pei ona faia e Iesu, o le a outou liua, avea

atili ma e le manatu faapito. O le a outou mauaina le olioli lea e sau mai le auauna atu i le ala a le Faaola, tuua o outou popolega ma le mautonu ma faanoanoaga lea e sau mai ou manatu le atoatoa.

Atonu, e oo mai i le mafaufau se igoa po o se mafuaaga. E foliga mai o se valaaulia lea mai le Agaga, ma atonu na e mauaina muamua. Aapa atu, vaavaai atu, ma siitia i luga. Ia filifili e tali atu i lenei valaaulia, ma tatalo i le aso ia iloa mea e mafai ona e faia. Pe a e vaai ma lagona ia faamanuiaga e aumaia e lenei mea ia te oe ma i latou e te auauna atu i ai, o le a e manao ia avea o se mamanu i aso taitasi.

O la tatou taumafaiga aupito mauluga ma aupito sili o le faaso atu o le malamalama, faamoemoe, olioli ma le faamoemoega o le talalelei a Iesu Keriso i fanau uma a le Atua ma fesoasoani ia i latou ia maua le ala i le aiga. O le fesoasoani atu, auauna atu, ma le auaunaga ia i latou o faaaliga ia o le talalelei i lona faatinoga. A o tatou faia lea mea o se ala o le olaga, o le a tatou iloa ai e tulagaese le faamalieina, ma o le ala lea e mafai ai ona tatou maua le filemu ma le olioli atonu tatou te lei mauaina muamua.

O le ala lea sa soifua ai le Faaola, ma o le mafuaaga lea sa Ia soifua ai—ia aumaia le pulupasama atoatoa ma le faamalologa sili e ala i Lana meaalofa togiola sili, e le i'u, mo oe ma a'u. Ia tatou mulimuli atili i le Keriso soifua, ma le naunautaiga atili, ma le mataalia atili, ao tatou taumafai e avea ma Ona soo moni e ala i le auauna atu e faapei ona Ia faia. ■

Mai se faigalotu i le lalolagi atoa mo talavou matutua, "A Hallmark of the Lord's True and Living Church," na tuuina atu i le Iunivesite o Polika Iaga-Idaho i le aso 6 o Me, 2018.

FAAMATALAGA

1. Russell M. Nelson, "Auauna Atu i le Mana ma le Pule a le Atua," *Liahona*, Me 2018, 69.
2. Spencer W. Kimball, "O Maua Atili O Le Ola," *Liahona*, Juni 1979, 3.
3. Russell M. Nelson, "Faaaliga mo le Ekalesia, Faaliga mo o Tatou Olaga," *Liahona*, Me 2018, 95.
4. Jean B. Bingham, "Auauna Atu e pei ona Faia e le Faaola," *Liahona*, Me 2018, 104.
5. Tagai i le JustServe.org. E maua i Amerika i Matu ma ua faamaonia i Mekisiklo, le United Kingdom, Puerto Rico, ma Ausetalia.





Mataupu 1

Faapotopoto Mai se Kamupani

Tusi a le Faatonu: O se upusii lenei o le mataupu 1 mai le Au Paia, Leai se Lima Eleelea, voluma 2 i le faasologa o tusi o le Au Paia . Voluma 1, O Le Tagāvai o le Upumoni, safaalauiloa atu i le tausaga ua te'a, o loo faamaeaina i uluai tagata o le Au Paia o Aso e Gata Ai na mauaina o latou faaeega paia i le Malumalu o Navu ma saunia e tuua Navu ma malaga atu i sisifo.

Faitau afe le Au Paia o Aso e Gata Ai na fifilemu a o lagona atu le leo o Lusi Maki Samita i le faletele o potopotoga i le fogafale muamua o le malumalu i Navu toeitiiti lava a mae'a le fausiaina.

O le taeao lea o le aso 8 o Oketopa, 1845, o le aso lona tolu ma o le aso mulimuli foi lea o le konafesi o le tautoulu a Le Ekalesia a Iesu Keriso o le Au Paia o Aso e Gata Ai. I le iloaina ai o le a ia le toe mauaina se tele o nisi avanoa e lauga atu ai i le Au Paia—aemaise o lea ua latou fuafua nei e tuua Navu mo se aiga fou i se mea mamao i sisifo—sa lauga atu Lusi ma se mana sili atu ma lona tino auvaivai ua fitusefulu tausaga le matua.

“Ua sefuluvalu tausaga talu ai i le aso lua sefululua o Setema sa aveese ai e Iosefa papatusi mai le palapala,” sa ia molimau ai, “ma o Iosefa Samita, le perofeta a le Alii, ua sefuluvalu nei tausaga i le Aso Gafua ua te'a talu ona—”¹

Sa tu o ia, ma manatua Iosefa, lana tama na maliu faamatu. Sa iloa lava e le Au Paia na i totonusi o le potu le auala na taitai atu ai e se agelu a le Alii o ia i se seti o papatusi auro na tanumia i se mauga na ta'ua o Kumora. Na latou iloa sa faaliliuina e Iosefa papatusi e ala i le meaalofa ma le mana o le Atua ma lolomiina le faamaumauga o le Tusi a Mamona. Ae e toafia ni tagata o le Au Paia na i ai i le faletele o potopotoga na iloa moni o ia?

Sa mafai ona manatua pea e Lusi le taimi na muai ta'u atu ai e Iosefa ia te ia, ina ua luasefulu tasi ona tausaga i lena taimi, ua faatuatuaaina e le Atua o ia i papatusi. Sa popolevale o ia i le taeao atoa, sa fefe ne'i toefoi ane o ia mai le mauga e leai se mea, e pei ona tupu i le fa tausaga na muamua atu. Ae ina ua ia taunu ane, sa vave lava ona ia faatoofilemuina [le] popole [o Lusi]. “Aua e te popole,” sa ia fai atu ai. “Ua lelei mea uma.” Ona ia tuu atu lea ia te ia o mea faaliliu na tuuina mai e le Alii mo le faaliliuga o papatusi, sa afifi i se solosolo, e fai ma faamaoniga ua faamanuaina o ia i le mauaina o faamaumauga.



Sa toalaiti lava nisi sa talitonu i lena taimi, o le toatele lava o i latou o tagata o le aiga o Samita. O le taimi lea ua silia ma le sefulusasi afe le Au Paia mai Amerika i Matu ma Europa sa nonofo i Navu, Ilinoi, lea sa potopoto i ai le Ekalesia mo le ono tausaga talu ai. O nisi o i latou sa fou i le Ekalesia ma sa le'i maua se avanoa e feiloai ai ma Iosefa po o lona uso o Ailama a o le'i tafanaina e se vaega leaga ma fasiotia ai alii nei e toalua ia Iuni 1844.² O le mafuaaga lena na manao ai Lusi e lauga e uiga i ē ua maliliu. Sa manao o ia e molimau atu i le valaauga faaperofeta o Iosefa ma le matafaioi a lona aiga i le Toefuataiga o le talalelei a o le'i malaga ese atu le Au Paia.

Mo le silia ma le masina, sa susunu ai e vaega faatupu faalavelave fale ma pisinisi a le Au Paia i nofoaga lata ane sa nonofo ai. O le popole mo o latou ola, e toatele aiga sa sosola ese atu i le tulaga saogalemu o Navu. Ae sa faatoateleina le malolosi o vaega leaga ma faatulagaina atili a o gasolo pea vaiaso, ma sa le'i pine ae faia fetaua'iga i le va o i latou ma le Au Paia. O le taimi lea, sa leai ma se mea na faia e le setete ma le faigamalo o le atunuu e puipuia ai aiā tatau o le Au Paia.³

I le talitonu i ai sa na o sina taimi ititi lava ae osofaia loa e vaega leaga Navu, ae sa faia e taitai o le Ekalesia se feutagaiga mo se filemu i ni tuutuuga maaileale i le malilie lea e o ese mai le Au Paia mai le itumalo a o le'i oo i le tautotogo.

I le taiialaina ai i faaaliga faaelagi, sa fuafua ai e Polika Iaga ma isi uso o le Korama a Apostolo e Toasefululua ia aveese atu le Au Paia ia sili atu ma le afe maila i sisifo, i tala atu o Mauga Papa (Rocky Mountains), i fafo atu o le tuaoi o le Iunaite Setete. I le avea ai ma korama pule faamalumalu o le Ekalesia, sa faasilasila mai ai e le Toasefululua lenei faaiuga i le Au Paia i le aso muamua o le konafesi o le tautoulu.

“Ua mamanuina e le Alii e taitai ese atu i tatou i se laufanua lautele atu o faatinoga,” sa folafola atu ai e le apostolo o Pale Palate, “i le mea e mafai ona tatou olioli ai i mataupu faavae mama o le saolotoga ma aia tutusa.”⁵

Sa iloa e Lusi o le a fesoasoani atu le Au Paia ia te ia i lenei faigamalaga pe afai na te filifili e alu. Na poloaiina e faaaliga

le Au Paia ia potopoto faatasi i le nofoaga e tasi, ma sa nau-nau le Toasefululua e faatino le finagalo o le Alii. Ae sa olo-matua Lusi ma talitonu o le a le toe umi lona soifua. Ina ua maliu o ia, sa ia manao ina ia tanu i Navu e latalata ia Iosefa, Ailama, ma isi tagata o le aiga o ē ua maliliu, e aofia ai lana tane, o Iosefa Samita le Matua.

Ma le isi, o le toatele o lona aiga sa soifua pea na nonofo i Navu. Sa na o lana tama e toatasi na totoe, o Vilamu, sa avea ma se uso o le Korama a le Toasefululua, ae sa ia teenaina le latou taitaiga ma musu ai e alu i sisifo. O lana fanau teine e toatolu—Sofarania, Kataraina, ma Lusi—sa nonofo foi. Sa faapena foi lana tama teine faaletulafono o Ema, le faletua o le perofeta ua maliu.

A o saunoa atu Lusi i le faapotopotoga, sa ia uunaia i latou na faalogologo ia le popole i le malaga o i luma atu. “Aua ne'i tou lotovaivai ma faapea e le mafai ona outou maua ni taavale toso ma ni mea,” sa ia saunoa ai. E ui i le mativa ma sauaga, ua faataunuina e lona lava aiga le poloaiga a le Alii ia lolomi le Tusi a Mamona. Sa ia uunaia i latou ia faalogo i o latou taitai ma taulima le tasi ma le isi i le agalelei.

“E pei ona saunoa Polika, e tatau ona outou faamaoni uma a leai tou te le oo iina,” sa ia saunoa atu ai. “Afai tou te lagona le ita, o le a i ai faafitauli ia te outou.”

Sa talanoa tele atu Lusi e uiga i lona aiga, o sauaga matautia na latou mafatia ai i Misuri ma Ilinoi, atoa ma tofotofoga o loo taoto mai luma atu mo le Au Paia. “Ou te tatalo ia faamanuia e le Alii faauluuluga o le Ekalesia, Tuagane Polika ma taitai uma,” sa ia saunoa ai. “A ou alu atu i se isi lalolagi, ou te fia feiloai ia te outou uma.”⁶

Ia Ianuari 1846, sa fono soo ai Polika ma le Korama a le Toasefululua ma le Aufono a le Toalimagafulu, o se faalapotopotoga na vaavaia ia atugaluga faaletino o le malo o le Atua i le lalolagi, e fuafua ai le auala sili ona lelei ma sili ona vave e aveese ai tagata mai Navu ma faatu se nofoaga fou e potopoto i ai le Au Paia. O Heber Kimball, o se uso a apostolo, sa fautua mai latou te taitaia se kamupani po o se vaega toalaiti o le Au Paia i sisifo i le vave e mafai ai.



“Faapotopoto mai se kamupani e mafai ona saunia i latou lava,” sa ia fautua atu ai, “ia saunia i soo se taimi pe a valaauina e o atu i luma ma saunia se nofoaga mo o latou aiga ma ē matitiva.”

“Afai o i ai se vaega lelei tele e o atu ma toto laau i lenei tau-totogo,” sa faailoa atu ai e aposetolo Osona Palate, “o le a talafeagai pe a amata i le aso muamua o Fepuari.” Sa ia tomanatu pe o le a atamai atu le faamautu i soo se mea e latalata ane, lea o le a mafai ai ona latou vave totoina ni laau.

Sa le’i fiafia Polika i lena manatu. Ua uma ona faatonuina e le Alii le Au Paia ia faato’ā se nofoaga e latalata i le Vaituloto



I le sailiga o se toomaga mai sauaga, na mulimuli ai Polika Iaga (luga a'e) ma le Korama a Aposetolo e Toasefululua i le faatonuga a le Alii ia aveese atu le Au Paia o Aso e Gata Ai ia silia ma le 1,000 maila (1,600 km) i sisifo, i tala atu o Atumauga Papa.

Tele o Sate Leki. O le vaituloto o se vaega o le Faatanoavai Tele, o se laufanua telē faataali’oli’o e si’omia e atumauga. O le telē o le faatanoavai o se eleele toafa matutu ma o se luitau le toto ai o ni mea toto, sa mafua ai ona toatele tagata Amerika e le fia malaga ai i sisifo.

“Afai tatou te o i va o mauga i le nofoaga e le fia manatu i ai se tasi,” sa faasoa atu ai Polika, “o le a leai se lotoleaga mai soo se malo.” Sa malamalama Polika o lea laufanua sa ‘ainā muamua e tagata Amerika mao’i. Ae sa ia faamoeemoe o le a mafai e le Au Paia ona nonofo ai i latou lava ma le filemu.⁷ ■

Ina ia faiatou le vaega atoa o le mataupu, faamolemole asiasi i le aupuaa.churchofjesuschrist.org po o le lomiga faaeletonika o lenei tusiga i le lomiga o Iulai o le Liahona i le Gospel Library po o le liahona.lds.org.

O le upu Autu i faamatalaga ua faaalia ai faamatalaga faaopoopo i le aupuaa.churchofjesuschrist.org.

FAAMATALAGA

1. Historian’s Office, General Church Minutes, Oct. 8, 1845; “Conference Minutes,” *Times and Seasons*, Nov. 1, 1845, 6:1013–14. O se lipoti atoa o le lauga a Lusi i le konafesi ia Oketopa 1845, faatasi ma faamatalaga faaopoopo, o loo maua i le Reeder and Holbrook, *At the Pulpit*, 21–26. **Autu:** Lusi Maki Samita
2. Lusi Maki Samita, Talafaasolopito, 1844–45, tusi 5, [7]; *Au Paia*, volume 1, mataupu 4 ma le 44; Uliuli, “O Le A le Toatele o le Faitau Aofai o Tagata o Navu?” 92–93. **Autu:** Maliusfasia o Iosefa ma Ailama Samita
3. Tusi a Solomon Hancock ma Alanson Ripley ia Polika Iaga, Sete. 11, 1845, Faila o le Ofisa o Polika Iaga, CHL; “Mobbing Again in Hancock!” ma le “Proclamation,” *Nauvoo Neighbor*, Sept. 10, 1845, [2]; Gates, Journal, volume 2, Sept. 13, 1845; Glines, Reminiscences and Diary, Sept. 12, 1845; “The Crisis,” ma le “The War,” *Warsaw Signal*, Sept. 17, 1845, [2]; “The Mormon War,” *American Penny Magazine*, Oct. 11, 1845, 570–71; Tusi a Jacob B. Backenstos ia Polika Iaga, Sete. 18, 1845, Faila o le Ofisa o Polika Iaga, CHL; Tusi a Orson Spencer ia Thomas Ford, Oke. 23, 1845; Tusi a Thomas Ford ia George Miller, Oke. 30, 1845, Brigham Young History Documents, CHL; tagai foi i le Leonard, *Nauvoo*, 525–42.
4. *To the Anti-Mormon Citizens of Hancock and Surrounding Counties* (Warsaw, IL: Oct. 4, 1845), Chicago Historical Society, Collection of Manuscripts about Mormons, CHL; tagai foi i le Leonard, *Nauvoo*, 536–42.
5. Council of Fifty, “Record,” Sept. 9, 1845, i le *JSP*, CFM:471–72; “Conference Minutes,” *Times and Seasons*, Nov. 1, 1845, 6:1008–11.
6. Mataupu Faavae ma Feagaiga 29:8 (Faaaliga, Sete. 1830–A, i le josephsmithpapers.org); Mataupu Faavae ma Feagaiga 125:2 (Faaaliga, circa Early Mar. 1841, i le josephsmithpapers.org); Historian’s Office, General Church Minutes, Oct. 8, 1845; “Conference Minutes,” *Times and Seasons*, Nov. 1, 1845, 6:1013–14.
7. Council of Fifty, “Record,” Jan. 11, 1846, in *JSP*, CFM:514, 515, 518. **Autu:** Aufono a le Toalimagafulu

O Se Folafolaga i se Tamaitiiti

ni nai tausaga talu ai, sa ou matuai lotovaivai ai lava. Na pau le mea na ou maua ai sina uunaiga itiiti o lau uo sili ma lana fanau. Matou te o mo ni savalivaliga i faaiuga o vaiaso, lea na ou olioli ai. I le aluga o taimi sa amata ona faaitiitia lo matou o i savalivaliga. Sa amata ona ou misia lau uo ma lona aiga. Na ou iloaina mulimuli ane faapea o a matou savalivaliga na amata ona faaitiitia ona o lau uo ma lona aiga ua toe amataina se masani sa latou taofia i le tele o tausaga talu ai—auai i le lotu.

I se tasi aso na latou valaaulia ai au i le aiga o le aoauli. O le toe vaai ia i latou na ou lagona ai le fafia tele. Na ou tau atu ia i latou le tele o lou misia o i latou. Na fautua mai le tama teine e ono-tausaga a lau uo e mafai ona matou foia lena faafitauli e ala i le o faatasi i le lotu. O lea, e aunoa ma le toe mafau-fau, na ia valaaulia ai au e sau.

Auoi, leai! E faapefea ona ou faia lenei aiga ia malamalama o le alu i le lotu na sao mo i latou ae

matuai le manaia lava mo au? Ua tele tausaga ou te le o toe alu i le lotu, ae e faapefea ona ou fai atu leai i se tamaitiiti? Na ou fai atu o le a ou alu, ae o le mea moni lava ou te lei mafaufau lava e tausia lena folafolaga.

I lena Aso Sa, sa ou alu ai e inuti i le taeao ma lou tama. Na faaauau ona tatagi lau telefoni feaveai, na faamanatu mai ai ia te au sa ou folafola atu i se teineitiiti laitiiti o le a ou alu i le lotu faatasi ma ia. Sa ou le amanaaina lau telefoni feaveai seia oo ina fesili mai lou tama ia te au pe aisea ou te le taliina ai. Sa ou tau atu sa valaaulia au e alu i se sauniga lotu ae ou te lei manao e alu. Na ia ataata ma fai mai, “Lluvia, aua lava e te faia se folafolaga i se tamaitiiti

pe afai e te le naunau e faataunu.” Na ou filifili e tausia lau folafolaga.

Ina ua ou taunu atu i le lotu, na ou lagonaina se mea e ese, se mea e le mafai ona ou faamatalaina. Ou te le mafai lava ona faamatalaina pe na faapefea ona tupu, ae o le aso Sa na sosoo ai, na ou toe i ai foi iina, ma le isi aso ma le isi aso, seia oo lava ina ou malamalama i le mea na ou lagonaina: o le Agaga Paia.


Na amata ona faia e tagata o le Eklesia au e pei o loo ou i ai i le aiga. E aunoa ma se masalosalo, sa ou fia iloa e uiga i le Eklesia. Sa amata ona matou feiloai ma faifeautalai, ma sa amata foi ona ou maua se molimau. Na amata ona faifai soo asiasiga a faifeautalai, ma na faatupuina lou malamalama i le talalelei seia oo ina

ou lagonaina se manao malosi ia papatisoina. Na papatisoina au i se taimi vave lava mulimuli ane, ma o lenei ua ou olioli i faamanuiaga o le talalelei. Ona o lenei mea, ou te matuai faafe-tai lava na ou tausia lau folafolaga i se teineitiiti e ono-tausaga le matua. ■

**Lluvia Paredes Cabrera,
Yucatán, Mekisiko**

*N*a faaauau ona tatagi lau telefoni feaveai, na faamanatu mai ai ia te au sa ou folafola atu i se teineitiiti laitiiti o le a ou alu i le lotu faatasi ma ia.





Ae ou te lei tuua mo le falemai, na fai mai se uo i le galuega, "Talu ai o loo tatou latalata lava i le maota o le Alii, aisea tatou te le tatalo faatasi ai muamua?"

Sei Tatou Tatalo i Tafatafa o le Malumalu

Ina ua tolu tausaga o la ma atalii o Marco, na ma mafatia i se faafitauli o meaai oona. Na matuai mai lava Marco ma na ia matapogia ai. Na ma faatope-tope atu o ia i le falemai ma lau ava, o Marianela. E oo atu i le taimi na matou taunuu ai, sa foliga mai ua oti o ia. Mulimuli lava, i le mavae ai pe a ma le fa itula, na ia toe ala ai.

Mai i lena taimi, na aafia ai Marco i ni mailili mai i lea taimi i lea taimi mo le isi lima tausaga. Pe a ma tuu atu o ia i le moega i aifiati taitasi, ma te mafaupe pe afai e oo i le tuneva o le po, pe o le a ma toe faavavevave atua o ia i le falemai. Sa faigata ona ma maua se moe i na vaitausaga faigata, ae na ma faalagolago i le tatalo, faatuatua, anapogi, ma faamanu-iaga o le perisitua.

Ina ua pe a ma le ono tausaga o Marco, na valaau mai ai Marianela ia te au i le galuega ma tau mai ia te au e faatopetope atu i le falemai. Na oso le mailili o Marco ma ma ua i ai nei o ia i se koma. Ina ua valaau mai o ia, sa ou

galue i le faafouina o le Fale Autu mo le Aoaoina o Faifeautalai o Atenitina, e sosoo ma le Malumalu o Buenos Aires, Atenitina.

Ae ou te lei tuua mo le falemai, na fai mai se uo i le galuega, "Talu ai o loo tatou latalata lava i le maota o le Alii, aisea tatou te le tatalo faatasi ai muamua?" Sa tapunia le malumalu mo le faafouina ma le toe faateleina, ae na matou agai atu i le maota o le Alii, lea na ou tatalo ai mo Marco.

E ui lava i mea uma na matou oo i ai e ala atu ia Marco, na ou lagonaina le faafetai i le Atua mo le taimi na mafai ona ma maua ma Marianela e faatasi ai ma ia. Ao ou tatalo, na ou tau atu i le Tama Faalelagi na ma taumafai ia avea ma ni matua lelei ma tausia lelei Marco i le mea sili na ma mafai. Na ou tau atu foi ia te Ia o le a ma taliaina Lona finagalo pe afai Na te valaauiwa Marco e foi atu i le aiga.

Ina ua ou taunuu i le falemai, ou te lei iloaina pe toe te'i mai Marco i le koma pe, afai ae te'i mai o ia, pe o le a

mafai ona toe savali pe tautala foi. Ina ua mavae ni itula faigata tele se lua, na ia ala mai. Sa vaivai o ia, ae na lelei lava o ia. Mai i lena taimi, na faavavega lava, ona ia faasolo manuia. Na iu lava, ina aveese Marco mai ana vailaau ma tea i tua ua malosi mai le falemai.

Ma te toe tepa i tua ma Marianela i lena taimi faigata ma le agaga faafetai o loo i ai pea Marco ia i maua ma faafetai mo mea na ma aoaoina. O la ma tofotofoga na faalototasi ai i maua ma faamalosia ai i maua faaleagaga. E aunoa ma lena mea, semanu ma te le iloaina le tele o auala e faaalia ai e le Alii Lona aao i o ma olaga.

E pei ona fai mai ai Marianela, "Na ma vaia se mauga o faamaoniga ma aafiaga na tuuina mai ia i maua se molimau o le auai o le Atua, o loo i ai o Ia ia i tatou ma e faafotofoga mai o Ia ia i tatou." Afai tatou te tumau ma maua le onosai, e mafai ona oo mai faamanuiaga i le taimi tatou te lei faamoeomoeina ai. ■

Juan Beltrame, Buenos Aires, Atenitina

Aisea Na Le Lapataiina Ai Au E Le Atua?

Sa ma nonofo ma lau tane i fale o le aoga i le Texas State Technical Institute ao fa ma le lua tausaga o le ma fanau matutua. O le ma taimi muamua lea i le atunu mauga o Texas, ma sa ou fiafia i ai! O taimi uma lava o le tautogo, e faatumulia ai Texas tutotonu i fugalaau. I togalaau, togavao, laufanua valevalenoa, i autafa o auala, soo se mea lava ou te vaai i ai e i ai lava le tele o fugalaau e vaai i ai.

Oute aveina lau fanau e tietie i le taavale pepe e toeitiiti lava o aso uma. Matou te mauaina lava ni nofoaga fou e matamata ai, ma ou te tuuina i tamaiti e tauina mai le tele o fugalaau vao la te mananao ai. Faatoa uma le matou tietiega i le tuaoi lea e tele ai fale ma togalaau e matagofie le teuina.

I se tasi aso na matou oo mai ai i se pioga ma maua ai se faaputuga pepa ua salalau solo i se tasi o togalaau teufale. Na vave lava ona faasalalau e le matagi

pepa i le fanua atoa lava. Na ou filifili e faamama le lapisi ae lei faateleina le salalau. Na ou aoina mai i ou lima ua tutumu i pepa ma momono i lau ato napekini.

A o ou tilotilo atu i lalo, sa ou iloaina ai sa ou uuina ni ata mataga. I le faateia tele, na ou tau atu i lau fanau ia nonofo i le taavale pepe ao ou ao faatopetopeina mai pepa o totoe. Na ou le fiafia ao ou vaai atu i ni ata o mea ou te lei manao lava e vaai i ai. I lou loto, na amata ona ou faitio, "Aisea e lei lapataiina ai au e le Atua e ui i le isi ala i le fale?"

Ona ou faalogoina lea o le ii e le mafai ona sese o taofi o le pasi aoga. Pe a ma se tasene o tamaiti na feosofi ese mai le pasi. Na latou ui uma atu lava i le fanua lea na faatumulia i ata mataga i ni nai minute talu ai.

I lena lava taimi, sa suia atoa ai lou manatu. Ua ou iloa nei pe aisea e lei

lapataia ai au e ui i le isi ala. Sa ou faafe-tai na ou i ai iina e ao mai nei itulau ina ia faasao ai na tamaiti mai le vaai i na ata mataga. Ao ou agai atu i le fale, na ou mafaufau, "Ae faapefea pe ana tuai mai le pasi aoga? Ae faapefea pe ana ou le iloaina lava pe aisea na ou oo ai i lena mea? O le a le umi semanu o le a ou ita i le Atua?"

Talu mai lena aso, o le avanoa na tuuina mai e le Alii ia te au e vaai ai i le "aisea" o lena aafiaga na fesoasoani ia te au e talitonuina ai Lona atamai ma faamoemoega e sili atu nai lo au.

O nisi taimi o le a ou iloaina pe aisea na tupu ai se mea; o isi taimi o le a ou le iloaina ai. Ae po o le a lava, ou te iloa e tatau ona i ai lou faatuatua faapea o loo i le Alii se faamoemoega e tele atu lena e le mafai ona ou vaaia i taimi uma lava. ■

Lark Montgomery, Texas, ISA

Na vave lava ona faasalalau e le matagi pepa i le fanua atoa lava. Na ou filifili e faamama le lapisi ae lei faateleina le salalau.



Pe a Tiga Tele le Piimau

I se tasi aso vevela lava o Iulai, na ou fesoasoani ai i lou uso-faaletulafono e fausia se pa puipui. O lenei galuega na iu ina ou tauivi ai ma ni aa o se vine o loo fua [cherry] na faalavelave i le auala.

"Faigofie," o lou mafaufau lea.

Na ou ao mai meafaigaluega talafeagai ma eli faataamilo i aa ia maua ai se avanoa e galue ai. Ona ou uu mai lea o se ili ma, e aunoa ma se isi manatu, ma amata loa ona tatipi aa. Na faigofie ona tatipi aa laiti, ae ina ua ou see atu i aa lapopoa, na vave lava ona ou iloaina na le tutusa le faigofie. E tasi le aa na faapitoa lava le faigata.

Na u ou nifo, ua ou saunia e tipi lena aa. Na tafe ifo le afu i lalo o lou ua mai le la aasa i luga ae o lou ulu ao ou oomiina mau le ili. Na tete le ili seia oo ina tetete lou tino atoa. Na mafai ona ou lagonaina lou lima taumatau—lea o loo oomiina le ki o le ili—ua amata

ona mu i le tiga. Na ou le amanaiaina le tiga ma faaaaua ona piimau.

Na iu lava, ina tipi e le ili le aa. Na ou faamamuluina le ki ma lagonaina le fifia matagofie o le manumalo. E ui i lea, ao ou aveeseina lau totinilima, na ou iloaina se tamai vaega o le pau ua mafoe mai lou lima.

A o ou mafaufau e uiga i lenei aafiaga, sa ou iloa ai o lo'u piimau i le ili na, i se ala, na pei ai o le piimau i le ai uamea. Ua tau mai ia i tatou ia piimau i le ai uamea ao tatou i ai i le olaga. E le faapea o lo tatou piimau i ai o le a tatou le aafia ai i ni taimi o le tiga. Na manua lou lima ao ou piimau i le ili. I se ala faapena, o le a tatou ui atu ai i tofotofoga ma faigata ao tatou faaaaua ona piimau i le ai uamea.

Na silafia e le Tama Faalelagi o le malaga e toe foi atu ai ia te Ia o le a tumu i faigata. O le mafuaaga lena ua Ia tuuina mai ai tusitusiga paia ma

upu a perofeta e fesoasoani ia i tatou. Ao tatou piimau i nei mea e ala i a tatou tofotofoga ma faigata i le olaga faitino, o le a tatou toe foi atu i Lona afioaga i se aso.

Pe a tatou toe foi atu ia te Ia, o le a mafai ona tatou tilotilo i lalo i o tatou lima, ia na piimau i le ai uamea, o nisi taimi e ui lava i le tiga po o faigata. Ma o le a tatou iloa ai o le fesoasoani a le Tama Faalelagi ma e ala mai i le mana togiola a Iesu Keriso, na tatou piimau ai, e ui lava i faigata na tatou oo i ai. ■

Jeff Borders, Uosigitone, ISA



Laasaga e Ono e Maua ai se Galuega


Saunia e Bruno Vassel III

E le mafai ona tatou ola tutoatasi faaletino pe afai
tatou te manaomia se galuega ae leai se galuega.
O laasaga nei e ono e maua ai se galuega.

Ete manaomia se galuega po o se galuega e sili atu? E te iloaina se tasi o loo manaomia? O le luitau i le aso mo le tele o tagata ua matuai manaomia lava se galuega po o se galuega e sili atu e faapea latou te masani ona le mautinoa pe faapefea ona maua le galuega latou te mananao ai. Latou te fesili mai, “Pe ou te tusia sou talaaga, tuu au lava i le initoneti, pe o mea uma na, ae faapefea ona fai?” “O le a le ala sao e tali ai fesili e pei, ‘O a ou vaivaiga?’ ma ‘Aisea e tatau ai ona ou faafaigaluegaina oe i lenei galuega?’”

O lenei tusiga e faasoatua atu ai se fuafuaga ua faamaonia o laasaga e ono o mea e tatau ona e iloa ona faia lea ia maua ai le galuega e te manao ai. O nei laasaga e ono e faavae i se vaega i taunuuga o se suesuega na ou faia i le faatinoga o le faafaigaluegaina o tagata faigaluega e 760 ia na faafaigaluega i le Iunivesite o Polika Iaga. Na atiina ae foi nei laasaga mai faamatalaga na ou maua mai le faafaigaluegaina o ni tagata faapitoa ma ua silia ma le 30 tausaga o galulue ma faia ni aoaoga na ou tuuina atu i ni tagata i le silia ma le 20 atunu. Mulimuli ane, na ma auauna atu talu ai nei ma lau ava o ni faifeatalai matutua na tofia e faia le Auaunaga o le Ola Tutoatasi i Europa atoa. O o matou aafiaga na faamalosia ai i matou faapea o tagata o loo sailia ni galuega e manaomia lenei fesoasoani faapitoa. Po o fea lava o loo e nofo ai i le lalolagi, po o a ou tomai tau galuega, po o le a le tulaga o le galuega e te manao ia maua, o nei laasaga e ono e mafai ona fesoasoani ia te oe.

O lenei faagasologa o le mauaina o le galuega e te manao ai e mafai ona alu ai ni nai aso i ni vaiaso po o ni masina foi. Ae o le tala fiafia e faapea o lenei faagasologa e aoga. O nei laasaga e ono e mafai ona fesoasoani i tagata saili galuega i tulaga uma lava e fetaui i se tasi o vaega nei e tolu:(1) o i latou o loo saili mo la latou galuega muamua lava, (2) o i latou e mananao e see atu i se isi galuega pe



siitia i totonusi o le latou kamupani po o le faalapotopotoga o loo i ai nei, ma (3) i latou e mananao e see atu i se tulaga i se isi faalapotopotoga.

Laasaga 1. Faailoa le galuega faapitoa e te manao ai nei.

E tatau ona e faailoa se galuega moni e mafai ona e faia i le taimi nei, e fetaui ma ou tomai faalegaluega, tulaga faalegaluega, mea ua ausia, po o le aoga. O le taimi lava e te filifili ai, tusi i lalo le igoa o le galuega. Afai e te manaomia se fesoasoani, e tele polokalama ua lisiina ai le tele o igoa



Faatosi ai ma ni nai avanoa o galuega i ou luma, o a isi laasaga e faia ia maua ai le galuega lena e sao mo oe?

o galuega eseese ma faamatalaga. Mo le laasaga 1, e te le manaomia le sailia o se galuega o loo avanoa; na o le faailoa lava o le ituiga galuega e te agavaa ai ma e fiafia i ai.

O measese tetele lava e lua e faia e le au sue galuega o le le filifilia o se galuega patino latou te mananao moni ai lava po o le filifilia o se tulaga latou te le o agavaa i ai. Afai e te le o mautinoa po o le a le galuega patino e sailia ma tulimatai i ai, ona e ono iu lea i le le mauaina lava o se galuega. O le faapea, “E na ona ou manaomia lava o se galuega, soo se galuega lava” e le aoga. O le faia o lea

faaupuga e le fiafia ai pule o galuega ma faaleagaina ai au lava taumafaiga e saili se galuega. O lea la, ia filifili se galuega faapitoa e mafai ona e faia nei, ona taulai atu lea i lena galuega.

Laasaga 2. Sue le faamatalaga mo le galuega e te manao ai.

O le saililiga na ou taitaia i le 760 tagata pule na faafaigaluegaina tagata i le Iunivesite o Polika Iaga ma le tele o tausaga o le poto masani faalegaluega i le tele o atunu na faaalia ai o tagata e filifilia ma pule e faafaigaluegaina tagata e toeToe lava i taimi uma

e mafaufau i na o sui mo se galuega faapitoa e i ai tomai sao e fesootai ma le galuega, poto masani, na ausia ni tulaga lelei, po o aoga mo lena galuega. E matua moni lava lena mea mo i latou o loo i tulaga i le ogatotonu-ma le pito-i luga. Ao latou filifilia ma le faaeteete sui na talosaga mai, o nei tagata e faaaoga se otootoga po o se lisi e taua o se faamatalaga o le galuega e manatua ai mea e sili ona manaomia mo galuega taitasi o loo avanoa. O le tagata e filifilia le tagata faigaluega e faatusatusaina uma tagata talosaga i le faamatalaga faapitoa o lena galuega.



E tatau ona e sailia le faamatalaga o le galuega o loo e manao ai. O le a fesoasoani ia te oe e filifili ai pe o oe moni lava o se sui lelei mo lena galuega. O le a fesoasoani foi ia te oe e filifili ai le tala e fai atu ma aua le fai atua e uiga ia te oe lava ia i lau talaaga, i tusi talosaga, ma i faatalanoaga ma pule. E masani lava ona lisiina e pule le faamatalaga o le galuega mo galuega taitasi o loo avanoa i la latou uepisaite, i nusipepa, ma i uepisaite mo le sailia o galuega. O tagata o loo galulue nei e iloaina le galuega atonu e mafai foi ona tau atu ia te oe se mea e uiga i le faamatalaga o le galuega o loo avanoa ma mea e manaomia.

O lau galuega i le laasaga 2 o le sailia lea o mea faapitoa ua lisiina i le faamatalaga o le galuega mo le galuega e te manao ai. Ona e faaaogaina lea o lena faamatalaga autu i laasaga 3–6.

Laasaga 3. Faailoa ou tomai, poto masani, taunuuga o galuega, ma le aoga lena e fetaui i le galuega na e filifilia.

O i e mafai ai ona e faailoa ou lava tomai patino ma mea na ausia faalegaluega e faaalia ai o lou tulaga e fetaui tonu lava ma mea e manaomia o le galuega e te manao ai, e pei ona faamatalaina i le faamatalaga o galuega na e maua i le laasaga 2.

Ao e faia lenei lisi o ou tomai faalegaluega ma mea na ausia, o le a e mafai loa ona faatusatusa lou tulaga faalegaluega ma agavaa autu o faaalia i le faamatalaga o galuega na e maua i le laasaga 2. Afai o lau lisi e faaalia ai o ou tomai e fetaui lelei lava ma manaoga o le galuega na e filifilia i le laasaga 1, ona see atu loa lea i luma i laasaga 4–6. E ui i lea, afai o ou tomai ma mea na ausia na e lisiina i le laasaga 3 e le fetaui lelei ma le faamatalaga o galuega na e maua i le laasaga 2, ona tatau lea ona e matuai mafaufau e filifili se isi galuega e taulai i ai i lenei taimi, se galuega e sili ona fetaui ma ou tomai o i ai nei ma gafatia.

Laasaga 4. Tusi se talaaga fou e tasi-pe lua itulau.

O se faamoemoega autu lava o lou talaaga, e taua foi o se lisi faapitoa, o le mauaina lea o se faatalanoaga ma le tagata e filifilia pe faafaigaluegaina lea o loo sailia se tagata e faatumuina o le avanoa. E faia e lau talaaga lenei mea e ala i le faaalia puupuu i le tagata e faafaigaluegaina tagata ou tomai faalegaluega, poto masani, mea na ausia, po o le aoga e fetaui ma le mea o loo tau mai e le faamatalaga o galuega a le pule o uiga e sili ona taua o se sui tonu mo lena galuega.



Faafou iau talaaga mo galuega taitasi. Lisi mai tomai ma mea ua ausia na e talafeagai ma le faamatalaga o galuega.

O le talaaga e te tusia mo galuega o loo avanoa a pule eseese taitasi *e tatau lava ona faafouina*. E te le tau suia le faamatalaga faafuainumera autu lava lea e tasi o le a e tusia i au talaaga uma lava, e pei o lou talafaasolopito faalegaluega, au faamatalaga o le aoga, ma lau telefoni o i ai nei. O na faamatalaga o le a tutusa lava i au talaaga uma lava. Ae afai e te talosaga mo se galuega e sili atu ma le tasi le pule, o pule taitasi o le a i ai se ala ese pe matuai ese lava le faamatalaga o galuega mo la latou galuega. O le mea lea, e tatau ona e filifili po o fea o ou tomai ma mea na ausia e talafeagai ma faamatalaga o galuega taitasi. Tusi na mea i lau talaaga o ni faamatalaga e fetau lena e amata i se veape faamatala, e pei o le “na suesueina,” “na atiina ae,” “na fausia,” “na puleaina,” ma isi foi.

Mo se faataitaiga, afai na i ai sou poto masani i fefaatauaiga ma le maketiina ae na e talosaga mo ni galuega se lua eseese—o le tasi e taulai atu i fefaatauaiga ae o le isi i le maketiina—ona e atiina ae lea o ni talaaga se lua, o le tasi e faasoai le tele o au gaoioiga faalefefaatauaiga ma mea na ausia ma gaoioiga. (Afaei le o i ai se tele o lou poto masani i le taimi nei, asiiasi i le lds.org/go/71939 e aoao ai pe faapefea ona faaaoga le poto masani mai lau auaunaga i le Ekalesia i lau talaaga.)

Laasaga 5. Saili pule o loo faafaigaluegaina nei tagata mo le galuega o loo e manao ai.

E i ai lava galuega e avanoa ia faatumuina, e oo lava i taimi faigata. O tagata faigaluega e litaea, sui galuega, siitia tulaga, pauu i lalo, pe siitia ese foi. Ma e i ai lava pea ni pisinisi ua faatupulaia ma e manaomia nisi tagata faigaluega. O nei tulaga

uma lava e taitai atu i galuega ua avanoa na e manaomia le faatumuina e ni tagata agavaa. O nisi taimi e tupu lenei mea i ni vaega laiti ma o nisi taimi i ni vaega tetele o galuega avanoa ia faatumuina. O lea aua le lotovaivai pe afai e lei maua lava sau galuega. Tau lava o le vaavaai mo lena galuega mo oe.

Vaavaai i uepisaite o pule o galuega, uepisaite o galuega i tomai faapitoa, faasalalauga o nusipepa, ma isi punaoa mo le galuega e te manao ai. Ma le isi, o le tasi ala sili e maua ai galuega avanoa o le upegatafailagi—faafesootai i le tele o tagata i aso uma, e pei o tuaoi ma tagata o le uarota, tau atu ia i latou le galuega faapitoa o loo e sailia ma fesili atu pe latou te iloa sea galuega o loo avanoa pe latou te iloa se tasi e iloaina sea galuega o avanoa. Ia mautinoa e tuu atu lau telefoni i nei tagata uma lava ao e fesootai i ai i aso taitasi.

Fuafua ma faataitai le taliina o fesili atonu e fesiligia ai oe i se faatalanoaga o se galuega.


Laasaga 6. Aoao ia lelei le faatalanoaga ae lei auina atu au talaaga i pule.

Ae e te lei amata ona auina atu au talaaga ua iloiloina lelei i pule fuafuaina, e tatau ona e aoao muamua ia lelei le faatalanoaga. Ua tele naua tagata e amata ona auina atu talaaga i le vave latou te mafai ai, ae latou te lei saunia ia lelei le faatalanoaga. O le faafitauali i lenei mea e faapea o nisi o nei tagata saili galuega atonu e valaaulia loa lava mo se faatalanoaga. E fiafia tele nei sui, e o atu i le faatalanoaga ae lei saunia lelei i ai, le lelei le faatalanoaga, ma le maua ai loa le galuega. O le taimi lava e te faia ai lenei mea, e le mafai ona e toe foi atu i lena kamupani po o le tagata na faatalanoaina oe ma fesili atu mo se isi faatalanoaga, ma faapea atu o lea ua e aoao nei le ala e tali sao ai i fesili!

O le ala e te tali atu ai i fesili taitasi i le faatalanoaga e taua tele i lou faamanuiaina i le mauaina o le galuega e te manao ai. E ui lava e tatau lava ona e faamaoni atoatoa, e i ai lava auala sao ma sese e tali ai fesili taitasi i se faatalanoaga. O le a fesiligia oe i ni fesili e pei o nei:

- O a ou malosiaga ma ou vaivaiga?
- O le a se faafitauali na e oo i ai i lau galuega mulimuli o le a e taulimaina nei i se ala ese?
- O a ni ou manaoga i le totogi?
- O le a se mea o e faamoemoe e fai i le isi lima tausaga?

I le avea ai o se sui e faatalanoa, o le tali e te tuuina atu i fesili taitasi e fesiligia ai oe e tatau ona mafaufauna ma fuafuaina lelei ao lei oo i le taimi. E oo lava i se tali leaga e tasi e mafai ona le maua ai lau galuega. Taulai atu au tali ia pupuu, tasi-i le lua-minute o faataitaiga e faaalia ai o lou tulaga, tomai, ma mea na ausia e fetau lelei i la latou faatalaga o galuega. Suesue le faalapotopotoga ae lei faia le faatalanoaga muamua ina ia mafai ona e fuafua ai au tali i o latou manaoga.



I le faaiuga o le tele o faatalanoaga, o le a tuu atu ia te oe le avanoa e fesili atu ai ni nai fesili i le pule. O lau fesili e tatau ona fai atu ia faatatau i le galuega o avanoa. “O a mea e manao-mia ona ausia pe suia i lenei galuega?” O lenei mea o le a fesoasoani ia te oe i ni faatalanoaga i le lumanaip e afai e fesiligia oe e toe sau. E mafai ona e sefeina au fesili masani e uiga i sini, tulaga masani o galuega, totogi (sei vagana ua fesiligia ai oe), itula faigaluega, ma faamanuiaga mo faatalanoaga i le lumanaip.

Ua i ai nei au laasaga e ono e maua ai le galuega e te manao ai. E le mafai ona e ola tutoatasi faaletino pe afai e te manao-mia se galuega ae leai se galuega. Afai e te manao-mia se galuega, se galuega e sili atu, pe iloaina se tasi o loo manao-mia, faamolemole faaaoga pe faasoa atu nei meafaigaluega mamana, ua faamaonia mo le sailia o galuega. E aoga! Tau ina ia faamanuiaina oe e le Alii i au taumafaiga ia maua le galuega e te manao ai. ■

O loo alaala nei le tusitala i Iuta, ISA.

O PUNAOA A LE EKALESIA E FESOASOANI I LAU SAILIGA GALUEGA

Mafaufau e auai i le kosi o le ola tutoatasi a lau uarota po o le siteki "Saili se Galuega e Sili Atu". Fesili atu i lou epikopo po o le peresitene o le paranesi i lau uarota po o le paranesi pe i ai se tagata faapitoa o le ola tutoatasi po o galuega.

Asiasi i le lds.org/go/719 e maua ai vitio i le faatalanoaga, upegatafafilagi, tusia o talaaga, ma isi.



O LE AVANOA MAMALU MO LE GALUE

"O le galue o se fofo lea o le atuatuvalue, o se vaimalu mo le faanoanoa, ma se fai-totoa i avanoa. Po o le a lava o tatou tulaga i le olaga, . . . ia tatou faia le mea sili tatou te mafaia ma atina'e se uiga taulelei mo le tulaga silisili i mea uma tatou te faia. Ia tatou seti o tatou mafaufau ma tino i le avanoa mamalu mo le galuega e aumaia e aso fou taitasi"

Elder Dieter F. Uchtdorf o le Korama a Apostolo e Toasefululua, "Mataupu Faavae e Lua mo le Manua Tautupe," *Liahona*, Nov. 2009, 56.

O Le A Le Galo ia Te ia Lau Galuega


Ini nai masina talu ai na fai ai sau miti lea, ao nofo i le lotu i le nofoa mulimuli lava e masani ai, e aunoa ma se manao e auai, na suia lau vaai. Na ou vaaia na toatele i totonus o le aulotu isi faifeautalai na vave foi mai. Na tupu mai se manao i lou loto e fesoasoani ia i latou ao ou vaavaai solo. Na ou iloaina o le faasoaina atu o ou aafiaga e mafai ona avea o se ala e auauna atu ai ia i latou ma fesoasoani ia i latou e faaaau- au i luga o le ala o le feagaiga e ui lava i lenei faigata e pei o se patupatu mo le saoasaaoa i le ala.

Na ala mai i lenei miti, na tau mai ai e le Tama Faalagai ia te au e alofa o la. Na te talisapaia le auaunaga amiotonu na matou tuuina atu o ni faifeautalai, e tusa lava pe o le a le umi na auauna atu ai i le misiona. "E le amioletonu le Atua na te le faagalagaloina la outou galuega ma le faamalosi i le alofa, ua outou faaali mai ai i lona suafa" (Eperu 6:10). I lau tusiga (tagai itulau 47), ou te faasoa atu ai se tala i tusitusiga paia ma aafiaga a isi faifeautalai na vave foi mai e mafai ona fesoasoani ia te oe ao e malaga ai i lenei auala e lei faamoemoeina ma faigata. Ou te fiafia foi i le ala ua faaaoga ai e Alex se tala mai le Tusi a Mamona e fesoasoani ai ia i tatou ia vaai ai e oo lava ia i latou na vave foi mai i le fale mo tulaga o le agavaa, o loo i ai pea le faamoemoe (tagai itulau 44).

I na o tusiga faatekinolosi, o le a e faitau ai i le ala na suia ai e Emily lagona o le popole, fefe, ma le leai o se faamoemoe na ia oo i ai i se olioli patino ma le paia. Ma o Kevin, o se fautua polofesa, ua ofoina mai ni fautuaga i le ala e mafai ai e e pele ona lagolagoina i latou o loo tauivi ma se vave foi mai.

O le mafuaaga na tatou vave foi mai ai taitoatasai e le afaina ae o le mea tatou te faia pe a tatou foi mai i le fale. Faatasi ma le fesoasoani a le Faaola, e mafai ai ona tatou faamalolo, alualu i luma, ma faaaau ona saili le olioli sili atu i la tatou malaga e faavavau.

Ma le faamaoni lava,
Liahona Ficquet



AUTALAVOU MATUTUA

FAUTUAGA SILI . . .

Ua faasoai mai e talavou matutua a latou fautuaga sili e uiga i le foi vave mai i le fale mai i lau misiona:

"Tau lava o le iloa o le a LELEI mea uma. Na tuuina mai ia te au lenei fautuaga: e faigata seilogia e te filifili e le faigata. E mafai ona e filifili po o le a le ituaiga lumanaio le a e maua."

—Nathaniel Park, Ausetalia i Sisifo, Ausetalia

"E le tau faamatalaina oe."

—Elena Kingsley, Iuta, ISA

"Po o le a lava tulaga o i ai, taumafai e sue se faatulagaga fou mo oe lava, ina ia faamasani ai i le olaga ua uma le misiona."

—Rosa-Lynn Ruiter, Netalani

"O le faaiuga o se tasi misiona o le amataga lea o se misiona fou. Saili lena misiona fou!"

—Roberto Alfonso Martinez IV, Iuta, ISA

"E alofa le Atua ia te oe ma e i ai se fuafuaga mo lou olaga. Tumau i le faatuatua!"

—Rebecca Stockton, Arisona, ISA

O le a le fautuaga aupito sili na e maua e uiga i le faaipoipoga? Auina mai lau tali i le liahona.lds.org ae le'i oo i le aso 31 o lulai, 2019.

FAASOA MAI LAU TALA

E i ai sau tala uiga'ese e faasoai mai? Pe e te manao e vaai i ni tusiga e uiga i ni mataupu faapitoa? Afai o lea, matou te mananao e faalogo atu ia te oe! E mafai ona e tuuina mai lau tusiga po o ou manatu i le liahona.lds.org.

E UIGA I TUSITALA TALAVOU MATUTUA

Alex Hugie e sau mai Oregon, ISA. Sa faauu mai le lunivesite o Polika laga ma se faailoga tikeri i le Igilisi. E faapitoa lava lona fiafia i suesuega i tusi a tagata talavou, tusia o tala pupuu malie ma tala fatu, ma le inuina o le susu.



Liahona Ficquet e sau mai Farani i Saute. O ia o se tagata aoao ma e fiafia e galue i le fale ma lona tama. E fiafia e suesue i mataupu faafomai ma e naunau e galue i le soifua maloloina o tamaitai. O loo galue nei i le faaliliuina faaFarani o se tusi na tusia e se faifeautalai na vave foi mai ma mo faifeautalai na vave foi mai.



Emily Warner na sofifua ae i Idaho, ISA, lea o loo avea pea ma nofoaga e sili ona fiafia ai i le lalolagi. Na aoga o ia i le suetusi i le lunivesite o Polika laga ma e fiafia e savali, pue ata, ma malaga i le lalolagi ma lana tane.



I LE VAEGA LENEI

44 Afai Na Vave Uma Lau Misiona, Aua Le Fiu *
Saunia e Alex Hugie

47 Faifeautalai Na Vave Foi Mai: E Le O Tuua Na O Outou *
Saunia e Liahona Ficquet

* O lenei tusiga e i ai ni anotusi faaopoopo i le lomiga faatekinolosi.



NA'O TUSIGA FAATEKINOLOSI

Lagolagoina o Faifeautalai ua Vave Foi Mai i le Fale
Saunia e Kevin Theriot

Mauaina o le Olioli e ala ia Keriso e Ui ina Foi Vave Mai i le Fale mai La'u Misiona
Saunia e Emily Warner

Saili nei tusiga ma isi:

- I le liahona.lds.org
- I le [YA Weekly](#) (i lalo "Autalavou Matutua" i le vaega o le Gospel Library)
- I le [facebook.com/liahona](#)

O lou taua e le faaititia e ala i lou vave foi mai i le fale mai i lau misiona.

Afai Na Vave Uma Lau Misiona, Aua Le Fiu

Saunia e Alex Hugie

Afai o loo e faitauina lenei tusiga, atonu ua uma ona e iloaina le loituina ma le faigata e mafai ona oo i ai i le vave foi mai i se misiona. O talavou matutua o loo auauna atu atonu e oo i ai se manua faaletino, tulaga tau soifua maloloina faalemafaufau, faalavelave faafuasei, tulaga i le agavaa, faafitauli matuia ma isi, po o le le usitai i tulafono a le misiona, ma mafua ai ona tuua vave la latou misiona ae lei oo i la latou taimi e foi ai.

Po o le a lava le mafuaaga, e le finagalo le Atua e avea lenei mea o se papupuni e tuua ai soo se tasi o Ana fanau ua pipili faaleagaga. E faapefea la e faifeautalai ua vave foi mai ona mafai ona agai i luma mai lea ituaiga o suiga faigata? Ma e faapefea e matua, taitai o le Ekalesia, ma e pele ona fesoasoani?

O Se Faifetautalai o le Tusi a Mamona

O se tasi tala mai le tusi a Alema ua tuuina mai ia i tatou se faataitaiga aoga. O le perofeta sa Nifae o Alema na taitaia se misiona i sa Sorama amioleaga, na faatasi ai ma ni tagata faatuatua. O se tasi o nei tagata, o lona atalii o Korianetona, "sa e tuu

le galuega, ma e alu atu i le lauelele o Sairona e i totonu o tuaoi o sa Lamanā, i le fafine talitane o Isapela" (Alema 39:3). O le taunuuga, na aoaiina ma le malosi e Alema Korianetona ma valauina o ia ia salamo, ma faapea atu, "Ou te le fia taua pea au solitulafono, e laga ai i luga lou agaga, pe a na ua le mo lou lelei" (Alema 39:7).

Na taliaina e Korianetona le aoaiga a lona tama i le lotomaualalo, salamo i ana agasala, ma toe foi e auauna o se faifeautalai i sa Sorama e "tau atu le afioga ma le faamaoni ma le mamalu" (Alema 42:31). O loo faapea mai le tala ina ua uma ona talanoa atu Alema i ona atalii, "sa oo ina o atu atalii o Alema [o Sipelona ma Korianetona] i totonu o le nuu, e talai atu le afioga ia te i latou" (Alema 43:1).

Foi Mai ma le Mamalu

O a ni lesona tatou te aoao mai lenei tala? Muamua, o se faifeautalai e tuua vave—e oo lava i ni mafuaaga e mafai ona taofia—e mafai lava ona ausia ni mea maoae. Atonu na faia e Korianetona ni measese matuia, ae na ia alu atu pea e faataunu se galuega sili. E faapena foi, e oo lava i

faifeatalai na toe vave foi mai o se taunuuga o a latou lava faatinoga e le tatau ona lagonaina e pei ua latou faaleagaina lo latou malosi faaleagaga. Na aoao Korianetona mai ana measese ma na fausia le malo o le Atua i le tele o auala, ma o lena lava malosi o loo i totonu o tagata uma lava e tusa lava pe o le a le tele o lo latou lagonaina e pei ua latou toilalo.

Lona lua, tatou te aoao le matafai o taua na faatinoina e isi i se faafouina faaleagaga o se faifeatalai na vave foi mai. Alema—le tama o Korianetona ma le taitai perisitua—na fautuina Korianetona ma le malosi ae faapea foi ma le toofilemu i lona mafaia ona ausia pea lona malosi faaleagaga. E pei o Korianetona, o taunuuga o le le usitai i se misiona e tatau ona oo mai, ae soo se aoaiga lava e tatau ona faatasi ai ma le alofa, faamagaloga, ma

le alofa mutimutivale (tagai Mataupu Faavae ma Feagaiga 121:41-44).

Toe Foi i le Faamalologa

O lenei lava savali o le faamoemoe mo faifeatalai ua vave foi mai o loo faalogoina i le aso. O Marshall, na foi vave mai ona o luitau o le soifua maloloina faalemafaufau ma faaletino, o nisi taimi e lagonaina le faanoanoa mo na faigata uma faalesoifua maloloina ma le le atoatoa patino na taofia o ia mai le avea ma se faifeatalai e atoatoa i le auaunaga. Ae ui i lea, na te lagonaina o lana auaunaga na matuai aoga lava.

"I le avea ai ma faifeatalai, tatou te le atoatoa," na fai mai ai Marshall. "O loo tatou aafia lava i faaosooosoga; e mafai lava ona tatou agasala." Ae o ou le atoatoa atonu o mea na e manao Satani ia te oe e taulai i ai—ia lagona e pei o lau taulaga e lei taliaina e le

Alii ona o na taimi e lei avea ai oe o se faifeatalai sili."

E talitonu Marshall e finagalo le Alii i faifeatalai ia iloaina e fiafia o la i le auaunaga na latou ofoina atu, e tusa lava pe o lena auaunaga na le atoatoa ona o la latou filifiliga po o tulaga.

Na aoao Marshall e taulimaina ma faamaloloina e ala i le faia o mea uma na ia mafaia e latalata ai i le Tama Faalelagi ma lesu Keriso.

Toe Foi i le Salamo

O se isi faifeatalai, na auauna atu i Colorado, ISA, na auina i le fale mai lana misiona mo mafuaaga tau aoaiga ma na tape lona igoa mai le Eklesia, ae na toe papatisoina mulimuli ane o ia. "O le toe foi mai i le fale na faigata," na ia fai mai ai. "Na ou lagonaina le leiloa ma le gaogao ii. O nisi



taimi, o le vaega na sili ona faigata o le sau i le fale o le [mauaina] o le malosi e tumau ai le alu i le lotu, faitau tusitusiga paia, ma le tatalo. O mea faigofie na sili ona faigata."

Ae na ia maua le malosi i le lagolago a uo ma aiga ma le galue ai ia salamo.

"O le faatuina o sini, feiloai ma lou epikopo, ma le alu i le malumalu pe a ou agavao o ki na na mafai ai ona latalata i lou Tama Faalelagi," na ia faaopoopo ai. "Ou te manatua taimi pe a le mafai ona ou feiloai ma lou epikopo pe ausia ni sini; na i ai lava i taimi uma le fili iina, e faaosoosoina au."

O lona faamalologa na mafai e ala "i le manatuaina pea e i ai sou Tama Faalelagi e alofa ia te au ma e finagalo ia ou fiafia. O le i ai o se molimau i le Togiola a le Faaola ma i le salamo, e mafai ai ona tatou latalata atili i le Atua e tusa lava pe o le a le mamaeo mafai ona tatou lagonaina."

"O le toe tepa i tua i lau misiona," na ia faaauau ai, ma faatatau i masina na ia auauna atu ai ae lei tutupu mea na auina mai ai o ia i le fale, "Ou te lagonaina pea o se tasi ia o aafiaga sili na ou oo i ai. Na ou aoaoina le tele o mea, ma e ui e lei taunu i le ala na ou fuafuaina, na mafai pea ona ou vaaia olaga na sua ona o le talalelei. Na ou faia ni measese, ae o lau molimau na matuai faateleina le faatupuina ao ou tauivi e salamo ma tumau ona agai i luma."

E manao o ia i isi na vave foi mai ona o a latou filifiliga ia iloaina "e le uma ai le lalolagi. O le sau i le fale o se laasaga muamua lea i le salamo. O le taimi lava e te alu ai i lenei faagasologa o le salamo, o le a e mauaina le tele o mea lelei. O lena avega mamafa

o le a siitia. E leai se isi lagona sili nai lo le iloaina o loo e i ai i se tulaga lelei le silafaga a le Atua."

Alofa ia i Latou na Vave Foi Mai

O nei faifeautalai uma na vave foi mai i le fale ua faamamafaina le taua mo uo ma aiga o faifeautalai ua vave foi mai ia alolofa ma lagolagoina i latou.

"Tuu atu ia i latou le saolotoga," na fai mai ai Marshall. "Ae ia mautinoa o loo outou latalata ane, aua e mafai ona fai lava si faavauvau. Ia avea ma a latou uo." E ala i le faalogo atu i le Agaga, e mafai ai ona tatou filifili o latou manaoga ma iloa le taimi e aapa atu ai ma le taimi e faaaloalo ai i lo latou faalilolilo.

"Tau lava o le alofa ia i latou," ua faaopoopo ai le faifeautalai na auauna atu i Colorado. "Uunaia i latou ia manatua pea le taulaga togiola a lesu Keriso."

O le ala e taulima ai e isi faifeautalai na vave foi mai e mafai ona fesoasoani e faia se eseesege i le va o i latou e tuua le lotu i le maasiasi po o le agai i luma ma le faatuatua. E taua, ona, taliaina i latou e aunoa ma le faamasinoina.

E pei o Korianetona, o faifeautalai e vave foi mai e i ai le malosiaga e tulai ae ai mai lo latou tulaga maaleale o i ai nei i ni meafaigaluega maoae a le Alii.

Mauaina o le Faamoemoe i le Fuafuaga a le Atua

Ua faamatala mai e Elder Jeffrey R. Holland o le Korama a Apostolo e Toasefululua ini upu faamafanafana i faifeautalai na vave foi mai. "A fesili mai se tasi pe na e auauna atu i se misiona,

e te fai atu ioe," na ia fai mai ai. "... Faapelepele le auaunaga na e galue ai. sla faafetai mo le avanoa na molimau atu ai, na alu atu ai i le suafa o le Alii, na fai ai lena pine o le igoa o le faifeautalai.

... Faamolemole, faamolemole aua le mafaufau soo i lenei mea; aua le mafaufau e te le atoatoa pe ua toilalo."¹

Mo i latou na vave foi mai ona o se agasala, manatua nei upu mai ia Sister Joy D. Jones, le Peresitene Aoao o le Peraimeri: "Afai tatou te agasala, e faaititia lo tatou agavaa, ae le faaititia ai lava lo tatou taua!"² Ua ia taua faapea o le a fesoasoani mai le Atua ia i tatou e atiae le toafimalie ia i tatou lava i o tatou taimi e sili ona pogisa pe afai tatou te liliu atu ia te la.

O le savali mai le Tusi a Mamona, mai faifeautalai na vave foi mai, ma mai taitai o le Ekalesia e tutusa lava: Aua lava le fiu i le faamoemoe, aua o loo i ai pea fuafuaga a le Atua mo oe e sili atu nai lo le mea e mafai ona e mafaufauina. Mo e pele i nei faifeautalai, o lau tali i lo latou foi mai i le fale o le a faia se eseesege tele i le fesoasoani atu ia i latou e faamaloloina ma ausia lo latou malosiaga. Manatua o le Togiola a lesu Keriso e mafai ona faamaloloina manua uma lava—e aofia ai manua o le vave foi mai se misiona. ■

E alaala le tusitala i luta, ISA.

E mafai ona e maua se lisi o punaoa mo faifeautalai faasauniuni ma faifeautalai na vave foi mai i le vaega faatekinolosi o lenei tusiga i le liahona.lds.org po o le Gospel Library app.

FAAMATALAGA

- Jeffrey R. Holland, "Elder Holland's Counsel for Early Returned Missionaries" (video), lds.org/media-library.
- Joy D. Jones, "O Le Taua le Mafuataina," *Liahona*, Nov. 2017, 14.

Ua faasoa mai e talavou matutua le ala latou te maua ai le uiga ma le filemu i le mavae ai ona vave foi mai a latou misiona ma le ala e te mafaia ai foi.

Faifeautalai na Vave Foi Mai: **E Le o Tuua Na o Outou**

Saunia e Liahona Ficquet

Ole autau a faifeautalai o loo tauivi e faataunu lo latou tiute ia "valaaulia isi e o mai ia Keriso"¹ e aumaia "faamoemoega sili ma le olioli tele" (Alema 56:17) i le toatele. O na faifeautalai, e pei lava o le autau talavou i le Tusi a Mamona, o loo tau i aso uma ma le "malosi faavavega; ma le mana malosi faapea" (Alema 56:56).

Ae oo lava i totonus o le autau talavou e 2,060, na i ai lava le 200 o e na "matapogia ona o le tele o le toto masaa" (Alema 57:25). Pe na faaititia ai lo latou lototoa? Faaititia ai le malolosi? Faaititia ai le lototetele? Faaititia ai le agavaa nai lo isi? E leai lava.

Na tutusa lava, outou faifeautalai na vave foi mai i le fale mo mafuaaga faalemafaufau pe faaletino e *le o* faaititia ai le lototoa, faaititia ai le malosi, faaititia ai le lototele, pe faaititia ai le agavaa. O lou naunautaiga e ala i ou tofotofoga e—ma e tatau ona—ofoofogia. Na faasaoina oe—atonu na matuai manua lava, ae ua faasaoina. O ou manua, pe faaletino, faalemafaufau, pe faaleagaga, ua manaomia nei le tausia (tagai Alema 57:28). Mo i latou na foi mai i le fale mo mafuaaga e faatatau i le agavaa, o le salamo o le aavea o se vaega taua o lou faamalologa.

Ao e faamasani i le i ai i le fale, ia mautinoa e te tuuina ia te oe lava se taimi e faamalolo ai ma



manatua ia faalagolago pea i le Atua (tagai Alema 57:27). Ua ia faamanatu maia ia i tatou: "A Ou tuuina atu se poloaiga i soo se tasi o atalii [po o afafine] o tagata, e fai se galuega i lo'u igoa"—mo se faataitaiga, auauna atu i se misiona—"ma o atu ia atalii o tagata ma lo latou malosi atoa ma mea uma ua ia te i latou e fai lena galuega, ma lē tuua lo latou filiga, ae o mai o latou fili ia i latou ma taofi i latou mai le faia o lena galuega, faauta, ona tatau ai lea ia te a'u ona lē toe manaomia lena galuega mai i o [latou] lima . . . , ae talia a latou taulaga" (Matapu Faavae ma Feagaiga 124:49).

Po o a lava manua ua outou taulimaina—pe na toe tiga ai—i le galuega, ae afai na outou auauna atu ma le agavaa pe salamo atoatoa, o lau saofaga na manaomia ma na taliaina e le Alii.

O le faitauina o nei tala e ono fesoasoani ia te oe e maua ai le faamalogia i le mea moni lava e le o tuua na o oe ma o le fesoasoaina mai o lau tala e mafai ona fesoasoani i isi.

Ia iloaina NA LAGONA E LE FAAOLA LOU TIGA

I lou tietie atu i le vaalele i lau misiona, na ou vaai faalemafaufau pe o le a faapei lou foi atu i le fale. O le a alalaga fafia tagata uma, o le a opoina atu au e lou aiga ma uo, ma o le a ou ola i aso o totoe o lou olaga i le filemu, ma olioli i faamanuiga uma na oo mai i le avea ai ma se faifeatalai ua foi mai ma le mamalu.

E sefulutasi masina mulimuli ane, i le tietie atu i le vaalele i le fale, o minute uma na alu i le popole ma le tiga e uiga i le mea o le a tupu. Na faatalitali mai lou aiga, ma e ui na latou alalaga fafia ma opo mai au, e lei umi lava, ae tuua na o au ma le le mautinoa o lou lumanai.

Na silafia e le Faaola ou aso pogisa. Na la silafia ou lagona ao taoto ai i le moega mo le tolu vaiaso ma tagi ma moe ia aloese ai mai le mea moni. Na la silafia o le a ou manaomia Lona malosi ona e leai se tasi na siomia au na malamalamama pe popole foi i le mea o tupu ia te au. Ae sa la silafia. Semanu ou te le sao mai lau misiona po o le vave foi mai i le fale e aunoa ma la.

Ali Boaza, Kuinisilani, Ausetalia

AUA LE MAIMAUINA LE TAIMI e Mafaufau Ai Pe Aisea

O le manatu faapea o le vave foi mai i le fale sa matautia. O le taimi lava na tau mai ai e le fautua, na ou lagonaina ai le tele o lagona ua fenumiai: Maasiiasi. Toomaga. Ta'usalaina. Filemu. Faanoanoa. Faatasi uma lava i le taimi e tasi.

Ou te iloaina na lagolagoina au e le Atua aua na mafai lava ona ou ola i lena vaiaso muamua i le fale. Ona ou toe sao mai lea i le isi vaiaso. Ma le isi. Seia oo lava ina ou mafaia ona lagonaina ua ou manuia. O lou tama o lou lagolago sili lea ma na ia tausia lelei au. Sa ia manao e talanoa i taimi uma ma faaalu le taimi e faatasi ai ma au. E le ina ia iloa po o le a le "mea na tupu," ae na o le fia iloa lava pe o a mai au.

Ina ua maliu lou tama i se faalavelave ao 'a'e i luga o papa i ni nai masina mulimuli ane, na ou iloaina e aunoa ma se masalosalo na i ai se fuafuaga a le Atua mo au. O le faatasi ai ma lou tama mo masina mulimuli o lona soifua na faamalosia ai lau molimau i le fuafuaga o le faaolataga. Ou te le o malamalamama lava i mafuaaga uma pe aisea na ou sau ai i le fale i le taimi lea, ae na ou aoaoina foi afai e te faaaluina le tele o le taimi e mafaufau ai pe aisea, ona e misia lea o vavega ofoofogia ua saunia e le Atua mo oe i aso uma.

Kristen Watabe, Ohaio, ISA



Ia Naunau e MULIMULI I LE FINAGALO O LE ALII

Sa sologa lelei mea uma i lau misiona. Na ou oo ini saafiaga ofoofogia na o le a tumau pea e faavavau i lou loto. Ae ui i lea, i le mavae ai o le valu masina, na amata ona faaletonu lou soifua maloloina. I le mavae ai o le tele o le anapogi ma le tatalo, na auina atu au i le fale. Sa ou mafatia. Na ou mafaufau o au na mafua ai mea uma. Na amata ona ou le faitauina au tutsiga paia ma tatalo soo e pei ona masani ai. Na ou mafaufau pe ou te lei faia mea uma ina ia ou nofo ai.

Ae na ou iloaina sa tofotofoina au e iloa ai pe o le a ou tumau i le faamaoni i le Alii. Na faigata, ae na ou tuu atu lou talitonuga i le Alii, ma na ou toe foi i le misiona, lea na ou toe oo ai foi i ni aafiaga ofoofogia.

Ona, toe foi mai lea o o'u faafitauli faalesoifua maloloina. Ae o le taimi lea, sa sili atu lou naunau e mulimuli i le finagalo o le Tama Faalelagi. O lea na ou toe foi atu ai i le fale mo le taimi lona lua. Na faigata, ae ou te iloaina na mafai ona ou aoao mai mea uma na ou oo i ai.

E ui lava ou te lei auauna atu mo le 24 masina, ou te iloaina na ou auauna atu i se misiona faamamaluina. Ou te iloaina o le taimi na ou auauna atu ai i le Alii na aoga mo au ma mo tagata na ou fesoasoani i ai. Ou te faafetai i lou Faaola mo Lana Togiola e le iu. Na te silafia o tatou luitau taitasi. Ma afai tatou te faalagolago ia te la ma le manatu atoa, o le a le tuua lava na o i tatou. Fillipe Hoffman, Goiás, Pasila

IA SIOMIA OE LAVA i le Agalelei

O u te lei mafaufau lava o le a ou alu vave i le fale, ma na ou ma ma popole e uiga i le faafeagai ai ma tagata uma. E ui o se tasi lea o taimi sili ona faigata i lo'u olaga, sa ou tuputupu ae foi mai le aafiaga. Na mama-nuina ai au i se tagata e sili atu ona lelei.

Na ou toe foi i le fale ina ia oo i se faagasologa o le salamo. O nisi o filifilia na ou faia ae lei alu i le misiona sa le ogatusa ma aoaoga ma poloaiga o le talalelei. Ona o lou maasiasi ma le manao ia tumau i lou tulaga i le Ekalesia, ou te lei oo ai i le faagasologa o le salamo ma lou epikopo muamua. Ae i totonu o ni nai masina muamua, na ou lagonaina le manaomia ona toe foi i le fale e salamo ina ia mafai ona ou auauna atu ma le mamalu ma le amiosao.

O mea na uunaia moni lava au ina ua ou toe foi i le fale o le auai i gaoioiga na siitia ai faaleagaga, e aofia ai sauniga o le Ekalesia, galuega faatino auauna atu, ma le malumalu, i le taimi lava na ou mafai ai. O le mea na sili ona fesoasoani ia te au, e ui i lea, o tagata na siomia au—aiga, ni nai uo, ma e oo lava i tagata ou te lei feiloi i ai muamua na faaalia ia te au le alofa ma le agalelei.

O le aotelega, faatasi ai ma le fesoasoani a le Alii ma faataitaiga faakeriso na siomia ai au, na mafai ai ona ou toe foi ma faauma lau misiona i Florida. O lou faamemoega e faapea o le a tatou taumafai uma lava ia amio faakeriso i isi, pe na latou vave foi mai i le fale pe na ona manaomia lava.

Caigen Stuart, Iuta, ISA

O le folafolaga o loo maua i lau tusi o le valaauga faamisiona, na faia ia te oe ao e filifili e laa atu i luma i lenei galuega, o le a faataunuina: "O Le a Faamanuiaina oe e le Alii i le lelei o lou olaga." Faatasi ai ma le taulai atu ma le faaeteete, o le a faamaloloina ou manua ma avea o se meafaigaluega mo oe e mafai ai ona fesoasoani i isi ia o mai ia Keriso. O le tiute, lava lena, a faifeatalai. ■

O le tusitala, e sau mai Farani, o loo aoga i luta, ISA.

Saili mo nisi tala mai faifeatalai na vave foi mai i le vaega atoa o lenei tusiga i le liahona.lds.org po o totonu o le polokalama o le Gospel Library.

FAAMATALAGA

1. "O Le A Lo'u Faamemoega o se Faifeatalai?" *Tala'i La'u Tala-lelei: O Se Taiala mo le Galuega Faafafeatalai*, rev. ed. (2018), lds.org/manual/missionary.



Ou te taalo volipolo, tamoe i tuuga, ma toaga e faitau.

Afai ou te faaaluuiina se aso e fai ai se mea, atonu o le a ou alu i le matafaga.

Na ou fanau i Sikako, Ilinoi, ae na ou sau i Navu ina ua ou maua se aiga e tausia au. Ou te le manatua tele ni mea e uiga i lou olaga ae lei tausia e se aiga, ae ou te manatua le le lagonaina o le saogalemu. Ina ua ou alu i le aiga e tausia au, na ou lagonaina le saogalemu. Ou te fiafia i le i ai o le talalelei. O nisi o au uo na tuua i ni tulaga taufaafefe ona latou te lei mulimuli i o tatou tulaga faatonuina. Ou te iloa o le mulimuli i poloaiga e tausia au ia saogalemu.

Sa o se aafiaga matagofie tele le mauaina o lou aiga. O lou tina na sau i le aoga faataitai na ou alu i ai ona sa ia fesoasoani e sui i faiaoga. Na ia taalo faatasi ma au, ma na ia tau atu i se tasi o faiaoga na ia manao e ave au i le fale ona o au o se tamaititi aulelei tele. Na fai atu le faiaoga, "O loo lisiina o ia mo le vaetamaina, masalo e mafai!" Na sailili lou tina ma vaetamaina loa au ma ou tuagane e toalua. E matagofie aua ou te iloa pe faapei le leai o se aiga, ma ua avea ai le maua o se aiga o se mea e sili atu le faapitoa.

Lily S., 14, Ilinoi, ISA

AUTALAVOU



I LE VAEGA LENEI



52

- 52 **Suesue, Faitau, Iloilo, Tatalo. Toe Fai:**
Saunia e Mario Días Alonso

- 54 **O Lou Aso Faigaluega Sili!**
Saunia e Elder Joni L. Koch

- 56 **Lesona mai le Feagaiga Fou: O Apostolo o Molimau a lesu Keriso—ma e Mafai Foi e Oe!**
Saunia e Heather White Claridge

- 58 **"Ua Tatau Ona e Tuua Lenei Nofoga"**
Saunia e Sergio Riquelme Segura

- 61 **Pepa Lautele o I Ai se Savali: O Le Faatuatua e Oo Mai i le Laa e Tasi i le Taimi**

- 62 **Tusi mai se Tuagane Agaalofa**
Saunia e Merilee S. B. Averett

- 64 **O Le Upu Mulimuli: O a Mea o le a E Maua i le Tusi a Mamona?**
Saunia e Elder Gary E. Stevenson

ATA NA PUEINA E CHRISTINA SMITH



SUESUE, FAITAU, ILOILO, TATALO. *Toe Fai.*



Saunia e Mario Días Alonso

Chile, ina ia alu i kolisi, e tatau ona e faia se suega ulufale i se iunivesite. Na ou manao e aoga faaenisinia i se iunivesite lea na mamao mai le mea ou te nofo ai. O le a taugata tele, o lau sini la o le mauaina o ni togi e sili ona maualuluga e mafaia i le suega ulufale ina ia ou maua ai se sikolasipi mo togi o le suega e sili ona maualuluga.

Na ou iloaina po o fea ma o le a le mea ou te fia aoaoina, ma na ou iloaina le mea e tatau ona ou faia ia tupu ai lena mea. Na amata ona ou sauni mo le suega. Na ou suesue, faitau, ma iloilo meaaoga, ae i suega faatino, ou te lei mauaina lava togi na ou manaomia. Na ou liliu atu i lou Tama Faalelagi i le tatalo ma ole atu ia te la mo le poto sili atu ma ia faateleina lou malamalama ina ia mafai ona ou ausia

lau sini. Sa ou tatalo mo lenei mea mo se tausaga atoa lava. Na ou alu i vasega sauniuni faapitoa i lau aoga, ma na ou lesitala i vasega i se inisitituti lea na agai atu i le saunia mo le suega.

Sa ou faaauau le suesueina o tusutu-siga paia i aso taitasi, ma sa ou le misia se aso o le seminar. Na ou faataunuina ou tofiga uma i le Perisitua Arona ma e le faia lava ni meaaoga i aso Sa, e tusa lava



*A aunoa ma se sikolasipi,
e le mafai ona ou gafatia
le kolisi.*



pe o le a le faigata o le tulaga. Na ou iloaina o le aso Sa o le aso o le Alii, ma na ou manao e faaaloloalo i ai e pei ona aoaoina ai au e ou matua. Na ou iloaina e le mafai ona ou misia e au lava ia faamanuiaga a le Tama Faalelagi mo au, aemaise lava pe a sili ona ou manaomia. E ui lava i nei mea uma, ou te lei mauaina togi na ou manaomia i au suega faatino.

Na matou tatalo ma anapopogi ma lou

FESOASOANI IA TE OE IA MANUIA I LAU AOGA

Ua saunia e le Ekalesia le tele o punaoa e fesoasoani ia te oe i lau aoaoga po o lau aoga pe a maea le aoga maualuga:

- Ua maua le Tupe Faaagaga mo Aoga i nisi o atunu u e fesoasoani e totogi mo aoaoga mo galuega. E mafai ona e talanoa i lou epikopo po o le peresitene o le paranesi e uiga i lea tupe pe alu i le pef.lds.org.
- Ua saunia e le BYU-Pathway Worldwide se aoaoga e maualuga atu ma taugofie i le initoneti. E amata tamaiti aoga i le PathwayConnect, o se polokalama e tasi le tausaga e fesoasoani i tagata e amata pe toefoi ai i aoga faauunesite. A maea le PathwayConnect, e mafai e tamaiti aoga ona maua se tusipasi ua saunia mo galuega i le itiiti ifo ma le tausaga ona faauau ai lea e maua se tikeri—i le totogi maualalo lava lea e tasi. Asiasi i le byupathway.lds.org.
- O le Aoaoina o le Igilisi e mafai ona faaleleia ou avanoa i le mauaina o se galuega sili atu. O le EnglishConnect o se polokalama e aoao ai le gagana Igilisi ua saunia e le Ekalesia e fesoasoani i tagata e faateleina le ola tutoatasati faaleagaga ma faaletino i se siosiomaga e totonugalemu i le talalelei. Asiasi i le englishconnect.lds.org.
- O le kosi a le Ekalesia o le ola tutoatasati mo aoga ua ta'ua o “Education for Better Work.” O se kosi e 12-vaiso e faia i lau siteki po o le itu. Sue le tusi lesona i le Gospel Library i lalo o le Self-Reliance po o le lds.org/go/71857.



O LE AOGA O LE A FESOASOANI IA TE OE E AUAUNA ATU

“O lau fautuaga . . . o le faauau i lau aoga, po o fea lava o e i ai, po o a lava mea e te fiafia i ai ma avanoa e ono oo mai. Filifili pe faapefea ona sili atu ona mafai ona e auauna atu i lou aiga ma le nuu ma ia saunia lelei.”

Peresitene Russell M. Nelson, “Education: A Religious Responsibility” (Brigham Young University–Idaho devotional, Jan. 26, 2010).

aiga, ma na tuuina mai e lou tama ia te au se faamanuiaga. Faatasi ai ma nei sauniuniga faaleagaga ma isi sauniuniga, na ou faia ai le suega. E le gata ina iu ina ou maua togi na ou manaomia, ae na sili atu i lau sini, ma maua ai pasene na sili ona maualuga e mafai i le vaega o le matematika. Na ou mauaina sikolasipi ma faamanuiaga na ou manaomia, ma na mafai ona ou aoga i le iunivesite na ou filifilia.

Mai lava i le taimi ao ou laitiiti, na ou aoaoina faapea afai ou te faia mea uma ou te mafai ma faamuamua ou tiute faaleagaga, ona faamanua mai lea o au e le Tama Faalelagi. Atonu e le tupu mai mea uma e pei ona tatou mananao ai, ae o le a tausia i tatou e le Atua. Ou te iloa ua na o Lana fesoasoani lava e mafai ai mea uma. ■

E alala le tusitala i Cautín Province, Chile.



Saunia e Elder

Joni L. Koch

O le Fitugafulu

O Lou Aso Fai

*Pe a e aoao e fiafia ma faatauaina le galuega,
e te mauaina foi se punavai sili o le olioli.*

ni nai tausaga talu ai, na ou i ai au lava i se faatasiga i le Kolisi o Churchill o le Iunivesite o Cambridge i Egelani mo se fonotaga faaletausaga mo le kamupani ou te faigaluega ai. I lena faatasiga, na ou maua ai le avanoa e taliaina ai mai le peresitene o le kamupani i le lalolagi ma le Pule Aoao se faailoga mo le matou vaega mo le galuega silisili na matou faia i lena tausaga.

Ao patipati lima o taitai o kamupani mai le lalolagi atoa, o loo sui i tagata faigaluega e 80,000, ma viia le matou vaega mo la matou faailoga, na ou mafaufau, "Atonu o lou aso faigaluega sili lea!" O le lagona i lena taimi na maoae.

Falaoa e Faasoaina

Ae na toe foi i tua lou mafaufau i lou aso muamua i le galuega toeitiiti lava 40 tausaga talu ai. Na i ai se falefalaoa a lou tama ma na taoina ni falaoa e tufatufa atu i tamai maketi e tele i la matou aai i Pasila i saute. Ao ou tamaitiiti lava, ou te tauanauina pea lou tama e ave au i le galuega faatasi ma ia. I setasi aso na iu lava ina ia fai mai ioe!

Na sui e lou tina se tamai talieele paepae ma se pulou taofalaoa mo au, ma na ma o loa ma tama i le falefalaoa. Na ma paluina faatasi, ma saunia le paluga, faatulaga le paluga i ni papafalaoa, ma tuu papafalaoa i totonusi

o le ogau mu piliki. A uma ona tao falaoa, ma te faaaogaina se foe laupapa umi e aumai ai i fafo ma le faaeteete falaoa. Ma te faatalitali mo ni nai sekone, ona ma faasoaina lea o se papafalaoa o loo vevela pea. Sa manaia le tofo i ai!

I le toe tepa i tua, na ou filifili ai o le mauaina o se faailoga i le Cambridge o lau aso faigaluega sili iona lua lea. O le aso faigaluega sili lava ma le sili ona fiafia sa i totonusi o se nofoaga e sili atu le maualalo: o se tamai falefalaoa e leai ni tagata matamata po o ni tagata e tutulai ma patipatia. Sa na o au lava ma lo'u tama. O lena aso, na ia aoaoina au ia fiafia ma faataua le galuega ma na fesoasoani ia te au ia lagona le olioli i le faia o se mea mai i se fua i ou lava lima. Na ou aoaoina o le galue malosi e faamalieina ai le tino ma le agaga.

O le Galue o se Faamanuiaga.

Ina ua tau atu e le Alii ia Atamu ma Eva, "E te 'ai foi au mea e 'ai ma le afu o ou mata" (Keneze 3:19), e foliga mai na la aaoiina i laua. O le mea moni, na la tuuina atu ia i laua le avanoa e oo ai i le olioli



O le a ou manatua pea le talieele paepae ma le pulou taofalaoa na faia e lou tina mo au ma le falaoa na ma faia faatasi ma lou tama.

galuega Sili Lea!

ma le lagona o le faamalieina i le ola tutoatasi, o le sau-nia o mea latou te mananao ai ma mea e manaomia.

O le tele o tatou e vaai i galuega ua na o se ala e tausia i tatou lava ma o tatou aiga ma masalo o se ala e maua ai se tulaga faaagafesootai e ala i le tauaveina o se galuega tulaga mauluga. Ae e sili atu le taua, e finagalo le Atua ia i tatou ia galulue ina ia mafai ona tatou maua ai se lagona malosi o le faamalieina ao tatou faataunuina galuega, fatuina se mea fou, fausia ma faaleleia i mea ua i ai, ma faoopoopo i ai le taua i le lalolagi o loo tatou ola ai.

I le tautala ai faaleagaga, o le olaga e totonugalemu i le talalelei e aofia ai pe a lava le galue. Na saunoa mai Elder D. Todd Christofferson o le Korama a Aposetolo e Toasefululua, "O se olaga faapaiaina e faatumuina i le galue, o nisi taimi e fai soo, o nisi taimi e le manaia, o nisi taimi e le faafetaia ae o le galue e masani lava e faaleleia, faatulagaina, lagolagoina, siitiaina, auauna atu, galue e atiina ae ai ma faaleleia uiga, e fo-foa ai le matagofie, ma sailia se mea e mauluga atu."¹

Ao e tamaitiiti, atonu na fesiligia oe, "O le a lau mea e fai pe a e matua?" I le taimi o lou talavou, o lena fesili o le tele lava ona suia i le, "O le a le mea o le a e suesueina i le kolisi?"

Fiafiaga, Mamalu, ma le Faamoemoega

Po o le a lava le galuega e te filifili e taliaina, po o le a lava le ituaiga o galuega e te iu i ai, saili ia faia lau galuega ma le fiafia, mamalu, ma le faamoemoe. E manaomia lou galue malosi ma taumafai e le aunoa e ausia ni taunuuga silisili. O le i ai o lenei uiga i galuega o le a fesoasoani ia te oe ia e maua ai le saogalemu le

tumau, faalelagona, ma le faaleagaga malupui-puia. O le avanoa e galue ai o se faamanuiaga mai le Alii. Ao e aoao e faafetaia ma fiafia e galue, o le a e maua le fiafia ma le faamoemoe lena e oo mai le ola tutoatasi.

O loo mafai pea ona ou faalogoina le patipati ma upu faamalosiau mai le au matamata i le lunivesite o Cambridge, ae e sili atu le pele ia te au o le manatua lea o lou aso i le falefalaoa ma lou tama ma le manogi o na papafalaoa ao latou o mai i fafo mai le ogaumu. ■

FAAMATALAGA

1. D. Todd Christofferson, "Toe Manatunatuga i se Olaga Faapaiaina," *Liahona*, Nov. 2010, 16.

O Aposetolo o Molimau a Keriso—ma

e Mafai Foi e Oe!!



Saunia e Heather
White Claridge
Mekasini a le Ekalesia

M afaufau
faapea
o oe ma
se ue o loo aai i
le malologa i le
aoga. E tau tatala
atu e lau uo se
lole ae savali mai
se tasi ma tuuaia
o ia i le gaoia o
le lole ma faa-
tonu mai ia "toe
faafoi." Na e i ai
faatasi ma lau uo
ao ia faatauina
le lole, o lea e ui
lava i lou fefe,
ua e tau atu i lea
tagata o lau uo e
le o se gaoi.

E Faapefea ona Avea o se Molimau a Iesu Keriso

- Ia i ai se "fia talitonu" (Alema 32:27).⁴
- Suesue e uiga i le Faaola i tusitusiga paia.
- Tatalo ma ole atu i le Agaga Paia e faamautu mai o Keriso o lou Faaola.
- Suesue le Feagaiga Fou ma faailoga le taimi na avea ai Apostetolo ma ni molimau.



Molimau Faapitoa

O le tu atu mo le mea moni e pei o lenei e mafai ona taua o le "avea ma se molimau." I le faataitaiga, o le a avea oe ma se molimau i le uiga lelei o lau uo. E pei lava ona mafai ona avea oe o se molimau mo lau uo, na valaaulia e le Atua perofeta ma apostetolo e avea ma molimau faapitoa o Lona Alo, o Iesu Keriso. O apostetolo "ua auina mai faatasi ma le pule ma tiutetauave faapitoa"¹ e aoao atu, molimau atu, ma auauna atu o ni "molimau faapitoa i le suafa o Keriso i le lalolagi atoa" (Mataupu Faavae ma Feaigaiga 107:23).

E lei leva ona toetu mai Keriso, ae valaaulia Apostetolo e avea ma Ana molimau (tagai Galuega 1:8). Ao e duesue i le Galuega i le Feagaiga Fou, e mafai ona e faitau i le tele o taimi na molimau atu ai Apostetolo faapea o Iesu Keriso o le Alo o le Atua (tagai Galuega 2:36; 5:27–32; 10:36–44). O Apostetolo i aso nei o loo faaaauau pea i lenei valaauga o ni molimau faapitoa—tau ina faalogo i soo se konafesi aoao ma o le a e vaai ai i le ala latou te molimau ai ia Keriso.

O le Agaga Paia e molimau ia Keriso

O nisi o Apostetolo i le Feagaiga Fou na i ai faatasi ma Keriso ao i ai o la i le lalolagi ma na vaai o afio ae o la i le lagi (tagai Galuega 1:9–11), ma o Apostetolo o aso nei atonu na vaai ia Keriso,² ae e le o le vaai tino ia Iesu e


avea ai se tasi o se molimau ia te la. Na sau-noa mai Iosefa Filitia Samita (1876–1972), "[O le Agaga Paia] na o le pau lea o le ala e mafai moni ai e se tagata ona iloa o Iesu o le Keriso ma e moni lana talalelei."³ O lona uiga, e ui lava atonu na vaai Apostetolo ia Keriso, latou te iloaina o la o le Faaola ona na tau atu e le Agaga Paia ia i latou!

E Mafai ona Avea Oe o se Molimau

O le mea e sili atu foi le ofoo fogia e folafolaina atu foi ia oe e faapea e mafai ona e iloa o Iesu Keriso o lou Faaola e ala i le Agaga Paia (tagai Mataupu Faavae ma Feaigaiga 46:13). E le o se mea e na o Apostetolo e mafai ona iloaina! E ui lava e le valaaulia oe e avea ma se molimau faapitoa a Keriso, e mafai ona e saili se molimau o Keriso ma avea ma Ana molimau i tagata i lou olaga. E mafai ona e mulimuli i le polo-aiga a le Faaola ia Peteru: "Pe a liua mai oe, ona e faamalosi ai lea i ou [uso ma tuafafine]" (Luka 22:32). ■

FAAMATALAGA

1. Gordon B. Hinckley, "Molimau Faapitoa mo Keriso," *Ensign*, Me 1984, 50.
2. Tagai Boyd K. Packer, "O Le Molimau," *Liahona*, Me 2014, 97; tagai foi Lorenzo Snow, "O Se Asiasiga mai le Faaola," *Liahona*, Sete. 2015, 80.
3. Iosefa Filitia Samita, *Answers to Gospel Questions*, comp. Joseph Fielding Smith Jr., 5 vols. (1957–66), 3:31.
4. Tagai foi Jeffrey R. Holland, "Le Alii e, ua Ou Faatuatua," *Liahona*, Me 2013, 93–95.



"UA TATAU ONA E TUUA LENEI NOFOAGA"

E ui i ou popolega e uiga i le siitia atu i Chile i
matu ma lou aiga, na liua le toafa e avea ma
o matou laueleele folafolaina.



Saunia e Sergio Riquelme Segura

Ina ua ou faiata i le Tusi a Mamona e uiga i le ala na lagolagoina ai pea e Nifae Iona tama tali faaaliga, na ou faaui ai faapea o le tele o autalavou i le Ekalesia atonu e pei lava o Nifae. Ae ina ua filifili lo matou aiga faapea ua manaomia lo matou siitia atu i le toafa, na ou lagonaina le pei o Lamana ma Lemuelu. Sa ou le fia tuua lou aiga.

E pei o Nifae ma ona uso, o au na "fanaua e matua lelei" (1 Nifae 1:1). O i laua uma na auai i le Ekalesia ao talavou, ma na faatalitali lou tina mo lou tama ao ia auaua atu i se misiona. O i laua o ni tagata toaaga, ma galulue malosi o le Ekalesia.

Ao ou i ai i le aoga maualuga, sa faasolo ina leaga le tamaoaiga i lo matou eria o Concepción, Chile. Na leai ni galuega, ma na amata ona faigata i lou tama ona maua se galuega. Mulimuli ane, na ia amata ona sue galuega i fafo atu o le taulaga.

O lana sailiga galuega na ia oo atu ai i matu i le aai o Calama, i eria eli maina o Chile. O ia o se enisinia faufale, ma na ia maua se galuega lelei iina. Ae sa tuuatoataso i ia ma na mamao ese. Na faatoa matou vaai ia te ia pe a ia mafai ona totogi le 32- itula e tietie ai i le pasi e agai mai i le fale.

Ina ua mavae ni nai tausaga o le vaaia o lou tama i le na o le faalua pe faatolu i se tausaga, na lagona e lou tina ua oo i le taimi e faia ai se suiga. Na filifili ou matua ua tatau ona siitia atu i matu le vaega o totoe o lo matou aiga.

E Tatau ona Matou Faatasi ma lo Matou Tama

Na leai se faafitauli i lou uso laitiiti i le siitia ese. Ma o lou tuafafine matua, lea na i ai i le kolisi, sa faia se faataitaiga lelei mo a'u.

"O le a ou faaositaulagaina lau aoga," na ia fai mai ai. "E tatau ona tatou faatasi ma lo tatou tama."

Na lagolagoina uma e tagata le faaiuga e siitia ese sei vagana ai au. Sa ou manao foi e faatasi ma lou tama, ae ou te le fiafia e faia ni suiga ma ni osigataulaga patino. E i ai au uo, ou te masani i lou siosiomaga, ou te fiafia i lou olaga, ma na ou manao e alu i le kolisi i Concepción. Na ou faia mea uma na ou mafaia e tauanau ai lou tina e le tatau ona matou o.

Mulimuli lava, na ia fai mai, "Atalii, ua tuuatoatasi lou tama. E manao o ia ia i tatou ia faatasi ma ia. Ou te moomoo ia e malamalamama, ae ua e matele i le taulai ia te oe lava ia." Ona ia faamautinoa mai lea o au. "O le a tatou maua ni avanoa iina."

I totonu o lo'u loto, na ou iloaaina e sao o ia—e ui e lei talitonu i ai lou mafaufa. Sa lei i ai sau molimau malosi i le taimi lea, ae na ou filifili e tatalo pe tatau ona ou alu faatasi ma lou aiga. Na oo mai se tali manino lava ia te au: "Ja tatau ona e tuua lenei nofoaga." Na ou faanoanoa, ae na ou tau atu i ou matua o le a ou alu.



Ua feiloai Sergio ma uo i le Inisitutu.

A o Fea ni Laau?

O Concepción o se nofoaga lanulauvao ma le tele o laau. E maua le 50 inisi (127 sm) o le timu i le tausaga. O Antofagasta, le aai i talaane o Calama lea ua matou siitia i ai, e maua na o le 0.1 inisi (0.25 sm) i le tausaga.

O le mea na sili ona faateia ai au e uiga i le siitia atu o le malaga lava ia. Ao matou malaga atu i matu i le pasi, o le vaaia o suiga mai le lanulauvao i le lanu enaena na faamomoiloto. Na ou mafaufau, "O fea o i ai laau? O fea o i ai povi i nuu i tua? Pau le mea na ou vaaia o palapala, maa ma tamai mauga.

E mautinoa lava, o Chile i matu o se toafa, o le a la se isi mea ou te faamoemoe i ai? Na faamanatu mai ai ia te au lagona o Lamana ma Lemuelu ina ua tuua e le aiga o Liae le lauelele o lo latou tofi ma agai atu i le togavao.

Sa tele ni mea na ou fefe ai ina ua matou taunuutu i Antofagasta. O le a le mea e tupu pe afai e le masani i le eria? O le a le mea e tupu pe afai e le taunuou faamoemoega mo le lumana?

I le faaiuga, sa le tatau ona ou popole. Na sao lou tina e uiga i avanoa na faatalitali mo i matou—aemaise lava avanoa faaleagaga.

Ae matou te lei siitia atu, sa le avea le talalelei o se mea e faamuamua mo au. O le Alii sa tuu mai i tua. Ae i Antofagasta, na oo mai ni tagata i lou olaga o e na fesoasoani ia te au e vaai i le matagofie o le talalelei. Sa ou mauaina le fesoasoani mai i ni taitai perisitua faapitoa. Na ou faia ni uo o loo tumau pea le pele ia te au. Na matuai sua atoa lava lou olaga faaleagaga.

Ou te faafetai na ou faalogo i lou tina. Ou te faafetai na tali mai le Alii i lau tatalo. Ou te faafetai na ou maua le lototeli e siitia ai i matu ma lou aiga.


O iinei i le toafa na ou faia ai ni suiga na fesoasoani ia te au e avea ma tagata ua ou i ai nei. O iinei na ou tuuto ai e talia le talalelei, auauna atu i se misiona, faaipoipo i le malumalu, ma tuuto atu lou olaga i le Alii. O iinei na ou filifili ai ua ou le toe manao ia pei o Lamana ma Lemuelu.

Mo lou aiga ma au, na liua le togavao e avea ma lo matou lauelele folafolaina. ■

E alala le tusitala i Antofagasta, Chile.

O LE FAATUUA

E OO MAI I LE LAA E TASI I LE TAIMI



"O le mea lea, aua le faavaivai i le faia o mea lelei, ona o lo o ouluua faataatiaina le faavae o se galuega tele."

Mataupu Faavae ma Feagaiga 64:33

Dear Merilee ELDER GARY STEVE

Well you have got the big bif
you, I guess when you get T
already be past. I can't be
16 years old. It seems I
years ago when you us
red cowboy hat + pray
only 35 or so, but
Stay sweet + pure
one know that the ch




can you
actions speak louder than words
+ you do fit your name
of Humor: HAPPY

Love ya
Always

Gary

Two colors



mai se Tuagane Agaalofa

Saunia e Merilee S. B. Averett

e pei ona faamatalaina ia Richard M. Romney

Sefuluono! Oka le taimi o le olaga! "E leai se tasi e mafai ona faia lenei mea na o ia," na ou mafaufau ai.

O ou matua atamamai na agalelei ma na tuuina mai pea ia te au ni fautuaga lelei. Faatoa uma ona faaipoipo lou uso matua ma siitia ese mai le setete. Na pisi lou tuagane laitiiti i ona popolega faale 11-tausaga. Na i ai ni au uo maoae, ma ou te iloaina na popole lava ma alolofa ou taitai o le Ekalesia ia te au.

Ae o lo'u tuagane matua, o Gary, o lau uo sili lea. Na ou vaai ia te ia i mea uma lava o se talavou. "Soo se taimi lava ou te talanoa ai ia te ia, na sili atu le sao o mea uma," sa ou fai ifo ai ia te au lava. "Maimau pe ana i ai o ia iinei i le taimi lava lenei."

Ae e le o i ai o ia. Sa mamao ese lava o ia i lapani, o loo auauna faamisiona ai.

E ui lava i le misia o Gary, na ou maua lava se aso fanau malie. Na faia e lou tina se meaai o le taeao o le aso fanau masani mo au, ma na ou mauaina ni nai meaalofa ae lei alu i le aoga. O lena po, ma matou o ai ma lou aiga mo se aiga o le afiafi i le pizza ma faaiu ai i le keke o le asofanau. Na iu lava ina ou faatagaina au lava e miti i le ao e uiga i le tafafao faamasani, aveina o se taavale, ma isi mea mananaia o le a ou faia o se 16-tausaga.

Ae ui i lea, o le meaalofa sili na ou mauaina i lena aso o se tusi i le meli. E lei galo ia Gary lou aso e sili ona faapitoa! O le taimi lena e lei i ai ni imeli, o lea e umi lava se taimi e sau ai se tusi mai lapani i le Vanu o Cache, luta, ISA. Sa ou maofa ai i le taunu tonu mai lava o le tusi i lou asofanau! Na tusia lava le tusi i le

Na misia e lou tuagane matua lou aso fanau lona 16 ona sa auauna atu o ia i se misiona. Ae o le fautuaga na ia auina mai ia te au sa o se meaalofa o le a ou faapelepeleina e faavavau.

lima, lea na sili atu ai le pei lava na i ai lou tuagane faatasi ma au ao ou faitau:

"Mo Merilee:

"Ia, ua oo i lou aso fanau tele, a ea? Ou te matea e te mauaina lenei tusi ua leva ona tea. Ou te le talitonu—ua 16 ou tausaga. E foliga mai sa na o ni nai tausaga talu ai lea na e [faia ai lou pulou laititi lanu mumu kaupoe].

"Tumau i le fiafia ma le mama, ma ia iloa e tagata uma lava e taua tele le Ekalesia ia te oe. A e faia lena mea, o le a e le oo lava i se tulaga e te faia ai se filifiliga ao mamafa mai uunaiga a au uo ia te oe. Faataitaiga: I le aoga maualuga, na iloa e tagata uma lava ou te le fia inu pia pe ulaula, e leai lava, o lea e lei valaaulia lava au i se pati e faia ai na mea. Na iloa e au uo ou te le faia na mea. . . .

"Afafai e te faailoa atu i tagata ou tulaga faatauaina, ona tosina atu lea o tagata e tutusa o outou tulaga faatulagaina. Ou te le faapea atu e tatau ona e tau atu i tagata uma lava, ae o faatinoga e leotele. E ese le matagofie o lou agaga, ma e fetau lelei ma lou igoa. Ma e i ai sou uiga aga malie lelei. Manuia 'Le Aso Fanau 16 Matagofie!' O le fuaiupu mulimuli na vase lalo i le lanumumu. E leai se isi meaalofa o le aso fanau o le a sili atu! Na ou faitauina ma toe faitauina, seia oo ina ia toe foi mai o ia mai lapani ma na iu loa ina mafai ona ma talanoa faatasi faafesagai.

Ua leva tausaga talu ona ou maua lena tusi, ae o loo ia te au pea. E tele mea ua sui talu mai lena taimi, ae le faapena lou alofa mo lou tuagane. O le aso ua ou lagolagoina ai o ia e le gata o se tagata ma se uo, ae o Elder Gary E. Stevenson o le Korama a Apostolo e Toasefululua. O le fautuaga ua ia ofoina mai o se molimau faapitoa o Keriso i le lalolagi atoa o se malosi faaopoopo lea i lou olaga, e pei lava o le tusi na ia auina mai ia te au i lou aso fanau lona 16. ■

E alaala le tusitala i luta, ISA.

O a Mea o le a E Maua i le Tusi a Mamona?

Saunia e Elder Gary E. Stevenson
O Le Korama a Aposetolo e Toasefululu

Ao outou maua le taimi ma se nofoaga filemu e faitau ai le Tusi a Mamona, ua ou vaaia ua outou mauaina ni tali, lagonaina le taitaiga, ma le mauaina o lau lava ia molimau o le Tusi a Mamona ma se molimau ia lesu Keriso.

Ao e faitauina, o le a e saili i fuaitau o lenei tusi taua ma fetaiai ai ma lou Faaola pele, le Alii o lesu Keriso, e toetoe lava o itulau uma. O le faaaogaina o nisi ituaiga o suafa mo Lona suafa pe tusa o se averesi o le faatasi i fuaiupu uma e 1.7.¹ E oo foi lava i le Keriso Lava la na molimau mai i lona moni a'ia'i i nei aso e gata ai, e faapea, "E pei ona soifua lo outou Alii ma lo outou Atua, ua moni ia" (Mataupu Faavae ma Feagaiga 17:6).

OU te faafetai lava i le valaaulia ma le folafolaga ua ofo mai e le Alii e ala mai i le perofeta o Moronae ia te outou taitoatasi—ma i tagata uma e faitauina le Tusi a Mamona: "Ma pe a outou maua nei mea, ou te apoapoi atu ia te outou ia outou ole atu i le Atua, le Tamā Faavavau, i le suafa o lesu Keriso, pe ua le moni ea nei mea; ma afai tou ole atu ma le loto faamaoni, ma le manatu moni i ai, ma le faatuatua ia Keriso, o le a ia faaali mai le moni o ia mea ia te outou, i le mana o le Agaga Paia." (Moronae 10:4; tagai foi fuaiupu 3, 5).

O upumoni o le a e maua i le Tusi a Mamona o le a siitia ma uunaia oe. O le a faamalosia ai lou faatuatua, faatumulia ai lou agaga i le malamalama, ma saunia ai oe mo se lumanae e te le o mauaina atoa le tomai e malamalama i ai.

I totonu o itulau o le tusi, o le a e iloaina ai le alofa lemafuatia ma le alofatunoa le mafaa-matalaina o le Atua. A o e tauivi e mulimuli i aoaoga e te mauaina iina, o le a faalauteleina lou olioli, o le a faateleina lou malamalama, ma o tali o loo e sailia i le tele o luitau o le olaga faaletino o le a tatala atu ia te oe. A o e vaai atu i le tusi, e te vaai atu i le Alii. ■

Mai se lauga o le konafesi aoao o Oketopa 2016.

FAAMATALAGA

1. Tagai le Susan Easton Black, *Finding Christ through the Book of Mormon* (1987), 16–18.

**E toafa le
fanau tama.**



Sa soifua mai i
le aso 6 o
Aokuso, 1955,
ma tuputupu a'e i
Cache Valley,
Iuta.



Na nofo i Asia

mo le sili atu ma le iva
tausaga o lona olaga.



Elder

GARY E. STEVENSON



A o avea o ia ma alii
talavou, sa masani ona la
o ma lona tama e asiasi
ma auauna atu i
**fafine ua ot
o latou tane**
i le uarota.

Sa valaaufina o
se Apostolo i a
Oketopa
2015.



Na te faatatau
i lana **ava**
o le "lasusulu i
lo'u olaga."



Na saunoa mai o lona
valaauga i le
Korama
a le Toasefululua sa o
se "aaifiaga na tete ai
tulivae."



Sa ia mauaina
se faailoga i le
puleaina
o pisinisi
mai le lunivesite
a le Setete a luta.



Sa **faatuina faatasi**
se kamupani e fausia masini
faamalositino lea sa ia galue ai o se
peresitene ma se ofisa pule faafoe
seia oo i le 2008.



Ina ua 11 ona tausaga, na
faasaoina o ia e
lona tama mai le faateiina
faafusei o se gata feai.

E fiafia e
faasee i
le aisa,
faasee i le laupapa i le sinou,
ma le savavali i ala sopo.



Valaaulia e
auauna atu i le
Misiona a
Iapani Fukuoka
o se faifeautalai talavou.



Sa avea o ia ma
peresitene o le
Misiona a
Iapani Nagoya
mai le 2004 i le 2007.



AUTALAVOU MATUTUA

**PE NA E TOE FOI VAVE
MAI I LE FALE MAI I LAU
MISIONA?**

*Po o le a lava le mafuaaga, e
mafai lava ona e faaaaua ona
olioli i faamanuiaga o le talalelei.*

42

AUTALAVOU

**E MAFAI ONA AVEA
OE O SE MOLIMAU A
IESU KERISO**

56

FAAALIGA FAALETAGATA
LAVA IA

**MULIMULI LE
FAATAITAIGA A
NIFAE**

58

AOAOINA O FANAU

**O LE UIGA O LE AVEA
MA KERISIANO**

F12

O LE EKALESIA A
IESU KERISO
O LE AU PAIA O ASO
E GATA AI

Uo



E faapefea ona
avea oe o se
paionia?

Tagai itulau U7 ma le U10



Saunia e
Peresitene
Dallin H. Oaks

Fesoasoani
Muamua i le Au
Peresitene Sili

Faasoaina Atu o le Talalelei

Na poloaiina e le Faaola, o Iesu Keriso, Ona soo e faasoa atu le talalelei i tagata uma o le lalolagi. Sa ia poloai atu,

**“O atu ia outou i le lalolagi uma,
ina talai atu ai le talalelei
i tagata uma lava”**

(Mareko 16:15).

Tatou te manaomia uma tagata o le Ekalesia ia fesoasoani e auina atu le talalelei i le lalolagi uma.

O nisi nei o auala e mafai ona e fesoasoani ai:

- ① **Alofa** i tagata uma e pei o ou uso ma tuafafine, e pei ona aoao mai Iesu.
- ② **Tausi poloaiga** ina ia avea oe ma se faataitaiga lelei.
- ③ **Tatalo** ia iloa ai po o ai ua saunia e aoao e uiga i le talalelei ma pe faapefea ona e faasoaina atu ia i latou.
- ④ **Fesoasoani i isi** e aoao e uiga ia Iesu Keriso.

O le galuega faafaifeautalai o lona uiga o le i ai o se uiga o le alofa ma le fesoasoani atu i isi. Po o le a lava le ala e tali mai ai le isi tagata, o oe o se faifeautalai manuia pe afai e te faasoa atu le talalelei ma le alofa! ●

*Na sii mai le “Faasoaina Atu o le Talalelei Toefuataiina,”
Liahona, Nov. 2016, 57–60.*




Faasoa atu ma le Alofa

E mafai faapefea ona e faaali atu
iou alofa i le aso?

Faafetaui ia ata taitasi ma le numera
mai le savali a Peresitene Oaks.



Tatalo ma **FILIP**



Saunia e Shirley Espada-Richey

(E faavae i se tala moni)

"Tatalo e le aunoa" (Mataupu Faavae ma Feagaiga 19:38).

O le taimi muamua lea o Josef i le fale o Filip. Sa la maua se taimi sili i le fausia o se vaalele pepa malo. Na mafai foi ona la valivaliina ni aloiafi ofoofogia i ona luga. Ina ua valaau mai le tina o Filip ia i laua mo le aiga o le afiafi, na mulimuli atu Josef ia Filip i totonu o le umukuka.

"O le a ou faia le faafetai," na fai atu ai le tama o Filip.

O le a le uiga o lena mea? Na mafaufau ai Josef. Na ia vaavaai atu ia Filip ma lona aiga ao latou pai atu i o latou muaulu, sosoo ma le ogatotonu o o latou fatafata, sosoo ma le itu agavale, ma le itu taumatau. E lei vaai muamua lava Josef i se tasi o faia lea mea.

Na tuu atu le lima o Filip ia te ia. Na autilo solo Josef ma iloa ai le isi vaega o le aiga o Filip o loo uu lima ma punonou o latou ulu. *Pe o latou saunia e tatalo? Pe o le uiga ea lena o le "fai le faafetai"?* na mafaufau ai Josef.

E lei manao Josef e faatiga i lagona o Filip, o lea na ia uu ai le lima o Filip. Na uu e le tama o Filip le isi lima o Josef ona amata lea ona tatalo.

"Faamanuia i matou, Le Alii e . . ."

Ae latou te lei nonofo i lalo, na pai atu lima o Filip ma lona aiga i o latou muaulu ma fatafata e pei ona latou faia muamua.

Ina ua taunu Josef i le fale, na fesili atu Tina e uiga i lona aso.

"Na e maua se aso fafia?" O le fesili lea a Tina.

"Ioe," na tali lemu atu ai Josef. Sa ia *maua* se taimi fafia. Na manaia le vaalele, ma na seki a hamupeka [hamburgers]. Ae e i ai se mea na ia popole ai.

Na tilotilo faalatalata atu Tina ia te ia. "E te le o Seki mai. E i ai se mea o faaletonu?"

"Ia . . ."

Sa anoanoai fesili a Josef! Sa ia mafaufau pea i lena tatalo. Aisea na ese ai mai le ala e tatalo ai o ia ma lona aiga?

"Tina," na ia fesili atu ai, "na faapefea ona e tatalo ae e te lei auai i le Ekalesia?" Na tau atu e Josef ia te ia e uiga i le tatalo a le aiga o Filip.

O le a le uiga
o le "fai le faafetai"?

"E foliga mai o i latou o ni Katoliko, e pei ona sa ou i ai muamua," o le tala lea a Tina. "Sa latou faia le faailoga o le satauro i o latou lima. O e vaai i le ala e foliga mai ai o se satauro? O se faamanatu o Iesu na maliu mo i tatou."

Na ataata Josef. "E talitonu foi la Filip ia Iesu?"

"E sao lena," na fai mai ai Tina. "E te manatua le mea na tau atu e le tama o Filip i le tatalo?"

Sa tatau ona mafaufau Filip i lena mea. "Na ia faafeai i le Atua mo meaalofa ua Ia tuuina mai ia i tatou . . . ma na ia talanoa e uiga ia Keriso!"

"Vaai la?" Sa fai atu ai Tina ma se ataata. "E le matuai eseese lava i tatou. Ua ou fafia na mafai ona e tatalo faatasi ma le aiga o Filip."

I ni nai aso mulimuli ane sa sau ai Filip e taaalo. Na la taaalo i fafo ina ua valaau mai Tama ia i laua e o mai mo le aiga o le afiafi. Na gogolo le manava o Josef ao la tamomoe atu i le umukuka.

"Ua ou mole a!" na fai atu ai Josef.

"E faapena foi au," le tala a Filip.

Na tofu le tagata ma le nofoaga faataamilo i le laulau. Na nofo Filip e sosoo ma Josef. Na fai e Filip le faailoga o le satauro ma tuu atu lona lima ia Josef.

"O le ala lea matou te tatalo ai i lo matou fale," na fai atu ai Josef. "Matou te piilima, moeiini o matou mata, punonou o matou ulu, ma tatalo."

"E faapena?"

"E faapena."

"Faigofie," na fai atu ai Filip.

Na moeiini mata o Josef ma ataata. Na fafia o ia na mafai ona ia tatalo ma lana uo. ●

E alala le tusitala i Kalefonia, ISA.



E i ai au uo i le aoga e Katoliko ma Musalemi, ma o i matou uma lava o ni uo lelei ona o le ala lena e finagalo Iesu ia i tatou ia faia ai le tasi ma le isi.


Elizabeth A., 8 tausaga, West Midlands, Egelani

Tumu i Galuega Lelei

O nei tamaitai e toatolu mai le Feagaiga Fou na fesoasoani i tagata. Faitau mea na latou faia; ona faafetaui lea o ata. O le a se mea e mafai ona e faia e fesoasoani ai i se tasi i le aso?



O lenei itulau e lagolagoina le itulau 108 o le Sau, Mulimuli Mai ia te Au—Mo Tagata Taitoatasina ma Aiga.



La Avea ma se Paionia

Faamamafa

F

Upu ma le fati na tusia e Ruth Muir Gardner
Fetuunai e Vanja Y. Watkins

F

1. E le na o se taa - vale
(2. E) moo - mi - a lou loto -

C7

to - so. Pe tuu lou a - iga. Pe
te - le. Faa - tua - tua lē fefe. Ma

F

Gm

laa i mai - la e a - fe. Ia a -
ga - lue fa - a - ma - lo - si. Ia a -

C7

vea ma pai - o - nia!

F

1. E

F

2. E nia!

Gm

vea ma pai - o -


Faafeiloai atu mai Kemupotia!



Talofa, o a'u
o Paolo Ma o
Margo lea.

O loo ma asiasi i
Kemupotia. O mea nei
na ma aoaoina!

O **Kemupotia** o se atunuu i Asia i Sautesasae. Pe a ma le 15 miliona tagata e nonofo iina, faatasi ai ma le 14,000 tagata o le Ekalesia.



O se Tusi a Mamona lenei i le faaKemupotia. O le gagana Kemupotia e taua o le Khmer (kuh-MY) O lona alafapeta e 74 mataitusi—e aupito sili ona tele i se isi lava alafapeta i le lalolagi!

O loo faafeiloai e tagata o le Ekalesia le tasi ma le isi i ala masani faaKemupotia, e taua o le *sampeah*. O le maualuga lava o ou lima, o le tele foi lea o lou faaalia o le faaaloalo.

O le tele o tamaiti i Kemupotia e o i le aoga ma le lotu e ala i le tietie i se uila afi faatasi ma se matua. Pe latou te o i se *tuk tuk*—o se taavale e toso e se uila afi.





O le tausaga talu ai na faasilasila mai ai e Peresitene Nelson o le a fausia le malumalu muamua i Phnom Penh, le aai o le laumua! O le a fesoasoani le malumalu i aiga e pei o lenei ia faamauina faatasi e faavavau.




O le tele o tamaiti Peraimeri i Kemopotia e pau ia o Kerisiano i le latou aoga. E mafua ona o le tele o tagata i Kemopotia e auai i se lotu e taua o le Puta. O le latou lotu e aoaoina i latou ia faamaoni, filemu, ma popoto. O se maafaamanantu Puta tautaua lenei i Kemopotia e asia e tagata mai le salafa o le lalolagi.

O le tele o meaai Kemopotia e faaaoga ai le *prahok*, o se kaleve i'a oona ma masimā. O nei tagata o le Ekalesia na faia se ulo supo lapoa e aai ai faatasi i le fale autu o le siteki i le va o sauniga o le konafesi aoao.



Faafetai mo le asiasi o Kemopotia ma i ma'ua.
Feiloai i se isi taimi!



Faafeiloai mai i nisi o a ma uo mai Kemopotia!



Ou te lagonaina le fiafia tele pe a ou usiusitai i le Atua.

**Sineth B., 6 tausaga,
Kampong Thom,
Kemopotia**



Ina ua uma au lesona ma faifeatalai i le fale, na papatisoina loa au ma ua ou fiafia lava!

**Sina B., 8 tausaga,
Kampong Thom,
Kemopotia**

**E te sau mai Kemopotia?
Tusi mai ia i matou! Ma te
fiafia lava e faalogo atu
ia te oe.**

Mara le Paionia



Saunia e Jessica Larsen

(E faavae i se tala moni)

Oketopa 2018, Phnom Penh, Cambodia

Na faamau e Mara lona sakete ma tilotilo i le faata. Na malie le faia o ofu lotu i se aso Toonai, ae o se aso faapitoa lenei aso Toonai. O le konafesi aoao!

“Pe o e fiafia mo le sauniga a tamaitai?” O le fesili lea a Mak (Tina). Na ia pulumuina faavavevave, ma le faaeteete le lauulu o Mara. “Ou te manao ia e taumafai e faalogo lelei i le mea e te mafaia.”

“Ioe! Talosia latou te faamatalaina ni tala paionia!” Na sili le fiafia o Mara i na tala.

“Atonu o le a latou faia,” na fai atu ai Mak. “Pe na e iloaina o lou tama o se paionia?”

Sa lē mautonu Mara. E lei tosoina lava e lona tama se taavale toso.

“E faapefea ona paionia o ia?” na ia fesili.

Na luelue atu lona ulu agai i le faamalamā, agai i le vaitafe. “Sa fagota o ia iina ina ua ia feiloi i faifeautalai. O ia le tagata muamua o lona aiga na papatiso,” na fai atu ai Mak. “Ua avea ai o ia ma paionia! Sei ta o e su'e tinamatua.”

O Yiay (Tinamatua) sa faatalitali mai ia i laua i le potu i luma. Na nonofo faatasi uma le aiga o Mara ma ona matuamatutua. Na fesoasoani Yiay e vaai Mara pe a tuua le aoga ao faigaluega ona matua. O lea ua tu Yiay i tafatatafa o le uila afi, o le uila afi lapoa e aveina i latou faataamilo i le aai.

“E faatoa 25 tausaga talu ona i ai le Ekalesia i Kemopotia,” na tau atu e Mak ia Mara ao ia tatalaina le faitotoa ma toso atu le uila afi i le auala. “O i tatou uma a la o paionia. E oo foi ia te oe!”

“E faapefea ona ou paionia?” Sa mafaufau ai Mara ao ia oso i luga o le uila afi. Na ave e Mak le uila afi, o Yiay i tua ao Mara i le ogatotonu. Na pipii mau Mara ao latou masau atu i lalo o le auala pisi.

Ao latou pasi atu i se faleaiga, na tumu le ea i le manogi o le lauti. E toetoe lava o tagata uma iinei e inu lauti. Ae le o Mara. Na ia mulimuli i le Upu o le Poto. Na ataata Mara. O se tasi lena o ala e paionia ai o ia!

Ao mimilo atu le uila afi i le pioga, na iloa atu e Mara se *wat*, o se malumalu Puta. O le tumutumu maai lanumumu na maualuga atu i lo isi fale. Na saofafai ma suesue Monike ma ulu ua selemole i le faapaologa.



Na iloa e Mara o le tele o tagata i Kemupotia o Puta. Latou te le talitonu ia Iesu Keriso. Ae na talitonu i ai Mara. "O le isi ala lena ou te paionia ai," na mafaufau ai Mara. Ma o le aso o le a ia faalogo ai i le perofeta!

Ao agai atu le uila afi i totonu o le paka a le lotu, na iloa atu e Mara le tele o tamaitai ua taunuu mai. O nisi na savavali pe na tietie foi i uila afi. O isi na taunuu mai i ni *tuk tuks*, o tamai taavale e toso e se uila afi. O le tele o tamaitai na ofuina ni ofu uumi po o sakete lanutasi, e pei o Mara. O isi na ofuina ni *sampots*, o ni sakete matagofie uumi e faia ini ie felanulanuai ua mamanuina.

Na nonofo i lalo i le falesa Mara, Mak, ma Yiay faatasi ma isi tamaitai. Na faia moni lava le konafesi i se vайaso atoa ua tuanai i le Aai o Sate Leki, Iuta, ISA. Ae o lenei o le a mafai e tagata i Kemupotia ona matamata i le faasalalauga i le Khmer. Na tautala Mara i le Igilisi ma le Khmer i le fale, ae na te aoaoina foi le faaFarani i le aoga. Ae o le tele lava o tagata Kemupotia e na o le Khmer e tautatala ai.

O le failauga muamua e lei faamatalaina ni tala e uiga i paionia. Ae o le failauga lona lua na faamatalaina se

tala e uiga i le savali i luga o se ala palapala tusao i luga i lona agai atu i le fale mai le aoga. Sa taua o le "aula sopo a tama," ma o nisi taimi na te aveese ona seevae ae savali i lalo. Sa ia manao e fai mea faigata ina ia pei ai o ia o se paionia! Na ataata Mara ao ia mafaufau e uiga i ala uma lava na avea ai o *ia* o se paionia.

O le failauga mulimuli o le perofeta. Sa ia tu maualuga. Na faapitoa lava le faalogo lelei o Mara. "Ou te valaaulia outou ia faitau le Tusi a Mamona i le va o le taimi nei ma le faaiuga o le tausaga," na ia saunoa ai. "O le a matale le lagi mo outou. O le a faamanuia outou e le Alii."

Na iloa e Mara o le a le faigofie le faitauina o le Tusi a Mamona atoa lava. Sa tilotilo atu o ia i tamaitai na siomia o ia. Na filifili i latou uma lava e mulimuli ia Iesu Keriso. Na o mai i latou uma lava i le po nei e faalogo i le perofeta. O le a ia mulimuli i le perofeta, e pei foi ona latou faia. O le a avea o ia ma paionia! ●

E alaala le tusitala i Texas, ISA.

I le konafesi ooao o Oketopa 2018, na faasilasila mai ai e Peresitene Russel M. Nelson o le a fausia se malumalu i Kemupotia!

O au o se Kerisiano!

Saunia e Marissa Widdison

Mekasini a le Eklesia



Ina ua ou papatiso ma faa-mauina, na ou tauaveina le suafa o Keriso.
O lona uiga ou te filifili e mulimuli ia te la ma taumafai e fai le mea sao.



O au o se Kerisiano! Ou te faitau tusitusiga paia i aso uma,
ma aooa i Lona soifua.
O Ana vasega, Ana aoaoga, Lana taulaga e faavavau.



O au o se Kerisiano! Ou te manao ia iloa e le lalolagi
na maliu Iesu mo i latou.
Ona sa la tuuina mai Lona soifua mo i tatou,
o le a tatou toe ola uma lava!



O au o se Kerisiano! Ou te talitonu o Keriso
o le Alo o le Atua na Fanaua—
O le Perenise o le Filemu, le Leoleo Mamoe
Lelei, le Areto o le Ola, le Paia e Toatasí.



O au o se Kerisiano! Pe a tiga lou agaga i
le agasala po o faigata o le lalolagi,
Ou te liliu atu o lo'u loto ia Iesu ma ou te
iloa o le a i ai o la iina.



O au o se Kerisiano! Ou te faaaoga au
mea ua maua e fesoasoani ai i au uo e
le tagolima.

Ou te taumafai e fai mea e faia e Keriso;
o loo ou mulimuli i Lana taitaiga.



O au o se Kerisiano! Ou te
manatua Keriso i le ala na
Ia tau mai ia i tatou:
Ou te ai ma inu i le faama-
natuga i vaiaso taitasi ma
folafola atu ia faamaoni.



O au o se Kerisiano! E tusa lava pe na o
au, ou te faaalia le amiomama.
Ou te faamaoni, lototoa, ma mama aiai.
E mafai ona e faalagolago ia te au.




O au o se Kerisiano! Ou te faamagalo i
latou uma e filifili e fai mea sese.
Ou te taliaina le filemu ma le faauo
ma fesoasoani i tagata ia fealofani.



O au o se Kerisiano! Ou
te alofa ia Iesu Keriso ma
lo'u loto atoa. E moni!
O lou taimi lenei—
faamolemole faasoa mai
pe o le a le uiga o le avea
ma Kerisiano ia te oel! ●

NA E ILOAINA?

O le igoa "Kerisiano"
na faaaogaina muamua lava i le Feagaga Fou e faamatala
ai tagata i le aai o Anetioka na mulimuli
ia Iesu. E mafai ona e faitau ia i latou i le Galuega 11:26.



“Peole a E Sau i Lou Papatisoga?”

Na manao Oliva e ee
atu mai tumutumu o
fale mo Egelani atoa
lava ia lagonaina!



Saunia e Rebecca Hogg ma
Eric B. Murdock

(E faavae i se tala moni)

“Aua ne’i ‘ino’ino se tasi i lou taulealea;
a ia fai oe ma faaaa’oa’o i e ua faatuatua”

(1 Timoteo 4:12.)

Sa le mafai ona faatali Oliva mo le vaiaso ia vave
Sona uma atu. O le vaiaso a sau o le aso tele lea
na ia faatalitali i ai talu mai lona fa tausaga. O le a
papatiso ai o ia.

Na matuai fiafia lava Oliva e uiga i lona papati-
soga o lea na ia manao ai e ee atu mai tumutumu o
fale mo Egelani atoa ia lagonaina! Sa le mafai ona
faatali o ia e tau atu i lana uo o Dylan i le aoga.

“Ou te le talitonu i ai. O le aso o lou papatisoga
ua *iu lava* ina toeitiiti lava oo mai,” na fai atu ai
Oliva. “O le a matagofie lava!”

“Faapea a au e na o pepe e papatiso.” Sa foliga le
mautonu Dylan.

“E tatau ona le itiiti ifo ma le valu tausaga o
tamaiti ina ia papatiso i Le Ekalesia a Iesu Keriso o

le Au Paia o Aso e Gata Ai,” na fai atu ai Oliva. “O lau Ekalesia lena.”

“Seki a,” o le tali lea a Dylan.

Na faafuasei lava ona maua se manatu o Oliva. “Pe e te fia sau i lou papatisoga?”

“Ioe,” o le tali lea a Dylan. “Ae sei ou fesili muamua i ou matua.”

“Ua lele!”

Na fiafia Oliva atonu e sau Dylan i lona papatisoga. O lea na ia toe maua ai se isi manatu. “Ou te le manao e faasoa atu lou papatisoga i le na o le *tasi* le uo. Ou te manao e valaaulia le tele o tagata ou te mafaia!” Na faavavevave atu Oliva i le fale ma tau atu ia Tina lana fuafuaga.

I le aso Sa anapogi ae lei oo i lona papatisoga, na amata ai le fuafuaga a Oliva. Na ia faasoa atu lana molimau i le pulelaa; ona ia faapea atu lea, “O le a ou papatiso i le aso Toonai a sau nei, ma ou te manao i tagata uma ia o mai! Pe mafai ona outou valaaulia soo se tasi e te iloaina e le lotu, pe le sau i le lotu, i lou papatisoga?” Sa ia lagonaina ua pei o se faifeatalai. Na ia fiafia moni lava i lena lagona!

I le isi vайaso na sosoo ai, na valaaulia ai e Oliva uo, tagata o le aiga, ma faiaoga i lona papatisoga.

“O le a tele lava sona taua ia te au pe afai tou te o mai!” na ia tau atu ia i latou.



Ao latalata mai le aso Toonai, ma amata ona mafaufau Oliva pe toafia ni tagata o le a o mai moni lava. Ae a pe afai o le a pisi tele i latou pe le mananao e o mai?

Na ia faia se tatalo puupuu ia i ai lava ni nai tagata na ia valaaulia e o mai. Ona ia le toe popole lea po o ai o le a sau. Sa iloa e ia na ia faia se mea lelei i le na o le valaaulia o i latou. Ma le isi foi, o le mea e sili ona taua e uiga i lea aso o le papatisoina.

Ina ua ia taunuu atu i le lotu i le aso o lona papatisoga, na tau le talitonu mata o Oliva. O le tele lava o ana uo na i ai iina e lagolagoina o ia. Na ia vaaia foi nisi tagata e le masani ai. Na ia talo atu ina ua savavali mai Dylan ma ona matua i totonu.

Ina ua oo i le taimi e papatiso ai, na laa atu Oliva i totonu o le vai mafanafana. Na uu atu lona lima e lona tama, e pei ona la faataitaia. Ona ia faia lea o le tatalo puupuu o le papatisoga ma tuu ifo Oliva i totonu o le vai. Na vave lava, ona toe tu i luga Oliva—ua susu uma ao ataata. Na ia iloaina sa ia mulimuli i le faataitaiga a Iesu.

Ina ua uma ona sui Oliva i ni ofu mago, na faamauina e lona tama ma isi alii o ia o se tagata o le Ekalesia ma tuuina atu ia te ia se faamanuiaga faapitoa, lea na latou valaaulia ai o ia ia talia le meaalofa o le Agaga Paia. Mulimuli ane, na fesili atu Oliva pe mafai ona ia faasoa atu lana molimau.

“Faafetai tele lava mo le o mai e lagolago au i lou aso faapitoa. E taua tele ia te au,” na fai atu ai Oliva. “Ou te faafetai mo lou papatisoga, ma ou te talitonu o le Ekalesia lenei a Keriso i le lalolagi.”

Mulimuli ane, na o mai tagata e faamalo ia Oliva.

“Faafetai mo le valaauliaina o au!” Na fai atu ai Dylan. “Na ou maua se lagona manaia lava i totonu.”

“Na agalelei tagata uma lava!” Na fai atu ai le tina o Dylan. “Na matou lagonaina le taliaina lelei.”

O lena po, na saofai ai i lalo Tama i le pito o le moega o Oliva. “Oka se aso manaia!” Na fai mai ai Tama.

Sa luelue atu le ulu o Oliva. “Ou te fiafia na mafai ona ou faasoa atu i au uo.” ●

E alaala le tusitala i Kent, Egelani, ma Iuta, ISA.

Ua Asiasi atu Elder Christofferson i Filipaina



Na asiasi atu Elder D. Todd Christofferson ma Sister Kathy Christofferson i tagata o le Ekalesia i Filipaina. O se atunuue maua mai i ni motu e silia ma le 7,000. Ma e sili atu ma le 770,000 tagata o le Ekalesia!



O le tele o tagata o le Ekalesia mai Filipaina—æemaise lava tamaitai talavou—e auauna atu faamisiona. Na sauoa mai Elder Christofferson e lauloa i latou i le lelei o le aoaoina o gagana.


Na aoao mai Elder Christofferson:

Ia agalelei ma tausi le tasi ma le isi. O lenei mea ua taua o le auaunaga.

Ola i le talalelei—le talalelei atoa lava!

Faasoa atu le talalelei i isi.

“O mea laiti e faia ni eseesege tetele i olaga o tagata taitoatasi ma aiga.”



Saili I ai!

O Maria ma Daniel mai Filipaina e fiafia e fesoasoani i le latou *lola* (tinamatua). O le aso na latou feauauai ai i le tuleiina o lona nofoafaataavalevale i le paka ao ia tau atu ia i latou e uiga i le faifeautalai na papatisoina o ia. Vaai pe mafai ona e sueina ni mea se 9 e mafai ona faaaoga e Maria ma Daniel i se misiona i se aso.



tusipese



fusiuā



seevae lotu




pulumu fufulunifo



tusitusiga paia



peni



api talaaga



Iputi



seevae lotu

Faaali ma Ta'u Atu



Alžběta K., 7 tausaga, Zlín Region, Czech Republic




Terezka J., 6 tausaga, Zlín Region, Czech Republic

E i ai sa'u
uo na
ma fetaui i le
matafaga i aso
malolo. O le
faauo o se mea-
lofa matagofie
mai le Tama Faalelagi!



O au o se
atalii o le
Atua. E alofa o Ia
ia te au.

Nahomie K., 3 tausaga, Kasai-Central Province, Temokalasi Ripapelika o Congo



O u te manao e
faasoa atu i
tagata uma lava.

Verlann N., 8 tausaga, Tarlac, Filipaina



O u te fiafia e opo mai isi tagata.
Ethan L., 6 tausaga, Occitanie, Farani



V aai i le mea na matou faia mo
le togalaau o le agalelei!

Abnahia and Jatziel G., 5 ma le 7 tausaga, Puerto Rico



A o ou laitiiti, sa
ou fefe i le vai. E
ui lava ina tau mai e
tagata ia te au e le tatau
ona ou popole, sa ou
fefe lava. Na tau mai e
faifeautalai ia te au na
papatiso Iesu Keriso o
se faataitaiga, ma na ou lagonaina ua tea
atu lou fefe. Ina ua ou papatiso, sa ou
lagonaina le fiafia tele.

Sara T., 11 tausaga, Ille de France, Farani



Saunia e Elder
Taniela B. Wakolo

O le Fitugafulu

"E ao ina outou ave i o outou luga le suafa o Keriso, o lou igoa lea" (3 Nifae 27:5).

Sa ou fanau i Fiti. O ou matua e le o ni tagata o le Ekalesia, ae sa la o i se isi lotu.

Ina ua ou matua, na ou faaipoipo i laru ava, o Anita. O ia o se tagata O Le Ekalesia a Iesu Keriso o le Au Paia o Aso e Gata Ai. Sa ia faaaauau ona valaaulia faifeautalai e o mai e feiloai ia te au.

Sa ou tau atu ia i laua i se tasi aso e mafai ona la o mai i le taumafataga i isi po e tolu na sosoo ai. Sa ou fai atu ia la faaaogaina na o le Tusi Paia e tali ai a'u fesili. Sa sao atoatoa a la tali. I le po lona tolu, na la fai mai ai ia te *au* se fesili.

"Afai e i ai sou faleoloa, o le a se igoa e te faaigoaina ai?"

"O le a ou faaigoaina o le Faleoloa o le Aiga o Wakolo aua o lou faleoloa," na ou tali atu ai.

"O ai e tatau ona faaigoa ai se ekalesia?"

O se fesili lelei tele. Ma na ou iloaina le tali ma lou loto ma lou agaga. O le Ekalesia moni o le a faaigoa ia Iesu Keriso aua o Lana Ekalesia. Ma o Le Ekalesia a Iesu Keriso o le Au Paia o Aso e Gata Ai na faaigoaina ia te Ia!


Sa na o le tasi lau fesili na totoe: "O afea e mafai ona ou papatiso ai?" O le tasi le vaiaso mulimuli ane, na ou papatiso ai.

Ina ua ou papatiso, na ou tauaveina i ou luga le suafa o Iesu Keriso. O lona uiga o au o se tagata o Lana Ekalesia ma na folafola atu e mulimuli ia te Ia. Ou te taumafai i le mea sili i aso uma e ola e pei ona Ia faia. Ou te iloa o Le Ekalesia moni lenei a Iesu Keriso. ●

OLANA Eklesia




Na Fetalai Mai Iesu e Faasoa Atu le Talalelei



Ina ua mavae le maliu o Iesu ma sa toetu mai, sa ia asiasi i Ona soo.

Na ia ta'u atu ia i latou e aoao tagata uma ia usiusitai i
poloaiga ma ia papatisoina.




O Peteru lea ua perofeta o le a taitaia le Ekalesia i le lalolagi. Na folafola atu e Iesu o le a faatasi le Agaga Paia ma i latou.



Ina ua uma ona aoaoina Ona soo, na toe foi atu Iesu i le lagi.



Na amata ona femalagaai le au soo ma aoao tagata i atunuu eseese.



E mafai ona ou faasoa atu foi le talalelei E mafai ona avea au
o se uo lelei ma tu atu mo le mea sa'o. ●

*Faitau po o a mea na aoao atu e Iesu i le
Mataio 28 ma le Galuega 1.*

E Manao Iesu Ou Te Faasoa Atu le Talalelei



Matua Pele,

Na tau atu e Iesu i Ona SOO ia avatu le talalelei i le "lalolagi uma" (Mareko 16:15). O le lomiga o lenei masina e mafai ona tuuina atu i lou aiga ni manatu mo le faasoaina atu o le talalelei i soo se mea o outou nonofo ai. Afai e faasoaa atu e tagata uma e i ai lenei lomiga le talalelei i se isi aiga se tasi, mafaufau pe fia isi tagata o le a aoao e uiga ia Iesu! O nisi nei o fesili e mafai ona outou talanoa i ai ao outou faitauina tala taitasi.

- Pe o i ai se tasi e mafai e lo tatou aiga ona valaaulia i le Peraimeri, i se papatisoga, po o se gaoioiga a le Ekalesia?
- O le a se mea e mafai e lo tatou aiga ona faia i lenei masina e faasoaa atu ai le talalelei e ala i a tatou faataitaiga?
- Pe iloa e a tatou uo ma tuaoi o i tatou o ni Kerisiano?

I le avea ai o se aiga, faailoga taimi uma lava e faasoaa atu ai e se tasi i nei tala le talalelei. Ona fai lea o se fuafuaga faamisiona a le tou lava aiga. Ma tau mai ia i matou pe na a mai!

Sei tatou faatumuina le lalolagi i le lelei!

O Le Uo

New Friend Section
50 E. North Temple St.,
Rm. 2393
Salt Lake City, UT 84150
USA
liahona@ldschurch.org



Saili le Liahona o loo nana i totonu!

ANOTUSI

- U2** Mai le Au Peresitene Sili: Faasoaina Atu o le Talalelei
- U4** Tataло ма Filip
- U6** Tumu i Galuega Lelei
- U7** Musika: Ia Avea ma Paionia
- U8** Faafeiloai atu mai Cambodia!
- U10** O Mara le Paionia
- U12** O au o se Kerisiano!
- U14** Pe o Le a E Sau i Lo'u Papatisoga?
- U16** O Apostolo i le Lalolagi aoao: Ua Asiasi atu Elder Christofferson i Filipaina
- U18** Faaali ma Ta'u Atu
- U19** O Lana Ekalesia
- U20** Tala o Tusitusiga Paia: Na Fetolai Mai Iesu e Faasoaa Atu le Talalelei
- U23** Itulau e Valivali: E Manao Iesu Ou te Faasoaa Atu le Talalelei